

Metiu

Lagale Lavavang At Ne Iesu Karisito Metiu Ga Malagan I

Levelinga Loklox Axasep

Lamaares 58 A.D.

Metiu neni lara atnedi lasangaun mi legepura luvuttadi loklok ka anasa at ne Iesu, lara laasen bok teren ne Levi. Neni laradi loklok ka pilas at lagavaman boro Rom. Melemu ne Iesu ga soxolik ka i la ni ga ravasu ngan laradi loklok ka anasa ren. Metiu ga malagan i na lubuk ti lubungmixin mokmokso ren me Judaia. At laaleng ne Metiu ga malagan na lubuk limixin me Judaia diga doma i do ne Moroa na soxolik ka soso mun laradi naba vot kusu neni ba lok ngan Loorong Silok atdi. At lavapaase Ibru diga so asen i mi la Mesaia (Lanarong), la at lavapaase Grik diga so asen i mi ne Karisito. Luvuttadi amgomgo at limixin me Judaia di goxoklen i do ne Iesu ga vot ngan Lanarong. Metiu ga vara i xusu na lox asuusu i ridi do ne Iesu neni Lanarong tuturun la Loorong Silok at leme Judaia, kuren la neni ga paase mumu ne Iesu ga vot kerepmo, i ngan Loorong Silok. Ne Metiu ga malagan li bok lentaba levelinga boro at Lovoang Kaala migomgo atdi mumu Lanarong at ne Moroa. At na levelinga ga sooxos at lovtopot at Lanarong.

p Lengkot Silok Keneng at na lubuk.

1:1–2:23 Diga visik ne Iesu.

3:1-12 Jon laradi sep susu ga gugu.

3:13–4:11 Satan ga lok tong pen ne Iesu.

4:12–18:35 Iesu gat pas tangtagap la ga vavang to Galili.

19:1–20:34 Iesu gat pas uto Jerusalem.

21:1–25:46 Lempanga salai ne Iesu ga lox i ro Jerusalem.

26:1–27:66 Larangtanga alis la lanmet at ne Iesu.

28:1-20 Iesu ga roo xat basinge lanmet.

Leretere Ri Lavalabat At Ne Iesu

(Lu 3:23-38)

1 ¹Anai ni leretere ri levenasen at lavalabat at ne Iesu Karisito, neni livisik li at ne Devit, la ne Devit neni livisik li at ne Abaram. ²Abaram neni ne temen ne Aisak; Aisak neni ne temen ne Jakop; Jakop neni ne temen ne Juda eburu mi luvutneton; ³Juda neni ne temen ne Peres mi ne Sara. (Nenen du laasen teren ne Tema); Peres neni ne temen ne Esron; Esron neni ne temen ne Ram; ⁴Ram neni ne temen ne Aminadap; Aminadap neni ne temen ne Nason; Nason neni ne temen ne Salmon; ⁵Salmon neni ne temen ne Boas (Raap neni nenen); Boas neni ne temen ne Obet (Rut neni nenen); Obet neni ne temen ne Jesi. ⁶Jesi neni ne temen ne Devit, loorong silok.

Devit neni ne temen ne Solomon (nenen ni latkin at ne Uraia); ⁷Solomon neni ne temen ne Roboam; Roboam neni ne temen ne Abaisa; Abaisa neni ne temen ne Asa; ⁸Asa neni ne temen ne Josepat; Josepat neni ne temen ne Jonam; Jonam neni ne temen ne Usaia; ⁹Usaia neni ne temen ne Jotam; Jotam neni ne temen ne Eas; Eas neni ne temen ne Esekia; ¹⁰Esekia neni ne temen ne Manase; Manase neni ne temen ne Amon; Amon neni ne temen ne Josaia; ¹¹Josaia neni ne temen ne Jekonia eburu mi luvutneton. Ap mo levenaleng limixin esep boro Babilon diga lok ka limixin me Israel uto Babilon ti loxokoxo.

¹²Melemu at nai, ne Jekonia neni ne temen ne Salatiel; Salatiel neni ne temen ne Serababel; ¹³Serababel neni ne temen ne Abiut; Abiut neni ne temen ne Eliakim; Eliakim neni ne temen ne Aso; ¹⁴Aso neni ne temen ne Sadok; Sadok neni ne temen ne Akim; Akim neni ne temen ne Eliuda. ¹⁵Eliuda neni ne temen ne Eliasa; Eliasa neni ne temen ne Matan; Matan neni ne temen ne Jakop; ¹⁶Jakop neni ne temen ne Josep, latlok at ne Maria, nenen ne Iesu, ga ruuna ka laasen do Lanarong.

¹⁷Kuren la i ru ka i at ne Abaram la uto at ne Devit ga epovo at lasangaun mi lavanuet lavaola. La i ru ka i at ne Devit i se leme Babilon diga lok ka limixin me Israel uto Babilon ga epovo at lasangaun mi lavanuet lavaola. La i ru ka i melemu at loxokoxo at limixin me Israel to Babilon la i se at livipisik at Lanarong ga epovo at lasangaun mi lavanuet lavaola.

Livipisik At Ne Iesu Karisito

(Lu 2:1-7)

¹⁸Anai ni leretere ri livipisik at ne Iesu Karisito. Maria, nenen ne Iesu diga ora ka i xusu latkin ti ne Josep, ketla kovisi du goxo epot, Maria ga long lenget ka i do neni mo ga balan madak mi lololos at Loroonan Kaala. ¹⁹Ne Josep, latlok teren, neni lagale laradi la ga mumu asu avukat

Lenavolo at ne Moses; ga lok lodoxoma ren kusu na ke xepe ne Maria. Ketla neni goxo vara i xusu na lox amangan i ro at lemeren limixin axap. Neni ga lok do na lok kepe nemnem mene i.

²⁰Josep gam doma mumu i na la at lara laxanimin laangelo at ne Moroa ga vot saparav i at loromtobo la ga lok, “Josep. Livisik li at ne Devit. Nemen gat uta marat kusu una lok ka ne Maria ngan latkin tu, mila mo labalan madak neni i ruuna i, neni at Loroonan Kaala. ²¹Neni naba visik lamdak temes la uba so asen i mi ne Iesu, (Lavasuun teren do laradi loklox arooro) mila neni naba lox arooro limixin teren basinge laxakapmek atdi.”

²²Ana lempanga axap ga vot kusu ri lox asorun levelinga at ne Moroa ga ravasu at lungusno at leeme vapaase alii ren, ga lok keretna,

²³‘Tatkin maxat naba balan madak la naba visik tamdak temes la limixin diba so asen i mi ne Emanuel.’ *Ais 7:14*
Lavasuun teren do, ‘Moroa eburu midik.’

²⁴La ne Josep ga xatu kaxat ap mo laaleng petpes la ga mu asu levelinga at laangelo at Leeme Silok ne Moroa, la ni ga epot ka ne Maria. ²⁵Ketla neni goxo midi eburu mi ne Maria, se neni ga visik lamdak teren. La ne Josep ga so asen i mi ne Iesu.

Lovotpot At Luvuttadi Leklen

2 ¹Maria ga visik ne Iesu ro Betilem, at lenep silok Judaia. Ap mo levenaleng ne Erodes ga nemen ngan loorong silok. Melemu lentaba luvuttadi leklen at larapenti digat pas boro at lenep laxangking it losu e uto Jerusalem ²la diga sue limixin go, “Lumumulum ua diga visix i kusu na lok ngan loorong silok ti limixin me Judaia? Maga ven lenti ren to at lenep laxangking it losu e, la marat pas ude xusu mana lotu saparav i.”

³Erodes ga ronga i na, la lebelen ga xatu, la limixin axap go Jerusalem lebelen di ga xatu bok. ⁴Erodes ga ro bubua ka nedi axap luvuttadi amgomgo at lubangmaasa la luvuttadi loklox ase at Lenavolo la ga sue di xeretna, “Lanarong diba visix i ua?” ⁵La diga vorang i rin keretna, “To at lemenemen Betilem at lenep Judaia, mila leeme vapaase alii ga malagan i xeretna,

⁶‘Lemenemen Betilem at lenep Juda, neni i silok aleng ti levenmenemen petpes to Juda. Tara me dom naba vot ngan laradi gomgo la naba lok tatao limixin tarak mede Israel kerekngan laradi loklok tatao sipsip.’ *Mai 5:2*

⁷La ne Erodes ga ro bubua nemnem ka mo luvuttadi leklen la ga sue di mi laaleng salai mo lenti ga so su ren. ⁸Melemu neni ga riki di uto Betilem mi levelinga xeretna, “Minat pas la mina puse avukat ti mo lamdak; la do mina vuse sa ren, miba tong axasep box ia min, kusu nenia bok aba vosiga i la ana lotu saparav i.”

⁹⁻¹⁰Melemu at na levelinga at Loorong Silok, diga vas kaxat, la at lavatpas atdi ro at langas diga ven manga mo lenti, no diga ven avot pam i ro at lenep laxangking it losu e. At loxonaleng diga ven i, lomomo atdi ga silok aleng. Mo lenti gam gomgo ridi se ga ru ro mavana ap mo loogu ne Iesu gak midi ren. ¹¹Diga beles ukeneng la diga ven lamdak eburu mi ne Maria, nenen. Diga xis tiktikbu mi lempatgulom atdi la diga milik tiding si ukopok la diga lotu saparav i. La diga suang lengkontonom atdi la diga lok letaba rin mi logol, laxadan somavak, la laxadan mi luunun silok. ¹²Melemu at nai Moroa ga vaase di xeneng at loromtobo do nemen gat ditamlong uto saparap ne Erodes. Kuren la diga vas bilong uto at lenep kangka atdi at lara langas petpes.

Josep Ga Oo Mi Ne Maria Du Lenan Uto Isip

¹³Se mo luvuttadi leklen diga vas kaxat pam, laangelo at Leeme Silok ne Moroa ga vot parap ne Josep keneng at loromtobo la ga lok, “Una xatu kaxat la una lok kaka lamdak eburu mi nenen la mina sixiro uto Isip, la mina nemen go se nenia aba tong i rinimi do mina on basinge mo lenep, mila ne Erodes mo naba reven pupuke ri lamdak kusu na sev amer i.”

¹⁴Kuren la ne Josep ga xatu kaxat, la ga lok kaka lamdak eburu mi nenen, la ap mo mene laxanimin diga vas kaxat basinge mo lemenemen Betilem la uto Isip. ¹⁵La diga nemen go se ne Erodes ga met. Nai lempanga ga vot kusu ri lox asorun levelinga at ne Moroa ga vaase asu i at lungusno leeme vapaase alii ren keretna,

‘Aga xup kaka lamdak tarak boro Isip.’

Ose 11:1

Diga Sev Amet Laxamdak Temes To Betilem

¹⁶Se ne Erodes ga long lenget ka i do luvuttadi leklen diga bala vukpux i, neni ga musak aleng. Neni ga raba linga limixin esep teren kusu dina sev amet laxamdak temes, lenmaares atdi ga epovo at legepura la maxopok, to Betilem la at levenmenemen bok gak lox auret, mumu levelinga neni gara ronga vam i boro at luvuttadi leklen, mumu laaleng lenti ga so suu. ¹⁷La mo levelinga, ne Moroa ga vaase i at lungusno at leeme vapaase alii ren ne Jeremia ga sorun, la ga lok keretna,

¹⁸‘Lerengteng at lara mo diga ronga i ro Rama, ni lanteng silok. Rakel mo ik saxaanu at laxamdak teren. La kopmen tara i epovo do na lox amenemen i mila laxamdak axap teren mo dira met pam.’

Jer 31:15

Josep Mi Ne Maria La Ne Iesu Digamlong Boro Isip

¹⁹Melemu at lanmet at ne Erodes, laangelo at Leeme Silok ne Moroa ga vot saparap ne Josep keneng at loromtobo to Isip. ²⁰La ga lok, “Una xatu kaxat, la una lok ka lamdak eburu mi nenen, la minamlong uto at lenep silok Israel; mila mo luvuttadi diga lok do dina sev amet nom lamdak, dira met pam.”

²¹Kuren la ne Josep ga xatu kaxat, la ga lok ka lamdak eburu mi nenen la digamlong uto Israel. ²²Se ne Josep ga ronga i do Akeleas mo ga lok ka lixitkis at ne temen, ne Erodes, ngan loorong silok boro Judaia, neni ga marat kusu ri nemen go. La laangelo ga raba linga manga i xeneng at loromtobo, kuren la digat pas uto at lenep silok Galili. ²³La diga nemen to Nasaret. La levelinga at lavaeme vapaase alii ga sorun. Mo levelinga ga lok keretna, ‘Diba so asen i do neni lanat me Nasaret.’

Jon Laradi Sep Susu Ga Vavang Ti Limixin

(Mk 1:1-8; Lu 2:1-18; Jo 1:19-28)

3 ¹Buaang levenmaares gara volo, la ne Jon, laradi sep susu ga ru asuvos to at lamatbin at lenep silok Judaia la ga ru ka lugugu teren. ²Neni ga vavang keretna, “Mina leeng basinge leveloklok kakapmek atnimi, mila langas ti Linintoo no vana at laxalibet mo nga ira auret!” ³Leeme vapaase alii ne Aisaia ga paase mumu ne Jon mi levelinga xeretna,

‘Lara mo ip kup to at lamatbin keretna, mina lox agagas li langas ti Leeme Silok; mina lox akmokso langas tin!’ *Ais 40:3*

⁴Jon ga siga labantamon diga lox i mi lengkabinim at lakamel; neni ga dodos i mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing. ⁵Limixin digat pot saparav i boro Jerusalem, boro at levenep axap Judaia, la boro bok at levenep saparap ladan sen Joridan kusu dinang tonga levelinga ren. ⁶Diga tong asu leveloklok kakapmek atdi la ne Jon ga sep susu nedi ro at ladan sen Joridan.

⁷At loxonaleng ne Jon ga ven buaang nedi lubung Parisi mi lubung Sadiusi diga vosiga i kusu neni na sep susu nedi, neni ga lok tidi xeretna, “Nemi laxamdak at lempasii. Kereva, mi lok do mina sixiro at lebelemamao at ne Moroa mo naba vot saparap limixin kakapmek?” ⁸Minak lok lempanga i nunuan kusu naba lox asuusu i do mira leeng basinge vam leveloklok kakapmek atnimi. ⁹Ketla mi guta nua i do miba sixiro at lebelemamao at ne Moroa mumu nga i do ne Abaram, neni lurubuno avolo atnimi. A tong i rinimi do Moroa i epovo na ba gili na laxanuat la dina vee ngan livipisik li avolo ri ne Abaram. ¹⁰Moraa mo i gagas kusu ri tara asi larauna ro xa at laraixe atdi. Larauna do kopmen dina pisik asu lempeven una nunuan, neni naba ra asi di la na lu arup midi ro at laxao.”

¹¹La ne Jon ga lok bok, “A sep susu nemi mi ladan kusu mina lox asuusu i do mira leeng pam basinge leveloklok kakapmek atnimi; ketla lara mo naba mumu bok ba rak. Neni naba sep susu nemi mi Loroonan Kaala la laxao ri limixin tongtonga xepe. Lololos teren i volo lololos tarak. Axo epovo kusu anap kip luvanga vatpas teren mila i silok aleng

tia.^a ¹²Neni naba rongga linga at limixin axap, la naba lok pes mun limixin avukat basinge limixin kapmek, kerekngan laradi loklok tatao laraamang i epes lenbolo avukat basinge lenbolo i gu; limixin avukat, neni naba lox arooro di uto vana at laxalibet i ngan lenbolo avukat; la limixin kapmek, neni naba lok li di at lemenemen songsongot, i ngan lenbolo gu di tara kutkut di.”

Jon Ga Sep Susu Ne Iesu

(Mk 1:9-11; Lu 3:21-22)

¹³Goxo lox abao la ne Iesu ga vas kaxat boro Galili la uto Joridan, la ga vot pasa ne Jon kusu neni na sep susu i. ¹⁴Ketla ne Jon ga lok tin, “Ixo epovo xusu una mu asu i na. I epovo do nenu una sep susu ia. La tila xa la ura sing ia do ana sep susu u?”

¹⁵Ketla ne Iesu ga vorang i rin keretna, “Una lok lavanga salai nia ara tong pam i, mila at na mun i langas la neda ata ba lox asorun lempanga sai ik mokso ne Moroa i vara i.” Kuren la ne Jon ga mu asu lodoxoma at ne Iesu.

¹⁶Melemu at ne Jon ga sep susu ne Iesu, neni ga vas urut basinge ladan la uto at lisigege dan. La ne Moroa ga suang laxalibet ti ne Iesu, la neni ga ven Loroonan at ne Moroa ga si boro vana la ukopok; ga ven ngan ta lamno la gasga ne Iesu. ¹⁷La laxaka at ne Moroa boro vana at laxalibet ga lok, “Nena ne Nuruk. Nia a balamu i la a momo aleng min.”

Satan Ga Lok Tong Ne Iesu

(Mk 1:12-13; Lu 4:1-13)

4 ¹Melemu Loroonan Kaala ga lam ka ne Iesu uto at lamatbin kusu ne Satan na lok tong i. ²Melemu at lumun an teren at lavanuet sangaun aleng la kanimin, neni ga roxo ba. ³Satan ga vot pasa i la ga lok tin, “Mo do nenu ne Nitna ne Moroa, una tong i ri na laxanuut la dina vee xongkide.”

⁴La ne Iesu ga vorang i rin keretna, “Lovoang Kaala i tong i do, ‘Laradi kopmen na rooro xusuk mun at loxongkide, ketla neni i rooro at levelinga axap at ne Moroa ik lok keneng at Lovoang Kaala.’” *Len 8:3*

⁵Melemu ne Satan ga lok ka ne Iesu uto at lemenemen kaala, Jerusalem la ga vaxaru li i ro vana at langkut at loogu laplavang, ⁶la ga lok tin, “Mo do nenu ne Nitna ne Moroa, una los si ukopok, mila Lovoang Kaala i tong i do,

‘Moroa naba tong i ri lubang angelo ren, la dinaba ranga tu ram mi levengikngan di, kusu tuat noxo sev asongot toxot at laxangkedek taram.’”

Sam 91:11-12

^a **3:11** Anai na lavapaase poovo ri lox asuusu i do ne Jon ga lox asu langsung loklok ngangao ren ti ne Iesu.

7Iesu ga lok tin keretna, “Lovoang Kaala i tong box i do;
 ‘Nemen uta lok li ne Moroa, Leeme Silok taram at loklok tong.” *Len 6:16*
 8Melemu ne Satan ga lok ka ne Iesu uto vana at lakaana ga nemen
 kasep pana la ga lox ase i mi laramenemen axap at na lavatbung
 menemen la lisisinang atdi. 9La ne Satan ga lok tin, “Ana axap lempanga
 aba raba u min mo do una xis tiktikbu mi luvatgulom taram de melamgo
 rak la una lotu saparav ia.” 10La ne Iesu ga lok tin, “Satan! Pas kaxat
 basinge ia. Lovoang Kaala i tong i do,
 ‘Una lotu saparap ne Moroa, Leeme Silok taram la neni xusuk mun una
 mumu asu i.” *Len 6:13*
 11La ne Satan ga on basinge i, la lubang angelo diga vot la diga lox
 alolos i.

Iesu Ga Vaxaru Kaxat Lugugu Ren To Galili

(*Mk 1:14-15; Lu 4:14-15*)

12Se ne Iesu ga rongga i do ne Jon mo diga lok li i at loxokoxo, neni ga
 vas kaxat bilong uto Galili. 13Neni goxo nemen to Nasaret, ketla gat pas
 la ga nemen to Kaprnaum, lemenemen gak lok saparap lavatdan kis
 Galili at lapdopdo at lunep kangka Sebulon la Napitali. 14Neni ga nemen
 to Kaprnaum kusu ri lox asorun levelinga ne Moroa ga vaase asu i at
 leeme vapaase alii ne Aisaia ga tong i do,

15‘At lenep kangka Sebulon, la lenep kangka Napitali, langas uto at
 laras mo ik lok, la neni bok lenep kangka saparap Joridan, la lenep silok
 Galili, na ik lok la limixin kopmen me Judaia di nemen go. 16La limixin
 at na levennep mo dik lok at lamain, dinaba ven langsung laxasep at
 ne Moroa. La tinedi limixin labaroonan atdi gara met pam laxasep naba
 soso.’ *Ais 9:1-2*

17Ga ru ka i ap mo levenaleng ne Iesu ga vavang ti limixin keretna,
 “Mina leeng basinge leveloklok kakapmek atnimi, mila langas ti Linintoo
 no vana at laxalibet mo nga ira auret!”

Iesu Ga Ro Xaka Lavanuet Luvuttadi Sepsep Mat

(*Mk 1:16-20; Lu 5:1-11*)

18At lara laaleng Iesu gat pas saparap lavatdan kis Galili, neni ga ven
 lueton; nedu luradi sepsep mat, Simon (laasen bok teren ne Pita) la neton
 laasen teren ne Endru; duga loloa mi laxatkat to at lavatdan kis. 19La ne
 Iesu ga lok tidu, “Ude numu, muna emu minia la nia anaba lox ase numu
 mi langas ti sat kaka limixin i ngan tai mo, nemu mu loloa ka lenmat.”
 20La soso mun duga on basinge laxatkat la duga emu mi ne Iesu.

21Neni ga vas mu manga loloxon la ga ven manga lara lueton petpes,
 Jems mi ne Jon, lunitna ne Sebedi. Dugak lok go at lese pang eburu mi ne
 temen du ne Sebedi. Digak lox agagas li levengkatkat atdi. La ne Iesu ga

ro xaka du. ²²La soso mun duga on basinge lese pang eburu mi ne temen du, la duga emu mi ne Iesu.

Iesu Ga Anasa Ga Vavang La Ga Lox Aroo Limixin

(Lu 6:17-19)

²³Iesu gat pas at lengkot axap Galili, ga anasa limixin mi levenanasa at ne Moroa ro xeneng at laraugu singising atdi; la ga vavang mi Lagale Lavavang mumu Linintoo, la gak lox aroo limixin basinge laksanakan anmeres axap. ²⁴Levelinga mumu ne Iesu ga epeseves keneng at lenep silok axap Siria. Kuren la limixin diga lok kaka nedi luvuttadi digak meres mi levenasen anmeres axap, la nedi bok diga suma levesongsongot silok, la nedi luvuttadi mi lubanggas ga suxuna di, la nedi diga ruuna lanmeres diga so asen i do lobomet, la nedi labantuxu atdi ga molo axap. La ne Iesu ga lox aroo nedi axap. ²⁵Buaang nedi limixin diga mumu asu i, nedi boro Galili la boro bok Dekapolis, la boro Jerusalem, la Judaia, la boro bok at lenep silok Perea.

Iesu Ga Vavang Ti Limixin To Vana At Lakaana

(Lu 6:20-23)

5 ¹Iesu ga ven nedi buaang limixin la ni ga urut upana at lakaana, ni ga xis kopok, la diga xis to melango ren, ²la neni ga ru ka i do na anasa di.

³Iesu ga lok keretna, “Luvukat mo ik lok tinedi dikleklen i do labaroonan atdi ik pakes ti ne Moroa, mila limixin erepmo dinaba vubeles at Linintoo no vana at laxalibet. ⁴Luvukat mo ik lok tinedi mo dik lok bukbulu mila laxakapmek i umsu at na lavatbung menemen, ketla ne Moroa naba lox amenemen nedi! ⁵Luvukat mo ik lok tinedi dik lox asi di, mila ne Moroa naba raba di mi lixitkis to xeneng at Linintoo ren. ⁶Luvukat mo ik lok tinedi di ngaongao ri loklok mokmokso, mila ne Moroa naba lox epovo mo lavavara atdi. ⁷Luvukat mo ik lok tinedi di lox asuusu lebelemumu ri limixin, mila ne Moroa naba lox asuusu lebelemumu rinedi. ⁸Luvukat mo ik lok tinedi lebelen nedi i dadat aleng mila dinaba ven ne Moroa. ⁹Luvukat mo ik lok tinedi, di lok lumulum kantubu atnedi dit kis munepen, Moroa naba so asen nedi do luvutnitna. ¹⁰Luvukat mo ik lok tinedi dip kip levesongsongot mumu loklok mokmokso at ne Moroa, mila diba ruuna ka lixitkis to xeneng at Linintoo no vana at laxalibet.

¹¹Luvukat mo ik lok tinemi do limixin diba vaase aksaksa rinimi la diba sev asongot nemi la diba paase mumu nemi mi levelinga xaxarang mila nemi limixin tarak. ¹²Do dina lox i xuren, mina momo la mina sosoro, mila langsung luunun miba ruuna ka i ro vana at laxalibet. Limixin kakapmek me gano diga lox asongot lavaeme vapaase alii no

diga rooro gano. La kerepmo limixin kakapmek diba lox asongot bok nimi.”

Limixin At Ne Iesu Di Lok Ngan Laxakures La Laxasep
(*Mk 9:50; Lu 14:34-35*)

¹³La ne Iesu ga lok bok tidi, “Nemi mi ngan laxakures ti limixin axap. Ket do lololos at laxakures na xap, kopmen bok ba tangas kusu naba so kakures manga. Kopmen bok ba na epovo xusu dina lok li i at teveluxa, kuren la diba lu xape mun min la limixin dibat pas abilinga i.

¹⁴Nemi mi ngan laxasep ti limixin at na lavatbung menemen. Lemenemen silok do it kis to mavana at lakaana kopmen na epovo do na lipe. ¹⁵Kopmen teta na sox aros lababao xusu na lok li i ro maxopok at lavatbaaket; ketla neni i lok li i ro at lenep kasep, kusu laxasep teren naba so epeseves tinedi axap go xeneng at loogu. ¹⁶La kerepmo bok laxasep atnemi na soso ro melamgo at limixin, kusu diba reven leveloklok nunuan mik lox i, la diba emi asu mi ne Moroa ne Temen nimi boro vana at laxalibet.”

Iesu Ga Paase Mi Lenavolo At Ne Moses

¹⁷La ne Iesu ga lok bok tidi, “Nemen gat mita nua i do aga vot kusu ana lok pes Lenavolo at ne Moses la levenanasa at lavaeme vapaase alii. A goxo vot kusu ana lok pes i, ketla aga vot ti lox epovo levelinga ren. ¹⁸A tong tuturun i rinimi. Laxalibet mi lavatbung menemen naba nemen at laxanaleng solo, la ap mo levenaleng kopmen tamangkot lixilik at levelinga keneng at Lenavolo naba xap asonao, i se ap mo laaleng levelinga ren naba sorun. ¹⁹Kuren la, do tara i los polo tamangkot lixilik at Lenavolo, la ia lox ase lentaba vetpes do dina los polo box i, neni naba lixilik tinotno at Linintoo no vana at laxalibet. Do tara i ronga res at Lenavolo, la ira lox ase bok lentaba vetpes kusu dina ronga res teren, neni naba silok to at Linintoo no vana at laxalibet. ²⁰A tong i rinimi. Mo do luruptuvuk atnimi noxo lox avukat ti luruptuvuk at luvuttadi loklox ase at Lenavolo la lubung Parisi, kopmen mi noxo vubeles at Linintoo, no vana at laxalibet.”

Iesu Ga Paase Mumu Lumukmusak

²¹La ne Iesu ga lok bok, “Miga ronga i do lavalabat atdik gano migomgo diga tong i do, ‘Nemen gat mitap sev amet tadi; la do nege i sev amet taradi, neni naba tu at lavapaase ro melamgo at laradi rongtonga linga.’ ²²Ketla mo nga ana tong i rinimi do, nege i musak mene neton, neni naba tu at lavapaase ro melamgo at laradi rongtonga linga; la do nege i tong i ri neton do ‘Nenu laradi pis,’ neni naba tu at lavapaase ro melamgo at lixitkis buru at lavanuti sangaun nedi loxongkulao silok at

limixin me Israel; la do nege i lok ti neton do ‘nenu lavanga baulang’, i auret do ne Moroa naba riki i uto xeneng at laxao at lemenemen songsongot.

²³Kuren la, do unat pas kusu una raba letaba ram ti ne Moroa ro at loxonin laplavang, la go ura doma su at netam i emusak minu, ²⁴una ke xepe be letaba ram go melamgo at loxonin laplavang; la unat pas avot be xusu una lok lumulum eburu mi netam; la melemu ba unamlong la una raba letaba ram ti ne Moroa.

²⁵Mo do tara na lok ka u ri lavapaase kusu na lok li lumumuat taram, una etangas nunuan min at langa kusu una lok lumulum eburu min. Do kopmen, neni naba lok ka u uto at laradi rongtonga linga, la laradi rongtonga linga naba lok li u at laradi rutu mu; la ni naba lok li u at loxokoxo. ²⁶Nia a tong tuturun i do ubak lok go, naba se rinotno do una un axap lempilas at nom lavapaase.”

Loklok Ti Elongka Mi Latkin At Lara Vetpes

²⁷La ne Iesu ga lok bok tidi, “Miga ronga vam lavapaase diga tong i do, ‘Nemen gat mita elongka mi lavakin at lentaba vetpes.’ ²⁸Ketla mo nga ana tong i rinimi, do tara na ven peves at tatkin petpes, i lok ngan neni ia longka vam mi nom latkin to xeneng at lebelen. ²⁹Do laxatli tino ram na lox u la una subu, una lik gogo su min. I lox avukat tu do una lok pes tenep at labantuxu ram; lavanga labantuxu axap taram nat pas ti lemenemen songsongot. ³⁰Mo do lakngam tino na lox u la una lok laxakapmek, una ra korop pes i la una lu min! I lox avukat tu do una lok pes lara lakngam; lavanga labantuxu axap taram nat pas ti lemenemen songsongot.”

Loklok Ti Ba Korop Epot

(Mt 19:9; Mk 10:11-12; Lu 16:18)

³¹La ne Iesu ga lok bok tidi, “Gano diga lox ase bok limixin keretna; taradi do na soxope latkin teren, ni na malagan taba i mi tevelinga axasep do neni mo na ba korop ta leepot atdu. ³²Ketla mo nga ana tong i rinimi do; mo do taradi na soxope latkin teren, ketla mo latkin goxo longka, mo laradi i lok latkin teren ira longka, mo do neni ira epot manga at taradi vetpes; la mo laradi bok i epot ka mo latkin, i longka vam mila ik midi eburu mi latkin at laradi vetpes.”

Lavapaase Mumu Loklok Ting Pangpe

³³La ne Iesu ga lok bok tidi, “Miga ronga bok pam i do diga tong i ri limixin gano do, ‘Nemen mita los polo lavangpangpe atnemi saparap ne Moroa, ketla mina lox epovo lempanga salai mira xaape vam min.’ ³⁴Ketla mo nga ana tong i rinimi do; nemen gat mita lok lavangpangpe

mi laasen at ne Moroa; nemen mita lox amuat tevelinga mi lavangpangpe atnimi la mina tong laxalibet, mila neni loxonin orong at ne Moroa.

³⁵La nemen mita lox amuat tevelinga atnimi mi lavangpangpe mi lavatbung menemen, mila neni loxot burubut at luxangkedek teren; la nemen mita lox amuat tevelinga mi lavangpangpe mi ne Jerusalem, mila neni lemenemen silok at ne Moroa. ³⁶Nemen mita lox amuat tevelinga vangpangpe mi lengkabinim at lempatlak atnimi mila nemi xa mixo epovo xusu miba lok tamang kabinim at lempatlak atnimi nan bun kopla na bibi. ³⁷Mina tong mene i do, 'I ruturun!' kopla 'Kopmen!' Toxolinga bok tara na tong i mavana at nai, i laa boro at ne Satan."

Loklok Ti Porang Amlong Leveloklok At Taradi

(Lu 6:29-30)

³⁸La ne Iesu ga lok bok tidi, "Miga ronga bok pam i diga tong i do, 'Mo do una lik su mi laxatli at tara, laxatli bok taram diba lik su min; la do una sep pit tasangsa at tara, lasangsa bok taram diba rit pir i.' ³⁹Ketla mo nga ana tong i rinimi do; nemen mita vorang amlong laxakapmek at tara do i lox i ru. Mo do tara na vasa lavapaales tino ram, una ke box i na vasa lavapaales piang taram. ⁴⁰La do tara na lok ka u ri lavapaase kusu na li levelinga mumuat mavana ram mumu lavanga singsiga ram, una ke raba box i mi lavanga singsiga silok taram. ⁴¹La do tara at limixin esep na pu soso u do una xip laknixip teren uto vaxalom, unap kiv i uto vaxalom axa. ⁴²Mo do tara na sing u mi tavanga, una raba i min; la mo do tara i vara i do na lok ka be tavanga ram kusu na gugu min, una siam taba i min."

Iesu Ga Anasa Limixin Mi Langas Ti Balamu Lavamunepen

(Lu 6:27-28, 32-36)

⁴³La ne Iesu ga lok bok tidi, "Miga ronga bok pam i, diga tong i do, 'Mina balamu larapen tangas atnimi, la mina lox angtungun tidi di munepen minimi.' ⁴⁴Ketla mo nga ana tong i rinimi do; mina balamu nedi di munepen minimi, la mina ngising tinedi dik lox asongot nimi, ⁴⁵kusu miba ravasu ngan luvutnitna rinotno at ne Temen nemi ne Moroa no vana at laxalibet, mila neni ga lok laxangking kusu na soso mavana at limixin kapmek i ngan mun tinedi bok limixin nunuan; la im taba bok lentakabu ridi dik lok lununuan la tidi bok dik lok laxakapmek. ⁴⁶Mo do nemi xa mi balamu xusuk mun nedi di balamu nemi, ne Moroa xopmen noxo raba nemi mi luunun. Limixin kapmek kerekngan luvuttadi loklok ka pilas bok dik lox i na. ⁴⁷La mo do mi paase momo mun ti luvutneton nemi, na loklok kopmen lavanga silok, mila luvuttadi dixo nuunu at ne Moroa di mumu asu box i na. ⁴⁸Kuren la mina nemen manmanton kerekngan mun ne Temen nemi no vana at laxalibet in manton."

Langas Ti Lok Tooro Limixin Banbalo

6 ¹La ne Iesu ga lok bok tidi, “Mina lok tatao alabat nemi, la nemen mita lok leveloklok nunuan to melamgo at limixin kusu limixin dina ven i la diba emi asu minimi. Mo do mina mu asu na loklok, mi noxo lok ka luunun tinimi boro at ne Temen nimi no vana at laxalibet.

²Kuren la, do mina raba tavanga ri taradi banbalo, nemen mita tong asu i na ro melamgo at limixin axap kerekngan lavapen aala, dik lox i ro xeneng at laraugu singising la to at larangas. Dik lox i xusu limixin diba emi asu midi. A tong tuturun i rinimi do luunun atdi dira lok ka axap pam i. ³Ket do mina lok tooro taradi banbalo, mina lox i at langas, nemi xusuk mun miklen i, la nedi dik lox auret nimi di noxoklen i. ⁴La kerepmo kopmen tara noxoklen i, ketla ne Temen nimi mene, mo i reven mo leveloklok ik lox alipe, naba raba nimi mi luunun.

Lisingising Saparap ne Moroa

(Lu 11:2-4)

⁵Do mina ngising, nemen mitak lok ngan luvuttadi vempen aala. Di vavara aleng i do dina tu la dina ngising to xeneng at laraugu lotu la to bok at larangas etang kusu limixin diba reven di. A tong tuturun i rinimi do dira lok ka axap pam luunun atdi. ⁶Ket do mina vara sing, mina beles uto at leventaugu atnimi la mina sat pe lempatban la mina sing ti ne Temen nimi, mixo epovo mina ven i. La ne Temen nimi i reven lempanga salai i nemen alipe at lemeren limixin, naba raba nimi mi luunun.

⁷Keneng at levesingising atnimi, nemen mita tong lengkolinga xopmen tempasuun teren, kerekngan lavamolon di mumu asu i; di doxoma i do ne Moroa mo naba rongga di mumu levesingising babaalom atdi. ⁸Nemen mita mu asu na loklok atdi mila ne Temen nimi ne Moroa iraklen avot pam levenai mik pakes tin, avot ti levesingising atnimi.

⁹Do mina sing, mina mu asu i xeretna,

‘Temen nama no vana at laxalibet, mana lok ngangao at laasen

taram. ¹⁰Linintoo ram na vot, lavavara ram limixin dina mu

asu i nade xopok at na lavatbung menemen, i ngan mun di mu

asu i ro vana at laxalibet. ¹¹Una raba nema mi leveluxa lingina.

¹²Doxoma xepe laxakapmek atnema, kerekngan nema ma doxoma

xepe laxakapmek atnedi di lox i rinema. ¹³Nemen uta lok li nema

ri leveloklok tong pen i lolos, ketla unang tanga amlong ka nema

basinge ne Satan.’

¹⁴Mo do mina doxoma xepe laxakapmek limixin di lox i rinimi, ne Temen nimi no vana at laxalibet naba doxoma xepe bok laxakapmek atnimi.

¹⁵Ket do mixo doxoma xepe laxakapmek at limixin petpes, ne Temen nimi ro vana at laxalibet noxo doxoma xepe laxakapmek atnimi.”

Iesu Ga Paase Mi Lumun An

¹⁶La ne Iesu ga lok bok tidi, “La do mina mun an, nemen gat mita ven bukbulu, i ngan lavapen aala di mumu asu i. Dit pas saasaa ro xantubu at limixin kusu limixin diba reven lemeren di do nedi mo di mun an. A tong tuturun i rinimi do luunun atdi, dira lok ka axap pam i. ¹⁷Do mina mun an, mina saba nunuan lempatlak atnimi mi ladan momonok at la olip la mina gos avukat lenmeren nimi, ¹⁸kusu nedi vetpes di noxoklen i do nemi mo mi mun an; ketla ne Temen nimi, kopmen mina epovo na ven i, neni xusuk mun baklen i. La ne Temen nimi, mo i reven lempanga salai i nemen alipe at lemeren limixin, naba raba nimi mi luunun.”

Iesu Ga Paase Mi Lapnovos To Vana At Laxalibet

(Lu 12:33-34)

¹⁹La ne Iesu ga lok bok tidi, “Nemen mita lili gat lapnovos tinemi nade xopok at laxangka, mila i epovo do laxanuvis naba an asonao mun i, la lamamao tas na long i la ba lok kapmek, la luvuttadi xipkip pilo dinaba das beles ukeneng at leventaugu atnimi la dina xip pilo ka i. ²⁰Ketla mina lok leveloklok nunuan ba lok ngan lapnovos tinimi ro vana at laxalibet, mo go laxanuvis mi lamamao tas noxo lok kapmex i, la luvuttadi xipkip pilo di noxo das beles ukeneng la dina xip pilo xaka i. ²¹Mina lox i xuren mila lebelen nimi nabaplivi mu mo lapnovos atnimi.”

Iesu Ga Paase Mi Laxasep At Labantuxu

(Lu 11:34-36)

²²La ne Iesu ga lok bok keretna, “Lengkatli atnimi i ngan laxasep ti lorooro atnimi. Dola lengkatli atnimi na reven pupuse ri lempanga avukat, lorooro atnimi ba umsu mi laxasep. ²³Ket do lengkatli atnimi na reven pupuse ri lempanga xapmek, lorooro atnimi naba umsu mi lamain. Kuren la, mo do laxasep kopmen nak lok keneng at lorooro atnimi, lamain i silok aleng bak lok keneng teren.

Limixin Kopmen Dina Epovo Na Gugu Ri Legepu Radi

(Lu 16:13; 12:22-31)

²⁴Kopmen tara i epovo na nemen ngan lasaxaruki at legepu radi; neni naba ke xepe lara la na balamu mo lara; neni naba ruturun ti lara, la ni na sok tixirixes mo lara. Kopmen na epovo do tara na nemen ngan lasaxaruki at ne Moroa la lebelen na ngaongao mu lempilas.

²⁵Kuren la a tong i rinimi do nemen gat mita bulu mu lempanga anan mi lengkadan mik pakes tin, koplal lempanga singsiga kusu ri labantuxu atnimi. Kereva, lempanga anan i silok ti lorooro la lempanga singsiga i silok ti labantuxu? ²⁶Mina ven lavapixa dip tava saasaa, dixotlotlo

tevenit panga, la dixo lili buru levempeven una do ik mukun, la dixo lili i ro at larapos atdi; ketla ne Temen nemi no vana at laxalibet i reven tatao nedi. La nemi mi silok aleng ti lavapixa. ²⁷Kopmen tara na epovo do na lox epasum toxot ti lorooro ren mo do neni na bulu mu i.

²⁸La tila mik bulu mu amisik lempanga singsiga? Mina ven be lempusuvus aaxa di susu; kopmen dina gugu la dinak sok etang lempanga singsiga ridi. ²⁹Ketla a tong i do loorong silok ne Solomon mi langangan lapnovos teren ga ruuna lempanga singsiga kopmen goxo nunuan aleng ti nom lempusuvus. ³⁰Ne Moroa xa ik paxasiga lempivilis aaxa, mo lempivilis i rooro mun lingina la kantamak manga ira mada si, la dira kotos i ro at laxao. Ketla neni naba lox angtang mu aleng nimi kusu na vaxasiga nimi. Lunuunu atnemi saparap ne Moroa i lixilik mun. ³¹Kuren la nemen mita bulu la mina lok do, 'Leveluxa ridik naba laa meva?' koplá 'Lengkadan tidik naba laa meva?' koplá 'Lempanga singsiga ridik naba laa meva?' ³²Nedi xopmen dina nuunu at ne Moroa dik bulu mu lempanga xeretna. Ne Temen nemi no vana at laxalibet ikleklen i do mik pakes ti na lempanga. ³³Ketla mavana at lempanga axap, mina lolos avot be ri puse ka Linintoo at ne Moroa la leveloklok mokmokso ren, la neni naba raba bok nemi mi nom lempanga mik pakes tin. ³⁴Kuren la nemen mita bulu mu mo lempanga ba ravasu at mo laaleng kantamak, mila levenainbulu mo bak lok ti laaleng kantamak. La levenainbulu at leges aleng i epovo ri mo laaleng."

Nemen Mita Ila Mumu Loklok At Tentaba Vetpes

(Lu 6:37-38, 41-42)

7 ¹La ne Iesu ga lok bok keretna, "Nemen mita ila mumu loklok at tentaba vetpes, kusu ne Moroa noxo ila mumu loklok atnemi. ²Mo do mina ila mumu loklok at tentaba vetpes, ne Moroa naba ila mumu nemi ap mo mun langas; la lumumuat mi lok li mavana atnedi lentaba vetpes, neni mun i nom ne Moroa naba raba nemi min."

³La ne Iesu ga paase poovo bok keretna, "Nemen mita reven ti nom levendon i nemen at laxatli at neton nemi, la nemi xa kopmen mina long lenget ka levengkonuna ik lok pe lengkatli atnemi. ⁴Miba tong i ri neton nemi keretna, 'Netak, una mulus tia kusu ana lok pes nom levendon at laxatli ram,' ketla nemi xa xopmen mina ven kibis levengkonuna ik lok pe lengkatli atnemi getgesara. ⁵Nemi lavapen aala. Mina lok pes avot nom levengkonuna ik lok pe lengkatli atnemi, la melemu ba miba ven avukat ba i xusu mina lok pes ba levendon no at laxatli at neton nemi.

⁶Nemen gat mita raba lubangman mi lempanga i xaala. Mo do mina lox i xuren, dinaba rem gili mu nemi la diba at koxorop nemi. La nemen mita lu raba lababo mi leven peal atnemi; mo do mina lox i xuren, diba but axangka i mi lengkangkedek atdi."

Moroa Im Taba Lempanga Nunuan Tinedi Di Ngising Parav I
(Lu 11:9-13)

⁷La ne Iesu ga lok bok keretna, “Mina ngising, la miba ruuna xaka i; mina puse, la miba vuse xaka i; minap dipdi, la lumusaragu naba rem suang tinimi; ⁸mila do mina ngising ne Moroa, miba lok kaka i; la do nemi mina puse, minaba vuse ka i; la lumusaragu naba rem suang tinemi mi dipdi.

⁹Kereva, i epovo do ne temen tamdak na raba ne nitna mi toxonuat, modo neni na sing ti toxongkide? ¹⁰Kopla i epovo kusu neni na raba i mi tisii mo do neni na sing ti temat? ¹¹Keke i do nemi limixin bilinga, ketla mikleklen i do mim taba laxamdak mi laxaalik atnemi mi lempanga nunuan. La kerepmo i epovo rinotno do ne Temen nemi ro vana at laxalibet naba lok momo aleng ti raba bok lempanga nunuan tinedi di ngising tin. ¹²Leveloklok axap mina lox i ri lentaba vetpes, na lok ngan mun leveloklok mi vara i do dina lox i rinimi. Anai ni lavasuun tinotno at Lenavolo at ne Moses la levelinga at lavaeme vapaase alii.”

Lumusaragu I Veleot
(Lu 13:24)

¹³La ne Iesu ga lok bok, “Mina beles keneng at lumusaragu i veleot kusu ri lok ka lorooro, mila lumusaragu uto at lemenemen songsongot i repalas la langas ugo at lemenemen songsongot kopmen na lolos, la buaang nedii limixin di pubeles teren. ¹⁴Lumusaragu uto at lorooro ni i veleot mun la langas tin i lolos aleng tino la ixo buaang nedii luvuttadi di pubeles teren.”

Luuna Mi Lempeven Teren
(Lu 6:43-44)

¹⁵La ne Iesu ga lok bok, “Mina lok tatao nemi mumu loklok atnedi lavaeme vapaase alii xaxarang; di vosiga nemi mi levelinga xaxarang la diba tong i do nedii luvuttadi at ne Moroa. Ketla di lok ngan lempatman atat, di siga lempanga singsiga diga lox i mi lengkabinim at levesipsip kusu dina xarang limixin. ¹⁶Miba ven kibis nedii mi levempipisik at lorooro atnedi. Ixo epovo do mina dik ka tempeven una nunuan boro at taban gagas, la ixo epovo do miba dik ka tempeven una at looxo boro at tabaniles. ¹⁷La kerepmo luuna nunuan i pisik lempeven una nunuan, ketla luuna mamao i pisik lempeven una mamao. ¹⁸Luuna nunuan ixo epovo do na visik tempeven una mamao, la luuna mamao ixo epovo do na visik tempeven una nunuan. ¹⁹Larauna axap do dixo pisik nunuan, di tara korop asi nedii la di lulu arup midii ro at laxao. ²⁰Kuren la miba ven kisip lavaeme vapaase alii xaxarang mi levempipisik at lorooro atdi.”

Laaleng Ete
(Lu 13:25-27)

²¹La ne Iesu ga lok bok tidi, “Limixin diba tong ia do Leeme Silok, Leeme Silok; ketla kopmen nedi axap diba beles at Linintoo no vana at laxalibet; nedi xusuk mun di mumu asu lavavara at ne Tamak, diba vubeles teren. ²²At laaleng ete buaang nedi limixin diba lok tia, ‘Leeme Silok, Leeme Silok; maga paase alii ri limixin mi laasen taram, la maga riki asu lubanggas basinge limixin mi laasen taram, la maga lok buaang laxampanga sangsangu mi laasen taram.’ ²³Melemu aba vaase ridi xeretna, ‘Nia xopmen tinotno anaklen nimi. Uto nimi basinge ia, nemi limixin kapmek.”

Luradi Xipkip Gu
(Lu 6:47-49)

²⁴La ne Iesu ga lok bok tidi, “Kuren la, do tara i ronga na lempapaase rak la i ronga res mu i, neni i lok ngan laradi leklen ga xip loogu ren la ga sev asi lemet ukopok tinotno la ga lok nom loogu ren pana at laxanuat. ²⁵Larakabu ga vot, la ladanut ga sen, la lamanman gat mas lolos mo loogu, ketla loogu goxo rem sup, mila ni gasbo i mi laxanuat. ²⁶Ket do lara i ronga na levelinga rak la kopmen ni na mu asu i, neni i lok ngan laradi tangtangu, ga xip loogu ren la gasbo pe i mi laxapulang. ²⁷Larakabu ga vot, la ladanut ga sen at laradan, la lamanman ga vot lolos at nom loogu, la loogu ga rem sup la ga rem utut axap.”

Levenanasa At Ne Iesu Ga Mumuat

²⁸Se ne Iesu ga vaase axap na lempapaase, buaang nedi limixin diga sangu aleng at levenanasa ren, ²⁹mila neni ga anasa di, la levelinga ren ga mumuat, neni xopmen goxo anasa ngan luvuttadi loklox ase at Lenavolo.

Iesu Ga Lox Aroo Laradi
(Mk 1:40-45; Lu 5:12-16)

8 ¹Iesu ga si boro vana at lakaana la buaang limixin diga emu min. ²La lara laradi ga meres mi lanmeres gu ga vot posiga ne Iesu la ga xis tiktikbu mi luvatgulom teren la ga sing i, “Leeme Silok. Mo do u vara i, una lox aroo ia.”

³Iesu ga song su mi lekngen la ga long tu ren, la ga lok tin, “A vara i. Lanmeres taram na xap ta.” La soso mun mo lanmeres ga xap basinge mo laradi. ⁴La ne Iesu ga lok tin, “Nemen uta tong box i na ri tara, ketla unat pas uto at lamaasa, la neni na ven mumu u; melemu una lok laramtaba ram ti ne Moroa ngan ne Moses ga tong i, kusu ri lox asuusu i ri limixin axap do nenu mo ura lox avukat ta.”

Iesu Ga Lox Aroo Lasaxaruki At Laasesep Boro Rom

(Lu 7:1-10)

⁵Iesu ga vubeles at lemenemen Kaprenaum, la lara laasesep at limixin esep boro Rom ga vot posiga i la ga sing i ri loklok tooro xeretna, ⁶“Leeme Silok. Lasaxaruki rak no ik midi ro at loogu rak. Lengkot axap teren i molo la ing songot aleng.”

⁷La ne Iesu ga lok tin, “Nia abat pas ti lox aroo i.” ⁸La mo laasesep ga lok tin keretna, “Leeme Silok, nenu leeme silok la ixo lox avukat do una beles at loogu rak. Ketla una tong mun i la lasaxaruki rak naba lox avukat. ⁹Nenia aklen i do nenu u epovo ri lox i na mila nenia bok a nemen maxopok at lentaba amgomgo rak la lentaba bok di nemen maxopok tarak. La mo do a lok ti tara, ‘Unat pas,’ neni bat pas. Do a lok ti tara, ‘Ude u,’ neni bat pas saparav ia; la do a lok ti lasaxaruki rak, ‘Una lox i na,’ la neni naba lox i.” ¹⁰Se ne Iesu ga ronga i na, ni ga sangu aleng la ga lok tinedi diga emu min, “Nia a tong tuturun i. Keneng at lengkot axap Israel, a goxo long lenget ka tara, lunuunu ren i silok ngan i na. ¹¹Nia a tong i rinimi do buaang limixin diba laa boro at lengkot axap at na lavatbung menemen la diba xis kopok eburu mi ne Abaram, Aisak la ne Jakop at laanan tarak to xeneng at Linintoo no vana at laxalibet. ¹²Ketla limixin me Judaia, avot be diga nemen ngan lavaanat at Linintoo, Moroa naba lu asu midi uto at lamain bonot la mo go dibang teng aleng la diba rungur ivivilis.” ¹³La ne Iesu ga lok ti mo laasesep, “Unamlong uto xolonu ram; lasaxaruki ram ba lox avukat kerekngan lunuunu ram.” La lasaxaruki ren ga lox avukat ap mo mun loxonaleng.

Iesu Ga Lox Aroo Buaang Limixin

(Mk 1:29-34; Lu 4:38-41)

¹⁴Iesu ga rupot to at loogu at ne Pita, la ni ga ven luvutulom at ne Pita gak midi at loora, ga meres mi liplivi. ¹⁵Neni ga long tu at lekngen la liplivi ga on basinge i, la ni ga xatu kaxat upana la ga lox agagas leveluxa ridi.

¹⁶Ga ukantinao, limixin diga lam ka larapen tangas atdi uto at ne Iesu, nedi lubunggas ga suxuna di. La ne Iesu ga paase lengkolinga, kuren la ni ga riki asu lubunggas basinge di. La neni ga lox aroo limixin axap digak meres. ¹⁷Kerepmo ne Iesu ga lox asorun levelinga at leeme vapaase alii ne Aisaia, i lok keretna;

‘Neni ga lox alolos nama basinge levenainmolo la ga lox aroo nama basinge levenanmeres.’

Ais 53:4

Loklok Atnedi Di Mumu Asu Ne Iesu

(Lu 9:57-62)

¹⁸Se ne Iesu ga ven buaang limixin digak lok saparav i, ni ga tong i ri luvuttadi loklok ka anasa ren do dina sen polo lavatdan kis uto at lenep

meo. ¹⁹La lara laradi loklox ase at Lenavolo ga vosiga i la ga lok tin, “Leeme loklox ase, nia aba emu minu uto at lengkot axap ut pas uve.”

²⁰La ne Iesu ga lok tin, “Lubungman sio di ruuna lengkot mikmidi atdi, la lavapixa di ruuna levempotpos atdi, ketla nenia, Laradi Mevana, axo ruuna temenemen kusu ria rik midi la na lok mamana ren.” ²¹La lara laradi vetpes, lara at luvuttadi loklok ka anasa ren ga lok tin, “Leeme Silok. Una ke xepe be ia, kusu anat pas la anak mit ne tamak.” ²²Ketla ne Iesu ga lok tin, “Una mumu asu ia, la una ke laxampanga met dinak mikmit luvuttadi met.”

Iesu Ga Lox Amila Lamanman

(Mk 4:35-41; Lu 8:22-25)

²³La ne Iesu ga los kas at lese pang eburu mi luvuttadi loklok ka anasa ren la diga sen kaxat. ²⁴La soso mun langsgangan lamanman ga mas lolos mo lavatdan kis, la ga auret do lese pang gita dong si. Ketla ne Iesu mo ga unga. ²⁵La luvuttadi loklok ka anasa diga vosiga ne Iesu la diga lox aus i la diga lok, “Leeme Silok, una lox aroo dik, ata seeve nga na.”

²⁶La ni ga lok tidi, “Kereva, kopmen tunuunu atnimi? Mi marat tila?” La ni ga xatu kaxat la ga vaase lolos pe lamanman mi lavatdan kis la duga lox atnaasan la langsgangan lenmila ga men ta.

²⁷La mo luvuttadi diga sangu aleng la diga lok, “Laradi salai na? I vaase sok lamanman mi lavatdan kis la dira rongga res teren.”

Iesu Ga Riki Asu Lubunggas Basinge Legepu Radi

(Mk 5:1-20; Lu 8:26-39)

²⁸Se ne Iesu eburu mi luvuttadi loklok ka anasa ren diga vot to at lenep meo, diga oso ro at lenep silok Gadarin, la legepu radi duga laa boro at larabuang, limixin me go digak mikmit labarongan e, lubunggas ga nemen atdu. La duga ekip tangarang mi ne Iesu. Nedu luradi sepsep la limixin ap mo lenep silok di goxot pas ti mo lenep. ²⁹La duga xup ti ne Iesu xeretna, “Nitna ne Moroa. Lavanga salai u vara na lox i rinama? Kereva, u vot de xusu una lox asongot nama avot ti laaleng ete?”

³⁰Buaang laxanbo mo diga nemen to vaxalom lixilik, diga anan. ³¹La lubunggas diga sing ne Iesu, “Do una riki asu nama basinge na luradi, una riki abeles nama ri nom laxanbo.”

³²La ni ga lok tidi, “Mina vas su uto.” La diga sixisu ap mo luradi la diga vubeles ap mo laxanbo la nedi axap nom laxanbo diga sixisi at lakaana la diga los tup ukopok at lavatdan kis la diga xong axap. ³³La nedi mo digak lok tatao laxanbo, diga ven i na; la diga sixit kaxat uto ap mo lemenemen. La diga tong na lavanga ri mo limixin, la diga tong bok mo lavanga ne Iesu ga lox i ri mo luradi. ³⁴La limixin axap ap mo lemenemen diga vas su la diga vosiga ne Iesu. Se diga ven i, diga sing i do ni na on basinge mo lenep silok atdi.

Iesu Ga Lox Aroo Laradi Labantuxu Ren Ga Molo Axap

(Mk 2:1-12; Lu 5:17-26)

9 ¹La ne Iesu mi luvuttadi loklok ka anasa ren diga los kas at lese pang la diga sen kaxat la diga rupot to at lemenemen at ne Iesu. ²Lentaba luvuttadi digap kip lara laradi mi loora, labantuxu ren ga molo axap la diga vosiga ne Iesu. Se ne Iesu ga ven kibis lunuunu atdi, ni ga lok ti mo laradi mekmeres keretna, “Nuruk, una lolos. Leveloklok kakapmek axap taram, a doxoma xepe i.”

³Lentaba luvuttadi loklox ase at Lenavolo diga ronga i na la diga epaase xantubu atdi xeretna, “Na laradi i paase vupu ri ne Moroa.”

⁴Iesu gaklen levendoxoma atdi la ga lok tidi xeretna, “Tila levendoxoma atnimi i umsu mi laxapmek mumu na lavanga? ⁵Ua levelinga kopmen na lolos ti tong i; leveloklok kakapmek taram ara doxoma xepe vam i, kopla ana tong i do, katu kaxat la unat pas? ⁶Ketla a vara minaklen i do nenia, Laradi Mevana, a ruuna lololos at na lavatbung menemen kusu ri doxoma xepe leveloklok kakapmek.” La ne Iesu ga vaase bok ti mo laradi xeretna, “A tong i ru, una xatu upana la una xip kaka loora ram la una vas kaxat uto xolonu.” ⁷La mo laradi ga xatu kaxat la gat pas uto xolonu. ⁸Se mo limixin axap diga ven i na, diga lingun, la diga emi asu mi ne Moroa, mo ga raba lololos kerepmo ti limixin.

Iesu Ga Ro Ka Ne Levi

(Mk 2:13-17; Lu 5:27-32)

⁹Iesu ga vas kaxat basinge mo lenep la neni ga ven lara laradi, laasen teren ne Metiu, mo gat kis at loogu xekepe pilas. La ne Iesu ga lok tin, “Una mumu asu ia.” La ne Metiu ga xatu upana la ga mumu asu i.

¹⁰La ne Iesu gat kis at laanan to xeneng at loogu at ne Metiu la buaang atnedi luvuttadi loklok ka pilas, la lentaba limixin kapmek bok diga rupot la diga anan eburu mi ne Iesu mi luvuttadi loklok ka anasa ren. ¹¹Se lubung Parisi diga ven i na, diga sue luvuttadi loklok ka anasa ren keretna, “Tila leeme loklox ase atnimi i anan eburu mi limixin loklok ka pilas mi limixin kapmek?”

¹²Iesu ga ronga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dik meres. ¹³La minat pas la minaklen ka lavasuun at na levelinga keneng at Lovoang Kaala i lok keretna,

‘Nia axopara levelaplavang, a vara i xusu mina lox asuusu lebelemumu.’ Ose 6:6 Nia aga rupot kusu ri ro xaka limixin bilinga kusu dina leeng, la kopmen nia a goxo rupot kusu rinedi limixin mokmokso.”

Iesu Ga Paase Mumu Loklok At Lumun An

(Mk 2:8-22; Lu 5:33-39)

¹⁴Luvuttadi loklok ka anasa at ne Jon, laradi sep susu, diga vosiga ne Iesu la diga sue i, “Nema mi lubung Parisi ma mun anan amisik, ketla luvuttadi loklok ka anasa ram kopmen dina mun an. Ua lavasuun teren?”

¹⁵Iesu ga vorang i ridi mi lavapaase poovo xeretna, “At loklox anarong at leepot, lentaba at laradi epot di noxo bulu mila laradi epot move ik lox eburu midi. Ketla laaleng mo naba rupot la limixin petpes diba lam ka laradi epot basinge lentaba ren, la dina mun anan ba ap mo levenaleng.”

Lempapaase Poovo Mumu Levenanasa Maxat At Ne Iesu

¹⁶La ne Iesu ga vaase bok tidi mi lavapaase poovo xeretna, “Kopmen teta na balais ka loxontamon maxat kusu na sok gatgat pe lamamara at labantamon maut min; mo do neni na lox i xuren, labantamon maxat ira lok kapmek pam la kopmen na epovo bok ba kusu na lok tavanga min; la nom loxontamon maxat noxo epovo xusu na lok pe avukat lamamara at loxontamon maut.”

¹⁷La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu ba remdas la laxadan vaen naba soli su axap, la labantuxu maut naba lok kapmek. Laxadan vaen maxat mina soli li i at labantuxu maxat, la kopmen tempanga ba lok kapmek.”

Iesu Ga Lox Aroo Loolik At Laradi Gomgo

(Mk 5:21-43; Lu 8:40-56)

¹⁸Ap mo mun loxonaleng ne Iesu ga tong i na, lara laradi ga vot, neni lara atnedi luvuttadi amgomgo at loogu singising ap mo lemenemen. Ni ga xis tiktikbu mi luvatgulom teren saparap luxangkedek at ne Iesu la ga lok tin, “Ana vam, loolik tarak i met. Ketla una ven be i la una long tu ren la ni naba roo.” ¹⁹La ne Iesu ga xatu kaxat la ga emu min, la luvuttadi loklok ka anasa bok teren.

²⁰La lara latkin mo ga nemen; lanmeres gaaling gak lok teren at levenaleng amisik, ni ga ruuna nom lanmeres at lasangaun mi legepu maares; ni ga vas mu ne Iesu ro melemu la ga long tu at lungusungus at lavanga singsiga ren. ²¹Ni ga doma i do neni na long tu at lavanga singsiga ren, neni ba lox avukat.

²²La ne Iesu ga rem gili la ga ven kora ka i. La ga lok tin, “Latkin. Una lolos. Lunuunu ram ira lox avukat pam u.” La ap mo mun loxonaleng mo latkin ga lox avukat ta.

²³Se ne Iesu ga vubeles at loogu ap mo laradi gomgo, ni ga ven buang limixin, lentaba diga mas lengkaatu atdi, la lentaba digang teng la diga saxaanu mumu mo loolik. ²⁴Ni ga lok tidi, “Uto nimi. Loolik kopmen na met, neni i unga mun.” Ketla diga lok sese i. ²⁵La diga vas su ukamang, la ne Iesu ga vubeles la ga ranga aru lekngen loolik la ga lox axatu kaxar i. ²⁶La levelinga mumu i na ga epeseves at lengkot axap ap mo lenep silok.

Iesu Ga Lox Aroo Luradi Levengkatli Atdu Ga Main

²⁷La ne Iesu ga vas kaxat la at lavatpas teren, legepu radi levengkatli atdu ga main, duga mumu i la duga toro keretna, “Livisik li at ne Devit. Una balamu nama’.”

²⁸La ne Iesu ga vubeles at lara loogu la mo luradi ga vot pasa i, la ni ga lok tidu xeretna, “Kereva, mu nuunu do nenia a epovo na lox avukat levengkatli atnumu?”

Duga vorang i rin keretna, “Laaba, Leeme Silok.”

²⁹La ne Iesu ga long tu at levengkatli atdu la ga lok tidu, “Nemu mu nuunu rak la kerepmo levengkatli atnumu na lox avukat.” ³⁰La levengkatli atdu ga lox avukat ta. La ne Iesu ga paase lolos tidu xeretna, “Nemen muta tong i na ri teta.” ³¹Ketla duga vas kaxat basinge mo loogu la duga tong i ri limixin at lengkot axap ap mo lenep silok.

Iesu Ga Riki Asu Lagas Kapmek Basinge Laradi

³²Melemu atnedu duga on basinge ne Iesu, limixin diga lam ka lara laradi uto saparap ne Iesu. Lagas kapmek ga nemen ap mo laradi la goxo epovo na paase. ³³Se ne Iesu ga riki asu mo lagas, mo laradi ga epovo ba xusu na paase. Mo limixin diga sangu la diga lok, “Kopmen tempanga kerepmo maga ven i nade Israel.”

³⁴Ketla lubang Parisi diga lok keretna, “Neni i riki asu lubanggas mi lololos at laradi gomgo at lubanggas.”

Limixin Gugu At Ne Moroa Kopmen Dina Buaang

³⁵Iesu gat pas kantubu at levenmenemen silok axap, eburu mi lengkonmenemen kakalik, ga anasa limixin to at laraugu singising atdi la ga vavang mi Lagale Lavavang mumu Linintoo at ne Moroa. La ne Iesu ga lox avukat limixin basinge levenasen anmeres axap. ³⁶Kuren la ne Iesu ga ven nedi buaang limixin la ga balamu di mila diga baava mi levenaknixip la digak pakes aleng, kerekngan levesipsip kopmen taradi loklok tatao atdi. ³⁷La ne Iesu ga lok ti luvuttadi loklok ka anasa ren, “Laraamang mo ira mukun pam, ketla ixo buaang nedi luvuttadi kusu ri lox abeles leveluxa ukeneng at laraugu. ³⁸Kuren la mina sing ti laradi loklok tatao at laraamang kusu neni naba riki asu tuvuttadi kusu ri lox abeles leveluxa.”

Iesu Ga Riki Asu Lasangaun Mi Legepura

(Mk 3:13-19; Lu 6:12-16)

10 ¹Iesu ga xup buru ka nedi lasangaun legepura luvuttadi loklok ka anasa ren saparav i la ni ga raba di mi lololos kusu dina riki asu lubanggas basinge limixin la dina lox aroo luvuttadi mi levenanmeres ga lox abinis labantuxu atdi, la levenasen anmeres bok basinge limixin.

²Ni levenasen atnedi na lasangaun legepura luvuttadi vavang; avot tinotno ne Simon (laasen bok teren ne Pita), la ne Endru neni neton; la ne Jems eburu mi neton laasen teren ne Jon, nedu lumdak at ne Sebedi;

³Pilip la ne Batolomiu; Tomas la ne Metiu, neni laradi loklok ka pilas;

Jems, nitna ne Alpias, la ne Tadius; ⁴Simon, neni at libinam tadi me Selot, la ne Judas Iskariot, neni mo laradi ga song araba ne Iesu ri limixin bilinga.

Iesu Ga Vaase Asu Lempanga Luvuttadi Vavang Dinaba Lox I
(*Mk 6:7-13; Lu 9:1-6*)

⁵Iesu ga riki asu na lasangaun legepura luvuttadi mi levelinga xeretna; “Nemen gat nimi gutat pas uto at tenep at limixin kopmen di me Judaia kopla uto at temenemen at leme Samaria. ⁶Mina vosiga mene limixin boro Israel, di lok ngan laxasipsip di soogong. ⁷At lavatpas atnimi, mina vavang ti limixin do Linintoo boro vana at laxalibet monga ira auret! ⁸Mina lox avukat levenanmeres, la mina lox arooro amlong luvuttadi met, la mina lox avukat nedi levenanmeres gu ik lok atdi, la mina riki asu lubunggas basinge limixin. Nia ara raba gamasa vam nimi mi lololos ti lok na leven gugu; kuren la mina gugu min la nemen gat mita ro unun tin. ⁹Nemen gat mita xip ka tempilas eburu minimi. ¹⁰Nemen mita xip kaka teventat eburu minimi at lavatpas atnimi, kopla tavanga singsiga ri vetara xun; kopla tuvanga vatpas, kopla takdak tit pas, mila laradi gugu at ne Moroa i epovo na lok ka lempanga anan tin boro at limixin neni i vavang tidi.”

¹¹La ne Iesu ga lok bok tidi xeretna, “La do mina vas pot at temenemen silok kopla temenemen lixilik, mina puse ri taradi avukat la mina nemen eburu min se mina vas kaxat basinge mo lemenemen. ¹²Do mina vubeles ukeneng at tara toogu, mina lok tidi xeretna, ‘Limila nak lox eburu minimi.’ ¹³Do limixin ap mo loogu di siam ka nimi, mina ke limila atnimi nak lox eburu midi. Ket do dixo siam ka nimi, mina ke limila namlong mu nimi. ¹⁴La do tara ixo siam ka nimi kusu na ronga ka levelinga atnimi, mina semla xepe laxakup basinge lengkangkedek atnimi at loxonaleng mina vas kaxat basinge mo loogu kopla mo lemenemen silok.^b ¹⁵A tong tuturun i rinimi do at laaleng ete, ne Moroa naba lox asuusu lumumuat ti limixin boro Sodom la Gomora, ketla neni naba lox asuusu lumumuat silok tinotno ri limixin ap mo lemenemen tongtonga xepe!”

Levenmumuat La Levesongsongot Naba Vot
(*Mk 13:9-13; Lu 21:12-17*)

¹⁶La ne Iesu ga lok tidi, “Mina ronga i na! Ana riki aonon nimi ngan laxasipsip kantubu at laxanman sio. Mina lok tatao avukat nimi i ngan lisii neni ikleklen solo la minak lox atnaasan ngan levenamno. ¹⁷Mina

^b **10:14** Na loklok i lox asuusu i do ne Moroa naba raba lumumuat ti limixin ap mo lemenemen.

reven avukat, mila lentaba luvuttadi mo diba ranga alis nimi la dina lok ka nimi ri lavapaase; la dibak pixis nimi ro xeneng at laraugu singising atdi. ¹⁸Diba vaxaru nimi ro melamgo at luvuttadi amgomgo la to bok melamgo at lavaorong silok mila mi mumu asu ia, la miba tong asu Lagale Lavavang tidi la ti limixin kopmen di me Judaia. ¹⁹Do dina lok li nimi at lavapaase, nemen gat mita bulu do miba tong lavanga salai la mina vaase xereva. Se at loxonaleng na vot tinimi do ri vaase, ne Moroa axa naba raba nimi mi levelinga kusu mina vaase asu i, ²⁰mila levelinga mina vaase i kopmen atnimi axa; ketla Loroonan Kaala at ne Moroa, ne Temen nimi naba paase asusu i at levenngusno atnimi.

²¹Lara koeton axa diba etaba tuntuna mi luvutneton di ri lanmet; la luvuttemen laxamdak diba etaba tuntuna mi laxamdak la laxaalik atdi; la laxamdak mi laxaalik dibang tonga xepe levelinga at luvuttemen di mi luvutnen di la diba lok li di at lanmet. ²²Limixin axap diba belemamao nimi mila mi mumu asu ia. Ketla lara do i tu lolos keneng at levesongsongot ise at laxavaxap ap mo levenaleng, ne Moroa naba lox arooro i. ²³Do dina lox asongot nimi at tara temenemen, mina sixiro uto at tara temenemen petpes. A tong tuturun i rinimi do nenia, Laradi Mevana, anaba vot la kovisi mi noxo lok axap lugugu atnimi ap mo laramenemen at lenep silok Israel.

²⁴Kopmen tamdak loklox ase na silok ti leeme loklox ase ren; koplata saxaruki na silok ti laradi gomgo ren. ²⁵I epovo do lamdak loklox ase na ngan mun leeme loklox ase ren; la lasaxaruki na ngan mun laradi gomgo ren. Mo do limixin dina so asen laamgomgo at lixitkis koetemen mi ne Belsebul, diba so asen gilipu levenasen atdi axap di nemen keneng ap mo loogu mi levenasen kapmek!”

Nemen Mita Marat At Limixin

(Lu 12:2-7)

²⁶La ne Iesu ga lok bok keretna, “Nemen gat mita marat at limixin di munepen minimi; mila levenai mo nga di se bopbop li i, naba men at lasaxaven, la lempanga sai mo dik lox alipe, naba ravasu at lasaxaven la limixin axap dibaklen i at laaleng ete. ²⁷Levenai nia a paase xusuk nimi min at lamain, mina vaase i at lemeren limixin axap. La levenai miga ronga i, aga vaase nemnem i rinimi, mina tu ro vana at lempatlak gu la mina tong asu i ri limixin axap. ²⁸Nemen mita marat atnedi dip sev amet labantuxu, ketla kopmen dina epovo ri sev amet loroonan; kusuk mun minak marat at ne Moroa, neni i ruuna lolos kusu ri sev amet labantuxu la na riki loroonan at laradi uto at lemenemen songsongot. ²⁹I epovo do mina un kaka tegepu natdik mi tegesuxuven peni mene; ketla kopmen tara atdu noxo met gamasa la ne Moroa xopmen naklen i. ³⁰La tinimi, lengkabinim at lempatlak atnimi ne Moroa iraklen axap pam i. ³¹Kuren

la nemen gat nemi mita marat; nemi mi nunuan aleng at lemeren ne Moroa!”

³²La ne Iesu ga lok bok tidi, “Nege do i tong asu i do neni laradi mumu asu ia, ro melango at limixin axap; at laaleng ete, anaba tong asu bok neni ro melango at lemeren ne Moroa to vana at laxalibet do neni na vaxaru limixin at leete. ³³Ket do tara na sok tixirixes ia ro melango at limixin axap, aba sok tixirixes kepe box i ro melango at ne Tamak to vana at laxalibet.”

Kopmen Luruburu, Ketla Leepeseves

(Lu 12:51-53; 14:26-27)

³⁴La ne Iesu ga lok bok tidi, “Nemen mita nua i do nia aga vot kusu ana raba limila ri na lavatbung menemen; kopmen, a goxo vot kusu ana raba limila; ketla aga vot kusu ri lox aepeseves limixin. ³⁵Aga vot kusu ana lok, ‘Laxamdak temes dina munepen mi luvuttemen di, la laxaalik diba munepen mi luvutnen di. La loxoenenen diba emunepen eburu. ³⁶La laradi naba munepen tinotno minedi di nemen at loogu ren.’ *Mai 7:6*

³⁷Do nege i balamu aleng ne temen kopla nenen la ixo balamu aleng ia, neni xopmen na epovo do na ravasu ngan laradi rak. Do nege i balamu aleng ne nitna xopla ne nitnono, la ixo balamu aleng ia, neni xopmen na epovo do na lok ngan laradi rak. ³⁸Do nege i xopara na xip ka levenmumuat, i lok ngan laradi na solok ka laxaba ren la ira mumu asu ia, neni xopmen na epovo do na nemen ngan laradi rak. ³⁹Do nege i vara i do na ranga alis lorooro ren, neni naba sang apkav i; ket do nege i soxope lorooro ren ti lok luvukat tarak, neni naba lok kaka lorooro avolo.”

Luunun Tinedi Di Momo Ka Luvuttadi Mumu Asu At Ne Iesu

(Mk 9:41)

⁴⁰La ne Iesu ga lok bok tidi, “Do nege i seega rangarang nemi, neni i seega rangarang ia; la do nege i seega rangarang ia, neni i seega rangarang ne Moroa mo ga riki ia ude at na lavatbung menemen. ⁴¹Do nege i seega rangarang leeme vapaase alii mila neni leeme vapaase at ne Moroa, neni naba lok ka luunun ngan at leeme vapaase alii; la do nege i seega rangarang ka laradi nunuan, neni naba lok ka luunun ngan at laradi nunuan. ⁴²A tong tuturun i rinimi; do nege i raba ladan mumudut ti tara atdi na limixin tarak, mila neni laradi loklok ka anasa rak, neni naba lok kaka kobot luunun teren.”

Iesu La Ne Jon Laradi Sep Susu

(Lu 7:18-35)

11 ¹Se ne Iesu ga raba linga axap ti lasangaun mi legepura luvuttadi loklok ka anasa ren, neni ga vas basinge mo loxot la gat pas uto Galili kusu na lox ase limixin la na vavang to at laramenemen atdi.

²Ap mo levenaleng ne Jon laradi sep susu ga nemen at loxokoxo, neni ga ronga lempanga ne Karisito ga lox i, la neni ga riki lentaba luvuttadi loklok anasa ren uto saparap ne Iesu mi levelinga xeretna, ³“Tong axasev i rinama do xereva, nenu vam Lanarong, kopla tara gove manaba ngangais i?”

⁴La ne Iesu ga vorang i ridi, “Minamlong la mina tong i ri ne Jon mumu lempanga mi ronga i la mi ven i. ⁵Nedi limixin mi lengkatli main, mo di reven manga; nedi lengkangkedek atdi ga lok kapmek, mo dit pas avukat; la nedi dik meres mi lanmeres gu, di lox avukat pam; la nedi levenbaalung atdi i repe, ding tonga manga; la nedi diga met pam mo di roo xat amlong pam; la limixin banbalo, mo ding tonga Lagale Lavavang. ⁶Luvukat ti neni laradi kopmen noxo subu basinge ia la lebelen ixo lok kapmek ti na lugugu rak.”

⁷Se luvuttadi loklok ka anasa at ne Jon diga vas kaxat pam, Iesu ga tong levelinga mumu ne Jon tinedi limixin keretna, “At levenaleng migat pas do mina ronga linga at ne Jon to at lamatbin, laradi salai nemi miga lok do miba ven i? Kereva, miga nua i do miba ven taradi naba lok ngan lovobeo, lamanman it mas amdi i? ⁸Lavanga salai migat pas do mina ven i? Kereva, miga ven laradi ga siga lavanga singsiga avukat? Kopmen. Limixin di siga lempanga singsiga avukat la di ruuna lapnovos silok, nedi dina nemen keneng at laraugu ngan loogu at loorong silok. ⁹Mina tong i ria, lavanga salai migat pas do mina ven i? Taradi vapaase alii? I ruturun tinotno. A tong i rinimi, do nemi miga ven laradi ga silok aleng ti lavaeme vapaase alii. ¹⁰Jon neni laradi mo Lovoang Kaala ga paase mumu i. Moroa ga lok keretna,

“Laradi vapaase rak, anaba riki amgo i ru kusu na lox agagas li langas tu.”

Mal 3:1

¹¹La ne Iesu ga lok bok, “Nia a tong tuturun i rinimi, Jon laradi sep susu, neni i silok aleng tinedi limixin axap at na lavatbung menemen; ketla do tara i lok ngan laradi gamasa la neni lanat at Linintoo no vana at laxalibet, ni i silok ti ne Jon. ¹²Ga ru ka i at laaleng ne Jon ga vavang kaxat, i se at na laaleng lingina, Linintoo no vana at laxalibet gat pot mi lololos, ketla i ekip tangarang mi limixin kapmek di lolos kusu dina ru pe i. ¹³Levelinga at lavaeme vapaase alii, la Lenavolo, limixin diga mumu asu i, se at lovtopot at ne Jon. ¹⁴La mo do mi epovo do mina siam ka lempapaase atdi, mina nuunu do neni ne Elaisa, mo diga tong i do neni nabamlong. ¹⁵Do mi ruuna levenbaalung, mina ronga avukat na levelinga.”

¹⁶La ne Iesu ga lok bok keretna, “Limixin at na levenaleng, ana vaase poovo midi mi lavanga sala? Nedi di lok ngan laxamdak mi laxaalik kakalik dit kis to at loxot etang. Lara libinam atdi dip kup ti mo lara libinam,

¹⁷ ‘Magak pixan lengkompixan epot tinimi, ketla mi goxopara na tii momo; magak pixan lengkompixan bukbulu, ketla mi goxopara nang teng.’

¹⁸ Jon ga vot, la ni ga mun anan la goxo inin vaen, la limixin diga lok do, ‘Lagas i nemen teren!’ ¹⁹ Ketla nenia, Laradi Mevana, aga vot, la nia a anan la a inin, la limixin di lok, ‘Mina ven ba i na laradi! Neni laradi xoxo anan la laradi inin, la i etangas mi luvuttadi loklok ka pilas eburu mi limixin kapmek!’ Ketla lugugu at ne Moroa i pisik avukat la kerepmo i lox asuusu i do lodomdoma alii at ne Moroa i lox avukat.”

Laramenemen Ua Kopmen Di Goxo Nuunu At Ne Iesu

(Lu 10:13-15)

²⁰ Melemu Iesu ga ru ka i xusu na vaase mukmusak ti limixin ap mo laramenemen ua neni ga lok buaang lempanga sangsangu e, mila limixin ap mo laramenemen kopmen di goxo leeng basinge laxakapmek atdi. ²¹ Iesu ga lok keretna, “Naba lok kapmek aleng tinemi limixin me Korasin. La naba lok kapmek aleng bok tinemi limixin me Betsaida. Mo levempanga sangsangu nia aga lox i ro xantubu atnimi, mo do nia gita lox i ro Taia la Sidon, soso mun limixin me go, nedi gita leeng pam la gita etara mun lengkontamon kapmek, la gita reeve vam laxakup at lengkot atdi. ²² Ketla ana tong i rinimi do at laaleng ete, ne Moroa naba lox asuusu lumumuat uto ri limixin at lumenemen Taia la Sidon, ketla langangan lumumuat naba nemen mavana atnimi. ²³ La nemi limixin me Kaprenaum. Mi vavara i do mina silok ti limixin axap, ketla ne Moroa ba sok gingin asi minimi uto at lemenemen songsongot. Mo lempanga sangsangu, aga lox i dom kantubu atnimi, mo do nia gita lox i ro Sodom, nedi gitaba leeng basinge laxakapmek atdi la ne Moroa gitoxo sele utut kape mo lemenemen. ²⁴ A tong i rinimi do at laaleng ete, Moroa naba lox asu lumumuat ti limixin kapmek to Sodom, ketla tinemi limixin, lumumuat naba silok aleng tinimi.”

Iesu Ga Emi Asu Mi Ne Moroa

(Lu 10:21-22)

²⁵ Ap mo laaleng ne Iesu ga lok ti ne Moroa, “Nia a emi asu minu, Tamak; nenu Leeme Silok at laxalibet mi lavatangka. Nia a emi asu minu mila ugara lox ase vam nedi limixin gamasa mi levelinga mumu Linintoo; la uga lipe i basinge limixin leklen la limixin diga lox ase. ²⁶ I ruturun, Tamak. Anai uga lox i mi lodoxoma la lomomo ram.”

²⁷ La ne Iesu ga lok ti mo limixin, “Tamak, ira raba vam ia mi lempanga axap. Kopmen teta naklen ia, ketla ne Tamak kusuk mun; la kopmen teta naklen ne Tamak, ketla nenia ne Nitna xusuk mun, la tinedi mun nenia a vara i kusu ana lox ase di min. ²⁸ Nemi axap mik sak saaban mi

laxanaknixip keneng at lorooro atnimi, mina vosiga ia, la aba raba nimi mi loklox amas. ²⁹Mina siam ka loklok tarak la mina rongka ka levenanasa rak; mila lorooro rak i umsu mi loklok mulus mene, kuren la miba lok ka loklox amas ti labaroonan atnimi. ³⁰Mina siam ka ia mila levenanasa rak kopmen na lolos la loklok tarak noxo lok ngan lavanga mumuat tinimi.”

Iesu Ga Paase Mumu Laaleng Kaala

(Mk 2:23-28; Lu 6:1-5)

12 ¹Ap mo levenaleng, ne Iesu gat pas kantubu at leventaamang at laaleng kaala. La luvuttadi loklok ka anasa ren diga roxo la diga xidik kaka lempeven at lempiao, la diga anan i. ²Se lubung Parisi diga ven i, diga lok ti ne Iesu, “Pen ba i. Luvuttadi loklok ka anasa ram dira los polo vam Lenavolo, i tong i do nemen mitak lok lempanga xeretnom at laaleng kaala.”

³La ne Iesu ga sue di xeretna, “Mi doma bok levelinga at Lovoang Kaala mumu ne Devit? At lara laaleng neni eburu mi limixin teren diga roxo. ⁴Neni ga vubeles at loogu at ne Moroa la ga lok ka lengkongkide digam taba min ti ne Moroa, la neni eburu mi limixin teren diga anan i. La kerepmo diga los polo Lenavolo mila lavamaasa xusuk mun diga anan mo lengkongkide. ⁵Mina domangke at levelinga at Lenavolo i tong i do at laaleng kaala lavamaasa di los polo Lenavolo mila di gugu ro xeneng at loogu laplavang ap mo laaleng. Ketla kopmen taxapmek atdi mumu i nom. ⁶Nia a tong i rinimi do lara i silok ti loogu laplavang ira vot pam. ⁷Nemi xopmen mina xasep at levelinga at Lovoang Kaala mo i lok keretna, ‘A vara i do lebelemumu na umsu atnimi, a xopara loklok tiplavang.’

Ose 6:6

Do nemi gitaklen lavasuun at nai, nemi gitoxo lok li lumumuat atnedi kopmen taxapmek atdi.” ⁸La ne Iesu ga lok bok, “Nenia Laradi Mevana. La nenia leeme silok at laaleng kaala la a lok tatao mo laaleng.”

Iesu Ga Lox Aroo Laradi Lekngen Ga Molo

(Mk 3:1-6; Lu 6:6-11)

⁹Iesu ga vas kaxat basinge mo loxot la ga vubeles uto at loogu singising atdi. ¹⁰Lara laradi mo ga nemen lekngen ga molo. La mo lubung Parisi diga doma i do dina bala raba ne Iesu, kuren la diga sue i, “Ik mokso do tara na lox aroo taradi at laaleng kaala?”

¹¹Iesu ga lok tidi, “Do tara atnimi i ruuna lisipsip la mo lisipsip na subu uto at tamamara silok at laaleng kaala, neni ba rebeng ka i la ba xiv asu ka i. ¹²La laradi i silok aleng ti lisipsip. Kuren la ik mokso do ata lok lempanga avukat at laaleng kaala.”

¹³La ni ga lok ti mo laradi, “Una song asu mi lakngam.” La mo laradi ga song asu mi lekngen, la lekngen ga lox avukat axap ta kerekngan mo

lara lekngen. ¹⁴Ketla lubung Parisi diga sixisu la diga puse ngas kusu dina sev amet ne Iesu.

Iesu Neni Lasaxaruki At Ne Moroa

¹⁵Iesu gaklen mo levendoxoma atdi la ga vas kaxat basinge mo lemenemen. Buaang limixin diga mumu asu i la neni ga lox aroo nedi diga meres. ¹⁶Neni ga tong lolos i ridi do di noxo tong asu i do neni nege. ¹⁷Iesu ga lox i na kusu na lox asorun levelinga at leeme vappaase alii ne Aisaia keneng at Lovoang Kaala, i lok keretna,

¹⁸‘Neni na lasaxaruki rak, mo nia aga soxolik ka i; nenia a balamu i la a lok momo aleng min. Nenia aba suxa aumsu i mi Loroonan tarak at na lavatbung menemen. La neni naba paase axasep loklok mokmokso ri limixin axap. ¹⁹Neni noxo etep mi levelinga koplā nap kup mukmusak; neni noxo ru asuvos i ro melamgo at limixin axap. ²⁰Neni noxo ru mi loboat tinedi limixin molobe koplā na lok kapmek nedi limixin pakpakes. Neni naba gugu se limixin diba siam kaka leveloklok ik mokso. ²¹La levenabung mixin axap diba nuunu at laasen teren.’

Ais 42:1-4

Iesu Ga Paase Mumu Ne Belsebul

(Mk 3:20-30; Lu 11:14-23)

²²La limixin diga lam ka lara laradi uto at ne Iesu. Lagas kapmek ga suxuna i la goxo epovo na paase la luxatli ren ga main; la ne Iesu ga riki asu lagas basinge mo laradi la ni ga lox epovo i xusu na paase la na reven. ²³La limixin axap diga sanganu la diga esue, “Kereva, na laradi neni Lanarong, la livisik li at ne Devit?”

²⁴La lubung Parisi diga ronga i na la diga lok ti mo limixin, “Neni i riki asu lubunggas mi lololos at ne Belsebul, leeme gomgo at lubunggas.”

²⁵Ketla ne Iesu gaklen levendoxoma atdi la ni ga tong lavappaase poovo ridi xeretna, “Dola tubungmixin di epes di ri lengkon binam tadi, la dia esep eburu minedi xa, letuna atdi kopmen noxo lok nunuan; la limixin at legese menemen koplā loxoetemen do di epes di kusu ri esep, dinabat kis epeseves. ²⁶Kuren la mo do ne Satan eburu mi limixin teren dina epeseves ti legepu binam tadi la dina esep, lololos teren naba nemen atmatkun kereva? ²⁷Mo do nia a lox asu di mi lololos at ne Belsebul, limixin sangsanga atnimi di lox asu di xereva? Nedi di lok asusu i do levelinga atnimi kopmen nak mokso. ²⁸Ket do a lox asu di mi lololos at Loroonan Kaala at ne Moroa, Linintoo at ne Moroa mo nga ira vot pam saparap nimi.

²⁹Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba mo lempanga ren.

³⁰Do taradi kopmen na xis esogo eburu minia, neni i munepen minia; la do tara kopmen nak lok tooro ia rip kup bubua ka laxasipsip, neni mo laradi ik sak

teteles laxasipsip. ³¹La a tong i rinimi; Moroa naba doxoma xepe laxakapmek axap la lavapaase vupu; ket do tara na vaase vupu ri Loroonan Kaala, ne Moroa noxo doxoma xepe mo laxakapmek. ³²La ne Moroa naba doxoma xepe tara i paase kapmek mumu ia, Laradi Mevana, ketla neni noxo doxoma xepe tara i paase kapmek mumu Loroonan Kaala, at na levenaleng la at lorooro melemu bok.

Luuna Avukat Naba Pisik Larapeven Una Avukat
(Lu 6:43-45)

³³Luuna avukat, ni i pisik larapeven una avukat. Luuna xapmek, ni i pisik mun larapeven una kapmek; limixin di ven kibis luuna at larapeven teren i pisik asu i. ³⁴Nemi laxamdak at lempasii. Nemi xopmen mina epovo na tong asu levelinga avukat mila nemi mi umsu mi laxakapmek. Levenngusno nimi i paase asuusu lempanga lebelen nimi i umsu min. ³⁵Laradi avukat ik lox asuusu lempanga nunuan ik lok at lorooro ren, ketla laradi xapmek ik lox asuusu mun lempanga xapmek ik lok at lorooro ren. ³⁶Nia a tong i rinimi. Limixin diba tu at lavapaase ro melango at ne Moroa at laaleng ete mumu levelinga xapmek axap diga tong pam i. ³⁷Mo do levelinga at tara ga lox avukat, Moroa naba lox asepmus i. Mo do levelinga at tara ga lok kapmek, Moroa naba lok li lumumuat teren.”

Limixin Diga Sing Ne Iesu Kusu Na Lok Tavanga Sangsangu
(Mk 8:11-12; Lu 11:29-32)

³⁸Melemu lentaba at lubung Parisi la luvuttadi loklox ase at Lenavolo diga lok ti ne Iesu, “Leeme loklox ase. Ma vara i do una lok tavanga sangsangu.”

³⁹La ne Iesu ga lok tidi xeretna, “Limixin at na levenaleng nedi limixin kakapmek tinotno. Di sue ri tavanga sangsangu, ketla kopmen a noxo lok tara ridi, ketla diba doma mumu mun leretere at leeme vapaase alii, ne Jona. ⁴⁰Jona ga nemen to xeneng at lebelen lavatmat silok at lavantun aleng kangking la lavantun aleng kanimin, la kerepmo nenia, Laradi Mevana, aba nemen to xeneng tubu at lavatkangka at lavantun aleng kangking la lavantun aleng kanimin. ⁴¹At laaleng ete limixin boro Nineve dinaba xatu kaxat upana la dina tong asu laxakapmek atnimi, mila diga leeng basinge laxakapmek atdi at nom laaleng diga ronga ne Jona ga vavang tidi; la lara laradi ik lok kantubu atnimi, neni i silok ti ne Jona. ⁴²At laaleng ete latkin gomgo boro Seba naba xatu kaxat la na tong asu laxakapmek atnimi limixin at na levenaleng, mila neni gat pas at lavatpas babaalom aleng kusu na ronga lakleklen at ne Solomon; la lara laradi ik lok pam kantubu atnimi, neni i silok ti ne Solomon.”

Lomlong At Lagas Kapmek
(Lu 11:24-26)

⁴³La ne Iesu ga lok bok, “Do lagas kapmek na oo su basinge laradi, bat pas saasaa at lengkot kopmen tadan teren, la ba reven ti toxot kusu

rin ti lok mamana. Mo do noxo vuse ka toxot, ⁴⁴naba doma i xeretna, ‘Anamlong uto at no laradi, nenia aga on basinge i.’

La neni bamlong la na long lenget ka i do mo loxot imgames la ira lox avukat pam la kopmen tara ro xeneng teren. ⁴⁵La neni bat pas la na lok ka bok lavanuti lubunggas, laxakapmek atdi i volo aleng i, la dibat pas la diba vubeles ap mo laradi. Kuren la mo laradi ba nemen kakapmek tino. Limixin kakapmek at na levenaleng dibak lok kuren.”

Luvutneton Mi Nenen Ne Iesu

(Mk 3:31-35; Lu 8:19-21)

⁴⁶Iesu move ga paase ri limixin la nenen mi luvutneton diga tu ro xamang, diga vara i do dina epaase min. ⁴⁷[Lara laradi ga lok ti ne Iesu, “Nenam eburu mi luvutnetam no di tu xamang la di vara i do dina ven u.”]

⁴⁸La ne Iesu ga lok, “Nege ne naga, la nege di luvutnetak?” ⁴⁹La ne Iesu ga song ti luvuttadi loklok ka anasa ren la ga lok, “Na luvuttadi nedi di lok ngan ne naga mi luvutnetak. ⁵⁰Neni mun i mu asu lavavara at ne Tamak no vana at laxalibet, neni netak, kopla neinuk, kopla ne naga.”

Lavapaase Poovo Ri Laradi Lotlo

(Mk 4:1-9; Lu 8:4-8)

13 ¹Ap mo mun laaleng Iesu ga vas kaxat basinge mo loogu la gat pas uto at lisigege at lavat dan kis, la ni ga xis kopok la ga anasa limixin. ²Ketla limixin diga umsu xangkan i, diga buaang aleng; kuren la ni ga los kas at lese pang lixilik la ni ga xis teren, la limixin diga tu ro loxon. ³Neni ga paase poovo ridi mi lempanga buaang. Ni ga lok keretna, “Lara laradi lotlo ga vas su kusu natlotlo piao. ⁴Se neni gatlotlo levenit piao ro at laraamang, lentaba levenit ga subu ro at langas la lavapixa diga vot la diga rok axav i. ⁵Lentaba atdi ga subu ro at laxanuat la lengkongkangka lixilik mene gak lok teren. Levenit piao ga su xat soso mun mila goxopmen taxangka solo. ⁶Ga se laxangking ga los su upana, ga sev amolos axap nom lempiao, mila levenixe atdi goxo si aleng ukopok la nom lempiao susu diga met axap. ⁷Lentaba at nom levenit piao ga subu ro at livin gagas la livin gagas ga su xat la ga is nom lempiao la di goxo epovo bok ba ri su. ⁸Ketla lentaba levenit piao ga subu ro at laxangka nunuan, la diga visik; lentaba ga visik legesa sangaun kobot (100), lentaba lavanna sangaun, la lentaba lavantun sangaun.” ⁹La ne Iesu ga lok, “Mo do levenbaalung go atnimi, mina rongga avukat na levelinga.”

Lempasuun At Lempapaase Poovo

(Mk 4:10-12; Lu 8:9-10)

¹⁰Melemu luvuttadi loklok ka anasa ren diga vot pasa ne Iesu la diga sue i xeretna, “Tila uk lok lempapaase poovo ri limixin mo do u paase ridi?”

¹¹La ne Iesu ga vorang i ridi xeretna, “Moroa ira raba vam nimi mi lakleklen at Linintoo no vana at laxalibet; gano ga nemen alipe; ketla tinedi limixin petpes kopmen. ¹²La mo do taradi i ruuna lakleklen kerepmo, Moroa ba raba box i kusu neni naba ruuna lakleklen solo; ketla ti laradi, kopmen takleklen solo ren, Moroa ba lox asu axap mo lakleklen basinge i, keke i do neni i ruuna lamanakleklen lixilik mun. ¹³Lavasuun teren do nenia a paase ridi mi lempapaase poovo i lok keretna;

‘Nedi di reven lugugu, ketla di noxo ven kibis i; ding tonga mo levelinga, ketla di noxo xasep teren.’

¹⁴Kuren la na lavapaase alii at ne Aisaia ira sorun pam. Moroa ga lok keretna,

‘Mibang tonga amisik, ketla mi noxo xasep; miba reven amisik, ketla mi noxo ven kibis. ¹⁵Lavasuun teren do levendoxoma at na limixin ira rebonot pam, la dira bong pe vam lenbaalung atdi la dira vam pe bok pam lengkatli atdi. Do kopmen, lengkatli atdi ba reven la lenbaalung atdi nang tonga la levendoxoma atdi na xasep la dina leeng la ana lox avukat nedi. *Ais 6:9-10* ¹⁶Ketla Moroa ik lox anarong nemi luvuttadi loklok ka anasa mila lengkatli atnimi i reven la lenbaalung atnimi ing tonga. ¹⁷A tong tuturun i rinimi! Buaang nedi lavaeme vapaase alii la buaang bok nedi limixin at ne Moroa diga vavara aleng i do dina reven na lugugu mi reven i; ketla di goxo epovo, la diga vavara box i do dina ronga levelinga rak ming tonga i, ketla di goxo epovo.”

Iesu Ga Soxomus Lavasuun At Laradi Gatlotlo Piao

(Mk 4:13-20; Lu 8:11-15)

¹⁸La ne Iesu ga lok bok keretna, “Mina ronga avukar i na, la mina xasep avukat at lavasuun at na lavapaase poovo at laradi gatlotlo levenit piao. ¹⁹Tinedi di ronga lempapaase mumu Linintoo, ketla dixo xasep teren, nedi di lok ngan levenit piao ga subu ro mun at langas. Satan i vot la i lok pes nom levelinga basinge lorooro atdi. ²⁰Ti levenit piao ga subu ro at laxanuat, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo. ²¹Ketla ixo vubeles ukeneng at lorooro atdi; la lunuunu atdi ixo nemen abao solo. Kuren la ise do levenmumuat i vot eburu mi levesongsongot mumu levelinga at ne Moroa, lunuunu atnedi i subu soso mun. ²²Ti levenit piao ga subu ro at livin gagas, ni i ru katling nedi limixin di ronga levelinga, ketla dik bulu mu solo laxampanga at na lorooro, la nom labalamu atnedi ri lapnovos i itis nom levelinga la dixo psik tempeven una. ²³La ti levenit piao ga subu at laxangka nunuan, ni i ru katling nedi limixin di ronga levelinga at ne Moroa la di xasep teren, la di psik lempeven una, lentaba di visik lempeven una i epovo at legesa sangaun kobot (100) la lentaba lavanna sangaun la lentaba lavantun sangaun.”

Lavapaase Poovo Ri Lempivilis Kapmek

²⁴Iesu ga tong bok lara lavapaase poovo ridi, ni ga lok, “Linintoo no vana at laxalibet i lok ngan laradi gatlotlo levenit piao avukat to at laraamang teren. ²⁵At laxanimin limixin axap diga unga, la lara lumunepen teren ga vot la gatlo lempivilis kapmek to xeneng at nom laraamang piao, la no nga i gara onon. ²⁶Ise levenit ga su xat la ga lok do na visik, lempivilis kapmek bok ga su xat. ²⁷Lavasaxaruki ap mo laradi at laraamang diga vosiga i la diga lok, ‘Leeme silok. Levenit piao avukat ugatlotlo i. I lok kereva la lempivilis kapmek ta mo ira su kantubu at lempiao?’

²⁸La ni ga vorang i ridi, ‘Taradi i munepen minia ga lox i nom.’

La diga lok tin, ‘Kereva, u vara i do manat pas la mana xat kape i?’

²⁹La ni ga lok, ‘Kopmen, mila lavanga mina xat kape lempiao eburu mi lempivilis kapmek. ³⁰Keke lempiao eburu mi levempivilis kapmek dina susu eburu se at laaleng ti sep kin. Ap mo laaleng aba tong i ri luvuttadi gugu rak keretna; mina rep asu ka avot levempivilis kapmek la minap kos ka di la mina lu arup midi ro at laxao; la mina lok bubua ka lempiao la mina lok li di ro at loogu lili rak.”

Lavapaase Poovo Ri Liit At Luuna Mastet

(Mk 4:30-32; Lu 13:18-19)

³¹Iesu ga vaase bok tidi mi lara lavapaase poovo xeretna, “Linintoo no vana at laxalibet i lok ngan lara laradi ga lok ka levenit mastet la gatlotlo i ro xataamang teren. ³²Nom levenit i lixilik aleng ti levenit axap, ketla do ira su xat, neni i silok aleng ti lempanga axap i susu ro xataamang. La ira lok ngan ta luuna, la lavapixa dit pot, la dirap kip gu go at lengkakan una ren.”

Lavapaase Poovo Mumu Laiis

(Lu 13:20-21)

³³Melemu ne Iesu ga vaase bok di mi lara lavapaase poovo xeretna, “Linintoo no vana at laxalibet i ngan laiis. Latkin i lok ka i la i lox eburu i mi loxompalava solo kusu na lok lengkongkide min. Laiis i vubeles axap uto xeneng at loxompalava xusu na so xat.”

Ua Lavasuun Teren La Ne Iesu Ga Lok Lempapaase Poovo

(Mk 4:33-34)

³⁴Iesu gak lok lempapaase poovo ri tong i na lempanga ri limixin; ni goxo tong tavanga ridi la kopmen tavapaase poovo. ³⁵La kerepmo ne Iesu ga lox asorun levelinga at leeme vapaase alii ga vaase i xeretna, ‘Aba tong asu lempapaase poovo ridi; la aba tong asu levelinga ga nemen alipe, ga ru ka i at luruntudum li at na lavatbung menemen.’

Lavasuun At Lavapaase Poovo Mumu Lempivilis Kapmek

³⁶Iesu ga on basinge limixin la ga beles ukeneng at lara loogu, la luvuttadi loklok ka anasa ren diga vot pasa i la diga lok tin, “Una tong asu lavasuun at lavapaase poovo mumu lempivilis kapmek ga su ro xataamang.”

³⁷La ne Iesu ga lok tidi xeretna, “Laradi itlotlo levenit piao avukat, ni nenia vam, Laradi Mevana. ³⁸Nom laraamang i ru katling na lavatbung menemen; levenit piao avukat, ni limixin dinaba vubeles ti Linintoo; la lempivilis kapmek, ni limixin di mumu asu ne Satan. ³⁹La laradi munepen itlotlo lempivilis kapmek, neni ne Satan. Laaleng ti lok bubua limixin, i ru katling laaleng kavaxap at na lavatbung menemen; la luvuttadi gugu, nedi lubungangelo.

⁴⁰Lempivilis kapmek di lok bubua di la dira xotos di ro at laxao, naba lok mun kuren tinedi limixin kapmek at laaleng kavaxap at na lavatbung menemen. ⁴¹Nenia, Laradi Mevana, anaba riki asu lubungangelo tarak ti lok ka nedi di lox asubu limixin eburu mi limixin kapmek uto basinge limixin nuunu. ⁴²La lubungangelo diba lu arup midi ro at lemenemen songsongot; ap mo loxot dibang teng la dina rungur ivivilis. ⁴³La limixin mokmokso diba soosoo ngan laxangking to at Linintoo at ne Temen di. Do lenbaalung mo atnimi, minang tonga avukat!”

Lavapaase Poovo Ri Lapnovos Diga Lipe I

⁴⁴La ne Iesu ga lok bok tidi, “Linintoo no vana at laxalibet i lok ngan lapnovos di lipe i ro at laxangka. La lara laradi i ven terek ka i la ni ia lipe manga i, la ni i lok momo aleng la ni ia sesep mi lempanga axap teren la neni imlong la ia un kaka mo lenep kangka axap la ia ruuna ka mo lapnovos.”

Lavapaase Poovo Ri Luat Gamgames

⁴⁵La ne Iesu ga lok bok tidi, “Linintoo no vana at laxalibet i lok ngan laradi sesep i puse ri laxanuat gamgames. ⁴⁶La do ira vuse ka lara, langsung luunun teren, neni it pas la ira sesep mi lempanga axap teren, la ni iramlong ba la ira un ka ba mo luat.”

Lavapaase Poovo Ri Laxatkat

⁴⁷La ne Iesu ga lok bok tidi, “Linintoo no vana at laxalibet i lok ngan laxatkat; limixin sepsep mat di loloa min to at laras la dira sao ka laxanasen mat solo min. ⁴⁸Se mo laxatkat i umsu mi laxanmat, di rep ka i uto loxon la dira xis be xusu dina episa lenmat. Lentaba nunuan di lok li di ro at lengkaxi atdi la lentaba xapmek di lu xape midi. ⁴⁹Naba lok mun kuren at laaleng kavaxap at na lavatbung menemen. Lubungangelo

diba vot la dina lok ka limixin kapmek basinge limixin avukat; ⁵⁰la diba lu midi ro at lemenemen songsongot. Mo go dibang teng la dina rungur ivivilis.”

Lempanga Maxat La Lempanga Megano

⁵¹Iesu ga sue di xeretna, “Mi xasep at na lempapaase poovo?”

La diga vorang i rin keretna, “Laaba.”

⁵²La ni ga lok, “Kuren la nedi axap luvuttadi loklox ase at Lenavolo do dina mumu asu levelinga at Linintoo no vana at laxalibet, nedi di lok ngan laradi at loogu i xip asu lempanga maxat mi lempanga maut boro xeneng at loogu lili ren kusu na raba limixin min.”

Limixin Boro Nasaret Diga Sok Tixirixes Ne Iesu

(Mk 6:1-6; Lu 4:16-30)

⁵³Ise ne Iesu ga vaase axap na lempapaase poovo, neni ga on basinge mo lenep, ⁵⁴la gamlong uto at lemenemen aulis teren. Ni ga anasa ro at loogu singising atdi. La limixin diga ronga i la diga sangu. Diga esue xeretna, “Ni ga lok ka na lakleklen solo meva? La ga lok ka lololos meva xusu ri lok na lempanga sangsangu? ⁵⁵Neni mun lamdak at ne Josep laradi xipkip gu! La ne Maria neni nenen, la ne Jems, la ne Josep, la ne Simon, la ne Judas di mun luvutneton; ⁵⁶la luvurinen dik lok bok de. Ni ga lok ka na lakleklen meva?” ⁵⁷Kerepmo la diga sok tixirixes kepe i.

La ne Iesu ga lok tidi, “Leeme vapaase alii di lok ngangao ren at lengkot axap, ketla to at lemenemen teren, limixin eburu mi libibinat teren, kopmen dina lok ngangao ren.”

⁵⁸Iesu goxo lok solo tempanga sangsangu go mila di goxo ruuna epovo lunuunu.

Lanmet At Ne Jon Laradi Sep Susu

(Mk 6:14-29; Lu 9:7-9)

14 ¹Ap mo levenaleng Erodes laradi gomgo boro Galili ga ronga lempanga ne Iesu ga lox i. ²La ni ga lok ti luvuttadi gugu ren, “Agut neni ne Jon to ga roo xat amlong, kuren la neni ira lok nom lempanga sangsangu mi mo lololos.”

³⁻⁴Avot at na ne Erodes ga sak paxat ka latkin at neton, laasen teren ne Pilip. Laasen ap mo latkin ne Erodias. La ne Jon laradi sep susu ga vaase sok ne Erodes mumu na loklok. La neni ga lok ti ne Erodes, “Ixok mokso do uga epot ka ne Erodias.”

Kuren la ne Erodes ga riki luvuttadi gugu ren kusu dina ranga alis ne Jon la diga xoxo i la diga lok li i at loogu xoxoxo. ⁵Erodes ga lok do na sev amer i, ketla neni ga marat bok at limixin me Judaia; mila diga lok do ne Jon leeme vapaase alii.

⁶At laaleng loklok katling at livipisik at ne Erodes, ne nitnono ne Erodias ga tii ro melango at limixin. La ne Erodes ga lok momo aleng min, ⁷la ga lok laxakaape do neni naba raba mo loono mi tavanga neni na sing tin. ⁸Neni ga mu asu lodoxoma xa at nenen la ga lok, “Una raba nga ia mo mi lavatlak at ne Jon, laradi sep susu, to at tavattingtigon silok.” ⁹Loorong silok ga ronga i la ga bulu aleng. Ketla neni goxo epovo na los polo mo laxakaape neni ga lok pam i ro melango at limixin; kuren la neni ga raba linga luvuttadi gugu ren kusu dina sev amet ne Jon kerekngan mo loono ga sing tin. ¹⁰Kuren la diga ra korop ka lavatlak at ne Jon to at loogu xokoxo. ¹¹La diga lok li mo lavatlak to at lavattingtigon silok la diga raba loono min; la ga raba nenen min. ¹²La luvuttadi loklok ka anasa at ne Jon digat pas la diga lok ka labantuxu ren la digak mir i; melemu digat pas la diga tong i na ri ne Iesu.

Iesu Ga Raba Luxa Luvuttadi
(*Mk 6:30-44; Lu 9:10-17; Jo 6:1-14*)

¹³Iesu ga ronga lanmet at ne Jon la neni xusuk mun ga mu lese pang uto at loxot mimila. La buaang limixin diga ronga levelinga mumu i na la diga mumu asu i uto loxon boro at levenmenemen atdi. ¹⁴Se ne Iesu ga oso la ga ven nedi buaang limixin, ni ga balamu aleng di la ga lox aroo nedi, diga meres.

¹⁵Ga ukantinao nga, luvuttadi loklok ka anasa ren diga vot pasa i la diga lok tin, “Ukantinao nga na la na loxot, ni loxot mimila rino, la loxonaleng ti anan ira volo vam. Una riki aonon limixin kusu dibat pas uto at levenmenemen la dina un ka tempanga anan tidi.”

¹⁶La ne Iesu ga lok tidi, “Ixo epovo do dina on basinge na loxot. Nemi xa mina raba nedi mi teveluxa kusu ri anan.”

¹⁷La diga lok tin keretna, “Ma ruuna mun lavalimo lengkongkide la legepu venmat.”

¹⁸La ne Iesu ga lok tidi, “Mina raba ia mi nom leveluxa.” ¹⁹La neni ga tong i ri mo limixin kusu dina xis kopok at mo levempivilis avukat. La ni ga lok ka mo levengkongkide la legepu venmat, la ga milik aurut uto vana at laxalibet, la ga tong avukat ti ne Moroa. La neni ga sebek mo lengkongkide la ga raba i ri luvuttadi loklok ka anasa ren, la diga raba limixin min. ²⁰La limixin axap diga anan la diga an mais. La luvuttadi loklok ka anasa diga luxa lasangaun mi legepura leventat silok mi leveluxa mo limixin diga an ake ren. ²¹La nedi luvuttadi diga anan, diga epovo at lavalimo larabin sangsangaun kobot. (5000) La lentaba bok lavakin la laxamdak mi laxaalik kakalik bok diga anan.

Iesu Gat Pas To Mavana At Lavatdan Kis Galili
(*Mk 6:45-52; Jo 6:15-21*)

²²La soso mun ne Iesu ga tong i ri luvuttadi loklok ka anasa ren kusu dina los kas at lese pang, la dinamgo rin uto at lenep meo. La neni ga

riki aonon limixin. ²³Se neni ga riki aonon kepe vam di, neni xusuk ga vas urut to vana at loxongkaana kusu na ngising. Neni gak lok go se at laxanimin. ²⁴La ap mo loxonaleng lese pang no garak lox atbutbu nga. La lempopaxanao gak paksa ekakat lese pang mila lamanman gat mas lolos tangarang i.

²⁵Kantubu at lavantun mi lavanna konaleng at laxanimin, Iesu ga vas posiga luvuttadi loklok ka anasa ren to kantubu at lavatdan kis, neni gat pas mun to mavana at lavatdan kis. ²⁶Se diga ven i gat pas to mavana at ladan, diga marat aleng tinotno la diga lok, “Loroonan panga nom!” La digap kup aleng mi lainmarat.

²⁷La soso mun ne Iesu ga lok tidi, “Nemen gat mita marat; mina lolos. Nenia mun na.”

²⁸La ne Pita ga lok, “Leeme Silok. Do nenu ruturun pam nom, una tong box i ria kusu anat pas mavana at ladan la u dom saparav u.”

²⁹La ne Iesu ga vorang i rin keretna, “Ude u.”

Kuren la ne Pita ga xatu kaxat boro at lese pang la gat pas to mavana at lavatdan kis uto at ne Iesu. ³⁰Ketla se neni ga ven lamanman, neni ga marat la gara dong si silatla nga ukopok at ladan. La neni ga xup keretna, “Leeme Silok, una lox aroo ia!”

³¹Soso mun Iesu ga song asu mi lekngen la ga ranga ka i la ga lok, “Nenu u ruuna lunuunu i xakalik mun. Tila uxo nuunu do nenia a epovo ana lox u xusu unat pas to mavana at ladan ude saparav ia?”

³²La nedu eburu diga los kas at lese pang, la lamanman gara xap matmas nga. ³³La luvuttadi loklok ka anasa ro xeneng at lese pang diga lok, “I ruturun aleng do nenu ne Nitna ne Moroa.” La diga lotu saparav i la diga emi asu min.

Iesu Ga Lox Aroo Limixin Mekmeres To Genesaret

(Mk 6:53-56)

³⁴Diga xan polo lavatdan kis la diga oso ro Genesaret. ³⁵Limixin go diga ven kisip ne Iesu, la diga lox aonon levelinga ri limixin diga ruuna levenanmeres ap mo lengkot axap do ne Iesu mo ga vot. La limixin diga lok ka di uto saparap ne Iesu. ³⁶La diga sing i xusu na ke limixin mekmeres dina long tu at lungusungus at lavanga singsiga ren. La nedi axap diga long tu ren, diga lox avukat ta.

Levenanasa At Lubung Parisi La Lubung Sadiusi

(Mk 7:1-13)

15 ¹Lentaba lubung Parisi mi luvuttadi loklox ase at Lenavolo diga vas kaxat boro Jerusalem la diga vosiga ne Iesu la diga sue i, ²“Tila ba luvuttadi loklok ka anasa ram di rongga xepe leveloklox ase at lavalabat atdik? Dixo sogos avot be levengkikngen di la melemu dina anan.”

³La ne Iesu ga vorang i ridi xeretna, “La tila ba ming tonga xepe levelinga at ne Moroa xusu mi epovo do mina mumu asu xa levenanasa atnimi? ⁴Levelinga at ne Moroa i lok keretna,

‘Mina lok ngangao at luvuttemen nimi mi luvutnen nimi, la do tara i paase kapmek ti ne temen mi nenen, limixin dina sev amer i.’

Pas 20:12, 21:17

⁵⁻⁶Ketla nemi mi lok keretna; mo do tara na ruuna tempanga do ri lox epovo lavakpakes at ne temen kopla nenen, nemi mi tong i rin do neni na mumu asu leveloklok at lavalabat la na raba ne Moroa min la neni na ke loklok ti lok tooro du. At na mun langas nemi ming tonga xepe levenanasa at ne Moroa la mira mumu asu nga leveloklok atnimi. ⁷Nemi lavapen aala. Aisaia ga paase alii nunuan mumu nimi. Ni ga tong asu levelinga at ne Moroa keretna,

⁸‘Na limixin di lok ngangao rak mi levelinga mun atdi, ketla lebelen di i vaxalom tino basinge ia. ⁹Dixo lotu saparav ia mi luruturun, la di lox ase mi levelinga at limixin mun!’

Ais 29:13

Lempanga I Lox Abilinga Lorooro At Laradi

(Mk 7:14-23)

¹⁰Melemu Iesu ga ro xaka limixin saparav i la ga lok tidi, “Mina rongka ka nunuan lempapaase rak la mina xasep teren. ¹¹Lempanga i vubeles keneng at lungusno laradi, anai xopmen na lox abilinga i; ketla levelinga laradi i vaase asu i at lungusno, ana i lox abilinga i.”

¹²Melemu luvuttadi loklok ka anasa diga vosiga i la diga lok, “Uklen pam i do lubung Parisi di suma xapmek ti levelinga ram?”

¹³La ni ga lok tidi, “Larauna axap ne Tamak goxotlo li di, neni ba xat pes di. ¹⁴Mina ke xepe di mi levenanasa atdi. Nedi di lok ngan lengkatli main la di lok do nedi luvuttadi loklok tooro at limixin; do laxatli main im lam lara laxatli main, nedu buru duba subu tup at lemet.”

¹⁵Pita ga lok ti ne Iesu, “Una soxomus be lavasuun at nom lavapaase poovo rinama.”

¹⁶La ne Iesu ga sue di, “Nemi bok luvuttadi loklok ka anasa rak kopmen mina xasep? ¹⁷Mina xasep do lempanga anan laradi i anan i la i beles keneng at lebelen, nom i neni i lox asu box i. ¹⁸Ketla lempapaase laradi i vaase asu i at lungusno ren, nom i, i ravasu boro xeneng at lorooro ren; la na mun levelinga, ni i epovo na lox abilinga i. ¹⁹Na levempanga xapmek i ravasu boro at lorooro at laradi i lok keretna; levendoxoma xapmek, la loklok tip sep amet tadi, loklok ting longka, la leveloklok kakapmek maxamang at lixitkis epot, loklok tip kip pilo, la lavapaase xaxarang mu tara, la loklok ti lox asi tara. ²⁰La nai lempanga i lox abilinga laradi. Ketla do tara na anan la kopmen na gos avot be lukngen, nom kopmen na lox abilinga i.”

Iesu Ga Lox Aroo Loolik At Latkin Kopmen Boro Israel
(Mk 7:24-30)

²¹Iesu ga on basinge mo lemenemen la gat pas uto at lengkot saparap Taia la Sidon. ²²Lara latkin me Kanan mo ga nemen ap mo lenep ga vosiga ne Iesu, la ga xup lolos tin keretna, “Leeme Silok! Livisik li at ne Devit. Una balamu ia la una lok mumu be loolik tarak. Lagas i suxuna i la i lox atpospa rino i.”

²³Ketla Iesu goxo tong tekolonga rin. La luvuttadi loklok ka anasa ren diga vosiga ne Iesu la diga lok tin, “Una riki aonon i! Ia mumu asu dik la irak lox avurupit amisik dik.”

²⁴La ne Iesu ga lok ti mo latkin keretna, “Moroa ga riki ia xusu rinedi mene limixin me Israel diga on soogong.”

²⁵Nom latkin ga rongga i na la ga xis tiktikbu mi luvatgulom teren la ga lok, “Leeme Silok. Una lok tooro ia.”

²⁶La ne Iesu ga lok tin keretna, “Ixok mokso do ana lok ka lempangan anan at laxamdak la ana lu raba lubangman min.”^c

²⁷Ketla nom latkin ga lok, “Leeme Silok. I ruturun, ketla lubangman di anan bok lengkon mumus luxa im subu su boro vana at loxonin anan at luvuttadi atdi.”

²⁸La ne Iesu ga lok tin, “Latkin. Lunuunu ram i silok aleng. Aba lox epovo lisingising taram.” La ap mo mun loxonaleng loolik teren ga lox avukat ta.

Iesu Ga Lox Aroo Buaang Limixin

²⁹La ne Iesu ga vas kaxat mego la gat pas to loxon at lavatdan kis Galili. La ni ga vas urut at lakaana la gat kis go. ³⁰La buaang nedi limixin, diga vosiga i la diga lam ka limixin, lengkot atdi ga molo, la lengkatli main, la lentaba levengkikngen di la lengkangedek atdi ga lok kapmek; la lenbaalung baa la buaang bok nedi luvuttadi mi levenanmeres kerepmo, la diga lok ka di uto saparap ne Iesu la ni ga lox aroo di.

³¹Limixin diga sangu aleng atla diga ven lenbaalung baa diga paase; la luvuttadi mi levengkikngen di mi lengkangedek ga lok kapmek, diga lox avukat; la nedi di goxot pas gano, digat pas ta; la lengkatli main, diga reven; la diga emi asu aleng mi ne Moroa me Israel.

Iesu Ga Raba Luxa Buaang Limixin
(Mk 8:1-10)

³²Iesu ga ro xaka luvuttadi loklok ka anasa ren saparav i la ga lok, “A balamu aleng na limixin, mila ira vantun ta levenaleng nedi dik lox

^c 15:26 Limixin me Judaia diga so asen limixin petpes mi lubangman.

eburu minia, la kopmen ta tempanga anan kusu ridi ri anan. Axo para i do ana riki aonon gamasa nedi mi lantoxo atdi; lavanga dina meroxon mu langas uto at laramenemen atnedi.”

³³La luvuttadi loklok ka anasa diga sue i, “Ata ba lok ka tempanga anan ua at na lenep gamasa kusu naba epovo at na limixin solo?”

³⁴La ne Iesu ga sue di xeretna, “Lavanisa lengkongkide nemi mi ruuna i?”

La diga vorang i, “Lavanuti lengkongkide la lutpen mat lixilik bok.”

³⁵La ne Iesu ga tong i ri limixin kusu dina xis kopok at laxangka. ³⁶La ni ga lok ka lavanuti lengkongkide la lutpen mat la ni ga tong aorong ti ne Moroa, la ga sebeb i, la ga raba luvuttadi loklok ka anasa ren min; la diga raba limixin min. ³⁷La limixin axap diga anan la diga an mais. La melemu luvuttadi loklok ka anasa diga lok ka lavanuti leventat silok la diga suxa aumsu di mi lempanga anan limixin diga an ake ren. ³⁸Luutus atdi na lavatlok ga epovo at lavanuet larabin sangsangaun kobot (4000). Lavakin mi laxamdak la laxaalik lixilik kopmen di goxo nemen at na luutus. ³⁹Melemu Iesu ga riki aonon limixin uto at laramenemen atdi la ga los kas at lesebang la ga sen uto at lenep Magdala.

Diga Sing Ne Iesu Kusu Na Lok Tavanga Sangsangu

(Mk 8:11-13; Lu 12:54-56)

16 ¹Lubung Parisi mi lubung Sadiusi diga vosiga ne Iesu la diga vara i do neni na lok tavanga sangsangu xusu dina lok tong pen i. ²La ne Iesu ga lok tidi xeretna, “Do mi ven laxalibet i memele ukantinao, mi lok, ‘Laaleng naba lox avukat kantamak.’ ³La do maxantamak, mi lok, ‘Larakabu mo naba vot mila laxalibet i memele la lengkontakabu bok mo.’ Mi reven lavatbung menemen la laxalibet; la mi epovo ri tong asu lavasuun at na lempanga, ketla xopmen mina xasep at leveloklok katling ne Moroa im taba nimi min at na levenaleng. ⁴Limixin kapmek mo di on basinge vam ne Moroa, di vara tavanga sangsangu, ketla nia noxo lox ase di mi tara, ketla mina doma mumu loklok katling at ne Jona, no ga nemen at lavantun aleng kangking la lavantun aleng kanimin to xeneng at lebelen leemat.” La ne Iesu ga vas kaxat basinge di.

Levenanasa At Lubung Parisi Mi Lubung Sadiusi

(Mk 8:14-21)

⁵Iesu mi luvuttadi loklok ka anasa ren, diga los kas at lesebang la diga sen kaxat uto at lenep meo ap mo lavatdan kis. La luvuttadi loklok ka anasa diga domampe i xusu dina lok ka tengkongkide eburu midi. ⁶La ne Iesu ga lok tidi, “Mina lok tatao avukat nimi mumu laiis at lubung Parisi mi lubung Sadiusi.”^d

^d 16:6 Laiis i ru katling leveloklox ase at lubung Parisi mi lubung Sadiusi.

⁷La luvuttadi loklok ka anasa ren diga epaase kantubu atdi xeretna, “I vaase mo levelinga mila nedik kopmen ta lok ka tengkongkide.”

⁸Iesu ga xasep pam at levelinga atdi, kuren la ni ga sue di, “Tila mi emaangun pilo min kantubu atnimi, mumu lengkongkide xopmen mina lok ka i? Lunuunu atnimi i lixilik. ⁹Kovisi mina xasep. Kereva, mira domampe vam lavalimo lengkongkide aga sebex i ri lavalimo larabin sangsangaun kobot (5000) limixin? La lavanisa leventat nemi miga suxa i? ¹⁰Kereva, mira domampe vam lavanuet larabin sangsangaun kobot (4000) limixin aga raba di mi lavanuti lengkongkide? La lavanisa leventat miga suxa i? ¹¹Tila la mixo xasep do nenia xopmen ana paase rinimi mumu lengkongkide? Mina lok tatao avukat nimi mumu laiis at lubang Parisi mi lubang Sadiusi.” ¹²Melemu levendoxoma atdi ga xasep ba do, Iesu xopmen goxo paase ridi mumu laiis dik lox eburu i mi lengkongkide; ketla mumu levenanasa^e at lubang Parisi la lubang Sadiusi.

Pita Ga Tong Asu Lorooro At Ne Iesu

(Mk 8:27-30; Lu 9:18-21)

¹³Ap mo laaleng ne Iesu ga vot to at lenep kangka saparap lemenemen, Sisaria Pilipai, la ni ga sue luvuttadi loklok ka anasa ren, “Limixin di lok do nenia, Laradi Mevana, nege?”

¹⁴La diga vorang i rin keretna, “Lentaba di lok do nenu ne Jon laradi sep susu. Lentaba di tong i do nenu ne Elaia, la lentaba di tong i do nenu ne Jeremia kopla lara leeme vapaase alii me gano.” ¹⁵La ne Iesu ga sue di, “Kereva ba nimi? Nemi mi lok do nenia nege?” ¹⁶Simon Pita ga vorang i xeretna, “Nenu Lanarong, Nitna ne Moroa, Loro Avolo.”

¹⁷Iesu ga lok tin, “Luvukat tu, ne Simon lamdak at ne Jona, mila kopmen taradi ga tong asu i na ru, ketla ne Tamak no vana at laxalibet. ¹⁸Nia a tong i ru do, nenu ne Pita la nenu Luat Kis la nia aba vaxaru ka lotu rak to mavana ram, la limixin lolos at ne Satan diba lok tong i kusu dina sele utut kepe i, ketla di noxo epovo. ¹⁹Nia aba raba u mi lengki ri suang lumusaragu at Linintoo no vana at laxalibet. La mo leveloklok nenu u siam min kopla u sep pepe i nade xopok at na lavatbung menemen, ne Moroa naba siam min to vana at laxalibet.” ²⁰La neni ga vaase lolos ti luvuttadi loklok ka anasa ren do di noxo tong asu i na ri teta.

Iesu Ga Paase Mumu Lanmet Teren

(Mk 8:31–9:1; Lu 9:22-27)

²¹Ga se ap mo laaleng ne Iesu ga ru ka i xusu na tong i ri luvuttadi loklok ka anasa ren do neni na onon uto Jerusalem; la mo go loxongkulao

^e 16:12 Di goxo xasep do digak pakes kusu dina ru asepsu at levenanasa at lubang Parisi.

silok, lavamaasa silok la luvuttadi loklox ase at Lenavolo diba lox asongot aleng i la diba sev amer i la at laaleng sepsev avantun neni naba roo xat amlong.

²²Pita ga lam ka ne Iesu basinge luvuttadi loklok ka anasa la ga vaase sox i xeretna, “Leeme Silok. Nemen uta paase xeretnom. Na lempanga xapmek kopmen noxo vot saparav u.”

²³Iesu ga rem gili ri ne Pita la ga lok tin, “Uto u basinge ia. Nenu u lok ngan ne Satan. U vara i do una lok pe ia. U xopara na mu asu lavavara at ne Moroa, ketla u vara mun levendoxoma at limixin.”

²⁴La ne Iesu ga lok ti luvuttadi loklok ka anasa ren, “Mo do tara i vara i do na emu eburu minia, neni na domampe lorooro axap teren, la na gagas li i xusu nap kip losongsongot at levenaleng axap, la neni na mumu asu ba ia. ²⁵Do nege i vara i do na ranga alis lorooro ren, neni naba sang apkav i; ket do nege i soxope lorooro ren ti mumu asu ia, neni naba lok kaka lorooro avolo. ²⁶I lok kapmek do taradi na ruuna ka lempanga axap at na lavatbung menemen, ketla neni i subu basinge lorooro at ne Moroa. Laradi ixo epovo na un ka lorooro avolo. ²⁷Nenia, Laradi Mevana, mo anaba vot mi lisisixam silok at ne Tamak la eburu mi lubungangelo, la ap mo laaleng limixin axap dinaba lok kaka luunun i epovo mi leveloklok diga lox i. ²⁸La a tong tuturun i rinimi do lentaba atdi di tu de, di noxo met avot ti lovotpot tarak at laaleng nenia, Laradi Mevana, anaba vot ngan Loorong Silok.”

Moróa Ga Lox Arepukus Ne Iesu

(Mk 9:2-13; Lu 9:28-36)

17 ¹Melemu at lavanna levenaleng Iesu ga sat kaka ne Pita, Jems du lueton mi ne Jon, la diga urut uto vana xasep at lakaana. Nedi lavanuet kusuk mun digak lok. ²Ap mo loxot Moroa ga lox arepukus ne Iesu to melamgo at lavantun luvuttadi loklok ka anasa ren. Lemeran ga soosoo ngan laxangking la lempanga singsiga ren gan bun kerekngan lovottas i sovosok. ³La soso mun ne Moses la ne Elaisa duga rupot to melamgo atdi la duga epaase eburu mi ne Iesu.

⁴La ne Pita ga lok ti ne Iesu, “Leeme Silok. I lox avukat tinotno do mak lok de. Do u vara i, nia anaba xip tavantun taraugu kukuxut, tara ru, tara ri ne Moses la tara ri ne Elaisa.”

⁵Pita move ga paase la lusugao gamgames ga ravasi la ga vaa di; la diga ronga laxaka at lara boro at lusugao ga lok, “Ana ne Nuruk, mo a balamu i la a lok momo aleng min. Mina mumu asu levelinga ren.”

⁶Ga se luvuttadi loklok ka anasa diga ronga i na, diga subu tiding ti laxangka, la diga marat aleng. ⁷Ketla ne Iesu ga vosiga di la ga long tu atdi la ga lok tidi, “Mina xatu upana. Nemen mita marat.” ⁸La diga milik aurut upana la di goxo ven tara, Iesu xusuk mun mo gak lok.

⁹Diga si at lakaana la ne Iesu ga tong lolos i ridi do, “Nemen mita tong i na ri teta, se nenia, Laradi Mevana, anaba roo xat amlong basinge lanmet.”

¹⁰La luvuttadi loklok ka anasa ren diga sue i, “Ua lavasuun teren la luvuttadi loklox ase at Lenavolo di tong i do ne Elaisa ba rupot avot ti Lanarong?”

¹¹La ne Iesu ga vorang i ridi, “I ruturun tino. Elaisa ba rupot avot la ba lox amokso lempanga axap. ¹²Ketla a tong i rinimi do ne Elaisa ga vot pam la limixin di goxo ven kibis i, la diga lok lempanga xapmek tin kerekngan diga vara i. La kuren mun diba lox asongor ia, Laradi Mevana.” ¹³La luvuttadi loklok ka anasa diga xasep ba do ne Iesu ga paase mumu ne Jon, laradi sep susu.

Iesu Ga Riki Asu Lagas Basinge Lara Lamdak

(Mk 9:14-29; Lu 9:37-43a)

¹⁴Iesu mi luvuttadi loklok ka anasa ren digat pas la diga ekip tangarang mi limixin buaang, la lara laradi ga vot pasa ne Iesu la ga xis tiktikbu mi luvatgulom teren. ¹⁵La ni ga lok, “Leeme Silok. Una balamu lamdak tarak. Ing kanovot amisik mi lobomet la i ekip tangarang aleng mi laxasongsongot. La im subu tup amisik at laxao la at ladan. ¹⁶Nia a lam ka i saparap luvuttadi loklok ka anasa ram kusu dina lox aroo i, ketla dixo epovo.”

¹⁷La ne Iesu ga lok, “Limixin at na levenaleng kopmen tunuunu atnimi la levendoxoma atnimi i onon soogong. Lavanisa aleng tinotno nenia aba xip tutu mi levenmumuat atnimi? Nemi mi lox amolo ia. Una lam ka lamdak ude.” ¹⁸La ne Iesu ga vaase lolos ti mo lagas, la lagas ga sixisu basinge nom lamdak. La ap mo mun loxonaleng lamdak ga lox avukat ta.

¹⁹Melemu luvuttadi loklok ka anasa xusuk mun diga vosiga ne Iesu la diga sue i, “Ua lavasuun teren la nema ma xo epovo xusu mana riki kepe nom lagas?”

²⁰La ne Iesu ga vorang i ridi xeretna, “Lunuunu atnimi i lixilik aleng. Do mi ruuna lunuunu i xakalik kerekngan liit mastet, nemi miba epovo na lok ti na lakaana, ‘Una vas kaxat mede la uto at toxot petpes,’ la ni ba rongga res. La miba epovo na lok lempanga axap bok. ²¹[Lisingising kusuk mene impana ri riki xepe lagas kapmek keretnom.]”

Iesu Ga Paase Manga Mumu Lanmet Teren

(Mk 9:30-32; Lk 9:43b-45)

²²Gase ne Iesu eburu mi luvuttadi loklok ka anasa diga vot eburu ro Galili, Iesu ga lok tidi, “I auret kusu limixin diba ranga alis ia, Laradi Mevana la diba song araba ia ri limixin esep. ²³La diba sev amer ia; ketla melemu nenia anaba roo xat amlong bok at laaleng sepsev avantun.” La luvuttadi loklok ka anasa diga bulu aleng.

Lexekepe Pilas Ti Loogu Laplavang

²⁴Iesu eburu mi luvuttadi loklok ka anasa ren diga rupot to Kaprnaum, la luvuttadi loklok ka pilas diga vosiga ne Pita la diga sue i, “Kereva, laradi loklox ase ram i kepe pilas bok ti loogu laplavang?”

²⁵La ne Pita ga vorang i, “Laaba.”

Pita ga vot to at loogu ne Iesu gak lok teren, la ne Iesu ga vaase avot tin, la ga lok, “Simon. Kereva lodoxoma ram? Lavaorong silok at na lavatbung menemen di lok ka pilas meva? At limixin at lenep silok atdi kopla at limixin boro vetpes?”

²⁶Pita ga lok, “At limixin boro vetpes.”

La ne Iesu ga lok, “I ven ngan ta do limixin mede kopmen di noxo kepe pilas. Kuren la ixo epovo do neda ta kepe pilas. ²⁷Ketla ta noxo lox amusak nedi na limixin. Kuren la unat pas uto at lavatdan kis la una xanom. La leemat avot una rep ka i, uba long lenget ka legesa derakma silok to xeneng at lungusno la mo legesa derakma silok naba epovo rida kusu ri kepe pilas ti loogu laplavang.”

Nege I Silok At Linintoo At Ne Moroa

(Mk 9:33-37; Lu 9:46-48)

18 ¹Ap mo mene loxonaleng luvuttadi loklok ka anasa at ne Iesu diga vot pasa i la diga sue i, “Nege i silok at Linintoo boro vana at laxalibet?”

²La ne Iesu ga ro ka lara lamdak, la ga vaxaru i ro melamgo atdi, ³la ga lok, “A tong tuturun i rinimi, tara do ixo leeng basinge laxakapmek teren la ixo lok ka luruptuvuk at laxamdak kakalik, neni xopmen na epovo do na vubeles at Linintoo no vana at laxalibet. ⁴Laradi do i lox asi i se luruptuvuk teren i lok ngan luruptuvuk at lamdak livilik, mo laradi naba ruuna ka laasen i silok aleng at Linintoo no vana at laxalibet. ⁵La do nege i seega rangarang tamdak keretna at laasen tarak, i lok ngan ta do neni i seega rangarang ia.”

Leveloklok Tong Pen Mo Naba Vot

(Mk 9:42-48; Lu 17:1-2)

⁶La ne Iesu ga lok bok, “Naba lok kapmek aleng ti tara do na lox asubu tara atdi na laxamdak kakalik di nuunu rak. Ba lox avukat tin do dina xoxo li tangsangan tuat to at laxaka ren la dina dong asi i min uto xopok at lisimaramain. ⁷I lok kapmek aleng ti limixin do lentaba lempanga mo i lox asubu lunuunu atdi basinge ia. Lempanga xerepmo naba vot, ketla naba lok kapmek ti lara i lok kaxar i! ⁸Mo do lakngam mi laxangkedek taram na lox asubu lunuunu ram, una ra korop pes i la una lu xepe min. I lox avukat do una beles at lorooro avolo mi tenep mene at luxangkedek mi lukngam; lavanga ne

Moroa na lu arup minu at laxao at lemenemen songsongot i nemen amisik. ⁹La do laxatli ram na lox u la lunuunu ram na subu, una lik gogo su min la una lu xepe min. I lox avukat do una beles at Linintoo mi tegesa xatli mun; lavanga ne Moroa na lu arup minu ro at laxao mo do u ruuna legepu xatli.”

Lisipsip Ga Soogong

(Lu 15:3-7)

¹⁰La ne Iesu ga lok bok tidi, “Nemen mita sok tixirixes kepe tara at na laxamdak kakalik mila lubang angelo atdi dit pot pasa amisik ne Tamak to vana at laxalibet. Nia a tong tuturun i. ¹¹[La nenia, Laradi Mevana, aga vot kusu ana puse rinedi diga soogong la ana lox arooro di.]”

¹²La ne Iesu ga tong lavapaase poovo ridi, “Dola tara atnimi i ruuna legesa sangaun kobot (100) laxasipsip la legesara atdi na soogong, neni ba lok lavanga salai? Neni ba on basinge lavasik sangaun mi lavasik laxasipsip to at lenep avukat, la ni nabat pas kusu na ven ti mo legesara no ga on soogong, i se ni naba long lenget ka i. ¹³Nia a tong tuturun i do, mo neni na vuse ka i, neni ba lok momo aleng; lomomo ren ba volo lomomo ri mo lavasik sangaun mi lavasik di goxo soogong. ¹⁴La kuren mun ne Temen nimi no vana at laxalibet i xopara i do legesara atdi na laxamdak lixilik na soogong basinge i.”

Uba Lok Tooro Netam Mo Do I Subu At Laxakapmek

¹⁵La ne Iesu ga lok bok tidi, “Mo do netam i lok tavanga i lok kapmek tu, una vosiga i la una vaxase i mi mo losoogong teren, ketla mo lavanga nak lok kantubu xusuk mene atnumu. Mo do ni i ronga res at levelinga ram, ura lok kaka amlong pam i ri langas in mantan. ¹⁶Ket do ixo ronga res at levelinga ram, una lok ka bok tegesara xopla tegepu radi eburu minu xusu miba epen mi levelinga atnimi lavantun; kerekngan lovoang kaala i tong i do, ‘Levenekarakat bak mokso mo do tegepura xopla tavantun dina epen mi levelinga.’ ¹⁷Ket do ixo ronga di, una tong i ri limixin axap di nuunu. La do ixo ronga res at limixin nuunu, mina sok tixirixes kepe i ngan lavamolon kopla laradi loklok ka pilas.”

¹⁸La ne Iesu ga lok bok tidi, “Nia tong i rinimi do; mo levelinga u siam min kopla u sep pepe i nade xopok at na lavatbung menemen, Moroa naba siam min to vana at laxalibet.

¹⁹Ana tong box i rinimi do tegepura du mulus do duna sing ti tavanga du vara rin, ne Tamak no vana at laxalibet naba raba du min, ²⁰mila do legepura xopla lavantun di vot buru xusu dina sing ia xeneng at laasen tarak, nenia mo ak lox eburu midi.”

Mina Doxoma Xepe Laxakapmek At Luvutneton Nimi

²¹Melemu Pita ga vot posiga ne Iesu la ga sue i, “Leeme Silok. Nenia aba domampe xepe laxakapmek at netak i lox i ria naba vanisa? Ba vanuti?”

²²La ne Iesu ga vorang i xeretna, “Nia a tong i ru. Kopmen do una doxoma xepe laxakapmek teren na vanuti mene, ketla lavanuti sangaun mi lavanuti.

²³Ana vaase u mi na, mila Linintoo no vana at laxalibet i lok keretna. Lara loorong silok mo ga doxoma i do nakling lugugu pilas ap mo luvuttadi gugu ren. ²⁴Se neni ga vaxaru kaxat ka lugugu ren, lara ap mo luvuttadi gugu ren diga lox abeles i, ga lok ka legesa sangaun larabin sangaun kobot talen. ²⁵Ketla neni goxo epovo na vorang mo lempilas; kuren la loorong silok ga tong lolos i ri mo laradi gugu kusu neni mo diba sesep min eburu mi latkin teren la laxamdak kakalik atdu, la lempanga axap neni ga ruuna i kusu ri vorang mo lempilas.

²⁶Laradi gugu ga xis tiktikbu mi luvatgulom teren la ga lok ngangao ro melango at loorong silok la ga sing aleng i, ‘Una balamu ia, la aba sepo axap ba lempilas taram melemu.’ ²⁷Loorong silok ga balamu i, kuren la neni ga doma xape axap mo langangan lempilas na laradi gugu ga lok ka i la loorong silok ga soxomus asu i.

²⁸Melemu mo laradi gugu ga vas su la ga ekip tangarang mi lara laradi gugu bok mo neni ga raba vam i mi legesa sangaun kobot denarias. Neni ga ranga alis i la ga long kukung kaka i la ga lok, ‘Una sepo lempilas tarak.’ ²⁹La mo laradi ga xis tiktikbu mi luvatgulom teren la ga sing i xeretna, ‘Una balamu ia la melemu aba vorang i!’

³⁰Ketla neni goxopara, la ga lok ka mo laradi la ga lox abeles i ro at loxokoxo kusu na nemen go se at laaleng neni naba vorang amlong mo lempilas teren. ³¹Se lentaba luvuttadi gugu diga ven na lavanga, diga bulu aleng. La digat pas uto at loorong silok la diga tong asu mo lempanga axap tin.

³²La neni ga ro xaka mo laradi gugu ukeneng la ga lok tin, ‘Nenu laradi xapmek; aga doma xape axap lempilas nenu uga lok ka i rak, mila uga sing ia. ³³Kereva, uxu epovo na balamu mo laradi xerekngan nia aga balamu u?’ ³⁴Loorong silok ga musak, la ga lox abeles mo laradi gugu uto at loxokoxo, kusu na nemen at losongsongot naba se at laaleng neni naba vorang axap mo lempilas.”

³⁵La ne Iesu ga lok, “Ne Tamak no vana at laxalibet naba lok mun nimi xuren do nemi mi noxo domampe laxakapmek tara i lox i rinimi.”

Iesu Ga Paase Mumu Loklok Ti Tara Korop Epot

(Mk 10:1-12)

19 ¹Iesu ga vaase axap mo levelinga, la ni ga vas kaxat mego Galili la gat pas uto at lenep Judaia at lenep dan meso at ladan sen Joridan.

²La buaang nedi limixin diga mumu asu i la neni ga lok aroo nedi go.

³Lentaba lubang Parisi diga vot pasa ne Iesu la diga lok tong i mi lara lususue xeretna, “Kereva, Lenavolo atdik i mulus bok kusu tara na soxope latkin teren mumu mene tepanga gamasa mun?”

⁴La ne Iesu ga vorang di xeretna, “Nemi mina xasep do Lovoang Kaala i tong i do ganoxa at lurutu kaxat Moroa ga rudum li lavatlok la lavakin.

⁵La ni mun lavasuun at nai la ne Moroa ga lok do laradi remes naba on basinge ne temen mi nenen la nak lox eburu mi latkin teren la nedu dunak lox eburu ngan mun legesara. ⁶La nedu du noxo lok ngan bok ba legepura, ketla legesara. Kuren la kopmen tara noxo ra korop leepot at leremes mi latkin teren, mila ne Moroa axa ga ven etang du.”

⁷La lubung Parisi diga sue i, “Tila ba ne Moses ga raba nama mi levelinga, do tara na malagan tevelinga axasep ti latkin teren do neni mo i xopara na epot ta ren la na riki xepe i?”

⁸La ne Iesu ga lok, “Moses ga raba nemi mi nom mila lebelen at lavalabat atnimi ga vat ken, ketla at lurutu kaxat kopmen goxo lok kuren. ⁹A tong tuturun i rinimi; do laradi i soxope latkin teren la kopmen goxo lok loklok ti longka, mo laradi ira longka vam mo do i epot at lara latkin petpes manga.”

¹⁰La luvuttadi loklok ka anasa ren diga lok tin, “Mo do i lok kuren kantubu at leremes mi latkin, i lox avukat do keke leepot.”

¹¹La ne Iesu ga lok, “Na laanasa rik lok naa kopmen na vung pavaa limixin axap, ketla tinedi xusuk mun ne Moroa i raba nedi min. ¹²Buaang levempasuun mo ik lok, tila la lavatlok kopmen dina epot; lentaba mumu i do diga visik axa di xuren; lentaba mumu nga i do limixin diga lok di xuren kusu di noxo epot; la lentaba dixo epot mila, di raba lorooro atdi kusu dina gugu ngan nedi lavaanat at ne Moroa. Nege do i epovo na siam ka na laanasa ti ke leepot, i vukat do neni na mumu asu i.”

Iesu Ga Lox Anarong Laxamdak Mi Laxaalik Kakalik

(Mk 10:13-16; Lu 18:15-17)

¹³Lentaba limixin diga lok kaka laxamdak mi laxaalik kakalik atdi uto at ne Iesu kusu neni na lok li lukngen mavana atdi la na sing tidi; ketla luvuttadi loklok ka anasa ren diga ven di la diga sep pepe di.

¹⁴La ne Iesu ga lok, “Mina ke laxamdak mi laxaalik kakalik dina vot pasa ia; la nemen mita sep pepe di, mila Linintoo no vana at laxalibet i epovo ridi na.” ¹⁵Iesu ga lok li vam lukngen mavana atdi, la ni ga vas kaxat ta.

Laradi Gapnovos

(Mk 10:17-31; Lu 18:18-30)

¹⁶Lara laradi ga vosiga ne Iesu la ga sue i, “Laradi loklox ase. Anaba lok lavanga avukat salai kusu anaba lok ka lorooro avolo?”

¹⁷La ne Iesu ga vorang i xeretna, “Ua lavasuun teren la u sue ia mi lavanga salai i lox avukat? Legesara mun i lok avukat la neni ne Moroa. Do u vara na vubeles ti lorooro, una ronga res at lasangaun lenavolo.”

¹⁸La nom laradi ga sue, “Ua lentaba?”

La ne Iesu ga lok,

‘Nemen uta sev amet tara, nemen utang longka tixin, nemen uta xip pilo, nemen uta xarang taba mumu tara mi levelinga xaxarang, ¹⁹una lok ngangao at ne tamam mi nenam, la una balamu nedi di nemen saparav u xerekngan u balamu xa u.’ *Pas 20:12-16*

²⁰La nom laradi ga lok, “Nia aga mumu asu na levelinga axap. Lavanga salai bok move nia ak pakes tin?”

²¹Iesu ga vorang i rin keretna, “Do u vara loklok taram nak mokso aleng, una sesep mi lempanga axap taram, la una raba lempilas at nom lempanga ri limixin banbalo la unaba ruuna ka lapnovos silok to vana at laxalibet. La una mumu asu ba ia.”

²²Nom laradi ga ronga i na, la ni ga vas kaxat mi lainbulu silok mila neni gapnovos aleng. La ni ga vas kaxat ta.

²³La ne Iesu ga lok ti luvuttadi loklok ka anasa ren, “A tong tuturun i rinimi. I lolos aleng do laradi nopnovos na vubeles at Linintoo no vana at laxalibet. ²⁴Ana tong box i xeretna. I lolos aleng do lavatkamel na vubeles at lamamara at linil, la kerepmo i lolos aleng bok ti laradi nopnovos kusu ri beles at Linintoo at ne Moroa.”

²⁵Luvuttadi loklok ka anasa diga ronga i na, la diga sanganu aleng la diga sue ne Iesu, “Nege ba naba lok kaka lorooro avolo?”

²⁶La ne Iesu ga ven tooro di la ga lok, “Kopmen na epovo do taradi na lox i na, ketla i epovo do ne Moroa na lok lempanga axap.”

²⁷La ne Pita ga lok tin, “Kereva ba nama, maga on basinge vam lempanga axap atnama kusu mana mumu asu u. Lempanga salai mo ne Moroa ba raba nama min?”

²⁸La ne Iesu ga vorang i ridi, “Nia a tong tuturun i rinimi. At laaleng ne Moroa na lox amaxat lempanga axap, ap mo laaleng nenia, Laradi Mevana, anabat kis at loxonin orong tarak mi lisisixam silok tarak, la nemi mi mumu asu ia, mibat kis bok at lasangaun mi legepura lengkot kitkis orong la mibang tonga linga at lasangaun mi legepura levenbibinat at limixin me Israel. ²⁹La nedi axap diga on basinge laraugu atdi, luvutneton di, luvurinen di, luvuttemen di, luvutnen di, laxamdak mi laxaalik kakalik atdi, la leventaamang atdi kusu dina lok lugugu rak, nedi dinaba ruuna ka laxampanga solo la dinaba rooro amisik at lorooro melemu. ³⁰Ketla buaang limixin di ruuna laasen silok at na lorooro, di noxo silok at lorooro melemu; la nedi kopmen dina silok at na lorooro, dinaba silok at lorooro melemu.”

Luunun Ti Luvuttadi Diga Gugu

20 ¹La ne Iesu ga lok bok ti luvuttadi loklok ka anasa ren, “Linintoo no vana at laxalibet i lok keretna. Lara laradi mo ga suubu suu maxantamak, kusu na lok ka tuvuttadi kusu dina gugu ro at laraamang

vaen teren. ²Mo laradi ga mulus kusu na un nedi mi legesa denarias at leges aleng, la neni ga riki aonon ta di uto at laraamang vaen.

³At lavasik konaleng neni gat pas manga uto at loxot etang, la ga ven manga lentaba luvuttadi mo diga tu onon nava mun go. ⁴La neni ga lok tidi, ‘Nemi bok minat pas la mina gugu ro at laraamang vaen tarak, la nia aba un nimi mi luunun i epovo at lugugu.’ ⁵La diga vas kaxat.

At lasangaun mi legepu xonaleng la at lavantun konaleng neni ga lok box i xuren. ⁶Ga auret kusu na valimo konaleng la ni gat pas manga uto at loxot etang la neni ga ven manga lentaba luvuttadi mo diga tu go, la ni ga sue di, ‘Kereva, mia tu gamasa mun nade at na laaleng axap la kopmen mina lok tepanga?’

⁷La diga lok tin, ‘Kopmen tara na lok kaka nama ri gugu.’

La ni ga lok, ‘Minat pas la mina gugu bok to at laraamang vaen tarak.’

⁸Ukantinao at lavanna konaleng temen laraamang vaen ga lok ti laradi loklok tatao at luvuttadi gugu, ‘Una xup kaka luvuttadi gugu la una un nedi mi luunun atnedi; una ru ka i atnedi nia a lok ka nedi ri lugugu na ukantinao at lavalimo konaleng la naba xap atnedi, nia a xup ka avot di maxantamak suubu.’

⁹Luvuttadi diga gugu kaxat at lavalimo konaleng diga lok ka legesa denarias ti legetgesa radi. ¹⁰La nedi mo laradi gomgo ga xup kaka avot nedi, diga vot la diga nua i do dinaba xip ka mavana lixilik ap mo luunun, ketla nedi getgesara diga lok ka bok legesa denarias. ¹¹Diga lok ka mo lempilas la diga ru ka i xusu dina paase mukmusak ti ne temen mo laraamang. ¹²Diga lok, ‘Na luvuttadi nenu ua xup kaka amupit di, la di gugu at loxonaleng lixilik mun; la nema ma gugu at na laaleng axap maxopok at na liplivi at laxangking, ketla luunun atdi i lok ngan bok atnama.’

¹³Ketla temen laraamang ga lok ti legesara atdi, ‘Lentangas tarak, axo bala vukpux u. Nenu xa u siam do aba un u mi legesa denarias at leges aleng. ¹⁴Una lok ka lempilas taram la una onon uto xolonu. A vara i do ana un na luvuttadi di mupit mi lempilas buaang kerekngan mun a un u min. ¹⁵Ik mokso ria do ana lok lavanga salai mi lempilas tarak. La nenu u paase mumu parang ia mila nenia laradi ramtaba.”

¹⁶La ne Iesu ga lok, “La kerepmo bok nedi di mumupit at na lorooro, dibam gomgo at lorooro melemu la nedi dim gomgo, diba mumupit.”

Iesu Ga Tong Asu Lanmet Teren
(*Mk 10:32-34; Lu 18:31-34*)

¹⁷At lavatpas at ne Iesu uto Jerusalem, ni ga lam ka lasangaun mi legepura luvuttadi loklok ka anasa ren to basinge limixin la ga lok tidi, ¹⁸“Nedik taba onon uto Jerusalem la lara laradi naba song araba ia, Laradi Mevana, ri lavamaasa silok eburu mi luvuttadi loklox ase at

Lenavolo. Nedi diba lok li ia at lavapaase la diba lok li lumumuat tarak do nenia aba met. ¹⁹La diba song araba ia ri limixin esep boro Rom kusu dina lok sese kapmex ia la dibak pixis ia la diba vaxarem ia at laxaba. Melemu at laaleng sepev avantun nenia anaba roo xat amlong.”

Nenen Ne Jon Mi Ne Jems Ga Lok Lising Ti Ne Iesu

(Mk 10:35-45)

²⁰Melemu latkin at ne Sebedi ga vot parap ne Iesu mi lumdak teren; la ni ga xis tiktikbu mi luvatgulom teren to melamgo at ne Iesu, la ga vara sing i mi tara tavanga.

²¹La ne Iesu ga sue i, “U vara lavanga salai?”

La ni ga lok, “Una siam do na lumdak tarak dubat kis saparav u at Linintoo ram, lara ro at latno la lara at liviang taram.”

²²Ketla ne Iesu ga lok, “Mixoklen lai nemi mi sing tin.”

La ni ga lok ti mo luradi loklok ka anasa ren, “Kereva, mu epovo do muna suma losongsongot silok eburu minia mo a gagas kusu aba xip tutu min?”

La duga vorang i rin keretna, “Ma epovo.”

²³La ne Iesu ga lok, “I ruturun do nemu muba suma levesongsongot silok; ketla kopmen lugugu rak do nia aba tong i do nege bat kis to at lakngak tino la at lakngak kia. Mo luxot ik lok mun tinedi ne Tamak gara soxolik ka vam di.”

²⁴Se lasangaun luvuttadi loklok ka anasa diga ronga i na, diga edak du.

²⁵La ne Iesu ga ro bubua ka di la ga lok, “Miklen i do luvuttadi amgomgo at limixin kopmen di me Judaia, di ruuna lololos mavana at limixin atdi.

²⁶Ketla nemen gat na loklok nak lok kantubu atnimi. Mo do tara atnimi i vara i do na silok, neni na lok ngan lasaxaruki atnemi axap. ²⁷La do tara atnimi i vara i do nam gomgo, neni na lok ngan lasaxaruki gamasa atnimi. ²⁸Nenia Laradi Mevana la loklok tarak ik lok bok kuren. Nia xopmen a goxo vot kusu limixin dina ba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk tidi buaang limixin.”

Iesu Ga Lox Aroo Luradi Lengkatli Atdu Ga Main

(Mk 10:46-52; Lu 18:35-43)

²⁹Iesu eburu mi luvuttadi loklok ka anasa ren, diga vas kaxat basinge lemenemen Jeriko, la buaang limixin diga emu eburu midi. ³⁰La legepu radi, lengkatli atdu ga main, mo dugat kis at lisigege ngas. Se duga ronga i do ne Iesu ga vas polo du, duga xup keretna, “Leeme Silok. Livisik li at ne Devit. Una balamu nama’.”

³¹La mo limixin diga tong i ridu do duna lok pilo, ketla dugap kup aleng, “Leeme Silok. Livisik li at ne Devit. Una balamu nama’.”

³²La ne Iesu ga ru la ga ro xaka du la ga sue du, “Lavanga salai mu vara i do ana lox i rinumu?”

³³Duga vorang i xeretna, “Leeme Silok. Ma vara i do lengkatli atnama’ na xasep.”

³⁴Iesu ga balamu du la ga long tu at lengkatli atdu. La soso mun lengkatli atdu ga xasep la duga mumu asu ne Iesu.

Iesu Ga Beles To Jerusalem Ngan Loorong Silok

(Mk 11:1-11; Lu 19:28-40; Jo 12:12-19)

21 ¹Iesu mi mo limixin buaang diga vas auret lemenemen silok Jerusalem, la diga rupot to at lemenemen Betpage gak lok at Lakaana Olip. La ne Iesu ga riki amgo legepu radi loklok ka anasa ren. ²Avot be ni ga lok tidu xeretna, “Munat pas uto at nom lemenemen ik lok to melamgo atnumu; la soso mun munaba long lenget ka lodongki eburu mi lodongki maxat teren, mo diga xoxo li du go. Muna soxomus ka du la muna lok ka du ude. ³Mo do tara na sue numu do, “Tila nemu mu soxomus ka i nom ludongki,’ muba lok tin do Leeme Silok i vara du la soso mun neni ba raba numu midu.”

⁴Anai ga ravasu xusu na lox asorun levelinga at ne Moroa lara leeme vapaase alii ga tong asu i,

⁵“Una tong i ri limixin to Jerusalem do, ‘Pen ba i. Loorong Silok atnimi it pas saparap nimi, neni laradi loklok mulus mene la it kis at lodongki, ni lodongki maxat.” *Sak 9:9*

⁶La mo luradi loklok ka anasa duga mumu asu levelinga at ne Iesu. ⁷Dugat pas la duga lok ka nom lodongki eburu mi lodongki maxat teren; duga lok li levempanga singsiga atdu teren la ne Iesu ga xis teren. ⁸La buaang limixin diga sa li levempanga singsiga atdi ro at langas. La lentaba vetpes diga ra ka lengkakan bisi la diga lok li mu langas min. ⁹La nedi buaang limixin digat pas to melamgo la nedi axap digat pas melemu digap kup keretna,

“Ata emi asu mi livisik li at ne Devit. Luvukat ti na laradi it pas mi laasen at Leeme Silok. Ata emi asu aleng min.” *Sam 118:26*

¹⁰Se ne Iesu ga beles at lemenemen silok Jerusalem, limixin axap diga sangu la diga esue xeretna, “Nege mo?”

¹¹La mo buaang limixin diga emu mi ne Iesu diga vorang i ridi xeretna, “Na ne Iesu, leeme vapaase alii boro Galili at lemenemen Nasaret.”

Iesu Ga Beles To Xeneng At Loogu Laplavang

(Mk 11:15-19; Lu 19:45-48; Jo 2:13-22)

¹²La ne Iesu ga beles ukeneng at loogu laplavang la ga xala su mi limixin diga unun panga la limixin diga sesep mi lempanga atdi. La ni ga ba gili levenora lili atnedi digak lox ekun lempilas la ga ba gili

levengkonin kitkis atnedi diga sesep mi levenamno. ¹³La ni ga lok tidi, “Levelinga at ne Moroa ik lok keneng at Lovoang Kaala i lok keretna, ‘Loogu rak diba so asen i mi loogu singising.’” *Ais 56:7*
Ketla nemi mira lok pam i, i ngan loogu loklox alipe at luvuttadi dip sep paxat ka panga.”

¹⁴Limixin mi lengkatli atdi ga main digat posiga i la nedi bok lengkangedek atdi ga lok kapmek digat posiga i la ni ga lox aroo di. ¹⁵Ket lavamaasa silok la luvuttadi loklox ase at Lenavolo diga ven mo lagale lempanga sangsangu ren, la diga rongga levelinga at laxamdak mi laxaalik kakalik digap kup keretna, “Ata emi asu mi livipisik li at ne Devit.” La nedi diga musak. ¹⁶La diga lok tin, “Kopmen nak mokso na levelinga at na laxamdak mi laxaalik.”

La ne Iesu ga lok tidi, “Mina domangke at na levelinga ik lok at Lovoang Kaala i lok keretna, ‘Nenu ne Moroa ura lox ase vam laxamdak mi laxaalik kakalik eburu mi lengkadede kusu dina emi asu minu.’” *Sam 8:2*

¹⁷La ne Iesu ga vas kaxat basinge di la ga vas su at lemenemen silok Jerusalem la uto Beteni, la ga midi go at laxanimin.

Iesu Ga Vaase Sok Luuna Pik

(Mk 11:12-14, 20-24)

¹⁸Ga maxantamak suubu at lomlong teren uto at lemenemen silok, Iesu ga roxo. ¹⁹La ni ga ven luuna pik go at lisigege ap mo langas la ni ga vas li ren kusu na dik ka teveven una, ketla ni goxo ven lenget ka tempeven teren, ga vavaxan gamasa mene. La ni ga lok ti mo luuna pik, “U noxo visik bok ba tempeven una!” La soso mun luuna pik ga mang ta.^f

²⁰Luvuttadi loklok ka anasa diga ven i na la diga rakdu aleng, la diga sue i, “I lok kereva na la ira mang soso?”

²¹La ne Iesu ga lok tidi, “A tong tuturun i rinimi; mo do mina nuunu ruturun at ne Moroa la kopmen lodoxoma atnimi na sixit ekarakat at levelinga ren, miba epovo do mina lok mun lempanga xerekngan nia a lox i ri na luuna pik. La kopmen na xusuk mun i, ketla miba epovo bok do miba vaase lolos ti na lakaana, la ni na xatu kaxat la na subu tup ti laras. ²²Do mi ruuna lunuunu ruturun, ne Moroa naba raba lovoporang ti mo lempanga mi sing tin.”

Lususue Mumu Lololos Ne Iesu Ga Gugu Min

(Mk 11:27-33; Lu 20:1-8)

²³Iesu ga vubeles uto at loogu laplavang, la neni ga anasa limixin, la lavamaasa silok mi loxongkulao silok at lubungmixin me Judaia

^f **21:19** Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan.

diga vosiga i la diga lok, “Lololos salai nenu u ruuna i xusu ri lox i na lempanga? La nege ga raba u mi nom lololos?”

²⁴La ne Iesu ga vorang i ridi xeretna, “Ana sue bok nimi mi lara lususue, la do mina vorang avukat taba ia min, aba vaase axasep ba nimi, do nenia a lok na lempanga mi lololos salai. ²⁵Lesep susu at ne Jon ga laa meva, boro at ne Moroa koplā boro mun at limixin?”

La diga epaase xantubu atdi, la diga lok, “Mo do ata lok ‘Boro at ne Moroa,’ neni naba lok tidik keretna, ‘Tila ba mi goxo nuunu at levelinga at ne Jon?’ ²⁶La mo do ata lok, ‘Boro at limixin,’ ata marat bok at limixin, mila di nuunu do ne Jon neni leeme vapaase alii.”

²⁷Kuren la diga lok ti ne Iesu, “Maxoklen i.”

La ne Iesu ga lok tidi, “Nia bok a noxo tong i rinimi do, nenia a lox i na lempanga mi lololos salai.”

Iesu Ga Vaase Asu Leretere Mumu Lumdak La Ne Temen Du

²⁸La ne Iesu ga lok bok tidi, “Mina doxoma avukat i na. Lara laradi ga ruuna lumdak; la ni ga vot pasa mo lamdak avot la ga lok, ‘Nuruk, a vara i do unat pas uto at laraamang vaen mo lingina la una gugu.’

²⁹La ne nitna ga lok, ‘Nia a noxot pas.’ Ketla melemu neni ga lox ekun lodoxoma ren la gat pas.

³⁰La neni ga vot pasa manga lamdak sepsev agepura la ga vaase manga rin mi lempapaase kerekngan neni ga vaase avot pam min ti lamdak avot; la mo lamdak ga lok, ‘Tamak, nia anaba lox i.’ Ketla neni goxot pas.

³¹Ua lara atdu na ga lok lugugu ne temen du ga tong i?”

La diga lok, “Mo lara avot.”

Kuren la ne Iesu ga lok tidi, “A tong tuturun i rinimi do; luvuttadi loklok ka pilas la lavakin ngarangat mo dibam gomgo avot tinimi uto at Linintoo at ne Moroa. ³²Lavasuun teren keretna; Jon, laradi sep susu, ga vosiga nimi la ga vavang tinimi mi loklok mokmokso kusu mina mumu i, ketla mi goxo nuunu ren; ketla luvuttadi loklok ka pilas mi lavakin ngarangat diga nuunu ren; miga ven nedi diga leeng, ketla nemi mi goxo leeng la mi gita nuunu ren.”

Lavapaase Poovo Ti Luvuttadi Kapmek Diga Lok Tatao Laraamang

(Mk 12:1-12; Lu 20:9-19)

³³La ne Iesu ga lok bok tidi, “Mina ronga bok na lara lavapaase poovo. Lara laradi ga ruuna loxongangka la gatlo laraamang vaen teren. La ni ga bos kangkan i la ga xe lamamara kusu ri loplok li levendan vaen teren; la melemu ga lok loogu xukuxut. La ni ga raba lentaba luvuttadi min kusu dina lok tatao i la neni ga vas kaxat uto at lenep petpes. ³⁴Laaleng ga vot kusu dina dik ka lempeven una at nom laraamang, laradi at laraamang ga riki lentaba lavasaxaruki ren kusu dina lok ka mo levempeven una.

³⁵Ketla nom luvuttadi loklok tatao at laraamang diga ranga alis di la diga tit pupu lara, diga sev amet lara la diga lu amet lara sepsev avantun. ³⁶La neni ga riki lavasaxaruki vetpes bok uto saparap di, buaang atdi digat pas ugo; ketla luvuttadi loklok tatao diga lok kapmek di kerekngan nedi no avot. ³⁷La at laxavaxap neni ga riki ne nitna. Neni ga lok, 'Nedi diba lok ngangao at lamdak tarak.'

³⁸Ketla luvuttadi loklok tatao diga ven ne nitna gat pas go boro, la diga lok, 'Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.' ³⁹La diga ranga alis i la diga lu asu min ukamang ap mo laraamang la diga sev amer i."

⁴⁰La ne Iesu ga sue di, "At laaleng laradi at nom laraamang naba vosiga nom luvuttadi loklok tatao, neni naba lok lavanga salai ridi?"

⁴¹Diga vorang i rin keretna, "Neni naba sev amet di la naba raba nom laraamang ti luvuttadi vetpes kusu dina lok tatao i la at laaleng ti sep kin dinaba raba i mi loxot teren at lempeven una at nom laraamang."

⁴²La ne Iesu ga lok tidi, "Mina domangke at levelinga at Lovoang Kaala i lok keretna,

'Nom luat luvuttadi xipkip gu diga sok tixirixes kepe i, ga ravasu ngan luat kis la lugugu ren i silok aleng. Leeme Silok ne Moroa ga lox i na la i lox avukat aleng at lemeren dik.' *Sam 118:22-23*

⁴³Kuren la a tong i rinimi; Moroa naba lok kepe Linintoo basinge nemi limixin me Judaia la naba raba i ri limixin mo diba lox asuusu levempeven una nunuan. ⁴⁴[Do tara na subu at nom luat, neni naba rekoxorop axakalik; la do, mo luat na subu ro mavana at tara, neni nabam remumus axap."]

⁴⁵Lavamaasa silok la lubung Parisi diga ronga na lempapaase poovo at ne Iesu la digaklen i do neni ga paase poovo mumu di. ⁴⁶La diga puse ngas kusu dina ranga alis i, ketla di goxo epovo mila diga marat at limixin mo diga lok do ne Iesu neni leeme vapaase alii at ne Moroa.

Lavapaase Poovo Ri Leluxa

(Lu 14:15-24)

22 ¹Iesu ga paase manga ridi mi lavapaase poovo, ni ga lok, ²"Linintoo no vana at laxalibet i lok ngan loorong silok ga gagas li leluxa ri loklox epot at lamdak teren. ³Neni ga riki lavasaxaruki ren ti mo limixin ni gara tong li vam atdi ri mo leluxa kusu dina tong i ridi do laaleng ti leluxa ga vot pam, ketla diga ronga xepe mo levelinga.

⁴La ni ga riki manga lentaba lavasaxaruki mi levelinga xeretna, 'Mina tong i rinedi no nenia aga tong li vam atdi do ara gagas li vam leluxa. Nia ara sep pam laxonbulumaxao, la lempanga axap ara gagas li vam i. Mina tong i ridi do dina vas kaxat ta ri leluxa at loklox epot.'

⁵Ketla nedi diga ronga xape mo levelinga la digak lox angtang mene at leven gugugu atdi xa. Lara avot ga vas kaxat uto at laraamang teren. Lara

bok ga lok lugugu ti sesep mi lempanga. ⁶La nedi lentaba vetpes diga ranga alis lavasaxaruki la diga lok kapmek di la diga sev amet di. ⁷La mo loorong silok ga musak teng. Ni ga riki limixin esep teren la diga sev amet di la diga xotos axap lemenemen silok atdi.

⁸La neni ga lok ti lavasaxaruki ren, ‘Leluxa i gagas pam, ketla mo luvuttadi nia aga ro ka di ti na leluxa nedi limixin kapmek mun la ixo epovo do limixin kapmek dinat kis at na laanan. ⁹Minat pas uto at levenngas la mina ro xaka limixin, mi ekip etangarang midi go kusu dina rupot ti leluxa rak.’ ¹⁰La lavasaxaruki ren diga epeseves uto at levenngas la diga ro xaka limixin axap diga ekip tangarang midi, nedi limixin avukat eburu mi limixin kapmek. La loogu ri loklok epot ga umsu mi mo limixin.

¹¹Ketla loorong silok ga vubeles ti ven mo limixin, la ni ga ven lara laradi goxopmen tevempanga singsiga ren ti loklox epot. ¹²La ni ga sue nom laradi, ‘Lentangas tarak. Nenu u beles ude xereva la kopmen tevempanga singsiga ram ti loklox epot?’ Ketla mo laradi goxo tong toxolinga.

¹³La loorong silok ga tong i ri luvuttadi gugugu ren keretna, ‘Mina xoxo lukngen mi luxangkedek teren la mina lu asu min uto xamang kusu neni na vubeles at lamain bonot no limixin dibang teng boron la diba rungur ivivilis.”

¹⁴La ne Iesu ga lok bok, “Limixin diba lok kuren mila ne Moroa i toro rinedi buaang limixin, ketla lentaba mene atdi di epovo kusu ne Moroa na soxolik ka di.”

Laxakaape Pilas Ti Ne Kaisar

(Mk 12:13-17; Lu 20:20-26)

¹⁵La lubung Parisi diga vas kaxat basinge mo lenep la diga gagas kusu dina bala arup ne Iesu mi levelinga. ¹⁶La diga riki luvuttadi loklok ka anasa atdi eburu mi limixin diga mumu asu ne Erodes uto saparap ne Iesu. Diga lok tin keretna, “Leeme loklox ase. Maklen i do nenu laradi ruturun la u anasa limixin mi leveloklok at ne Moroa la mo levelinga ram ik mokso. Uxo lok tooro legesa binam tadi xusuk mun mila uxu doxoma solo i do tara i ruuna laasen silok koplakopmen. ¹⁷Una tong i rinama do ua lusumsuma ram. Kereva, ik mokso do mana xepe pilas ti ne Kaisar koplakopmen?”

¹⁸Iesu ga ven kibis laxaxarang atdi la ga lok tidi, “Nemi lavapen aala. Tila mi lok do mina lixo ia? ¹⁹Mina lox ase ia mi tuxuven denarias mo mi kepe min.” La diga raba i mi legesa denarias. ²⁰La ni ga sue di, “Lamang la laasen atnege i nemen teren?”

²¹La diga vorang i, “At ne Kaisar.”

La ni ga lok tidi, “Mina raba ne Kaisar mi lempanga i epovo at ne Kaisar, la mina raba ne Moroa mi lempanga i epovo at ne Moroa.”

²²Diga rongga lovoporang teren, la diga sangu, la diga on basinge i.

Lususue Mumu Laxakatu Kaxat Amlong

(Mk 12:18-27; Lu 20:27-40)

²³Ap mo mun laaleng lentaba at lubung Sadiusi diga vosiga ne Iesu, diga lok do limixin diga met pam, di noxo roo xat amlong. Diga lok tong pen ne Iesu xeretna, ²⁴“Leeme loklox ase. Moses ga tong i rinama do taradi na met la kopmen tamdak teren, neton nom laradi naba epot at mo lanaa rixin, kusu duba visik tamdak ti ruuna ka lempanga ap mo laradi ga met. ²⁵Ga lavanuti loxoeton diga nemen kantubu atnama. Lara gomgo ga epot la ga met, kopmen ni goxo visik taxamdak, kuren la lara sepsev agepura ga epot manga at nom latkin. ²⁶La lara sepsev agepura ga met bok la lara sepsev avantun bok ga met; la nedi loxoeton axap diga epot at nom latkin diga met. ²⁷La melemu nom latkin ga met. ²⁸At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

²⁹La ne Iesu ga vorang i ridi xeretna, “Nemi mi soogong at na lavanga mila nemi xopmen minaklen levelinga at Lovoang Kaala la lololos at ne Moroa. ³⁰Ap mo laaleng limixin diba xatu kaxat amlong, di noxo epot; diba nemen naa ngan lubungangelo ro vana at laxalibet. ³¹Ketla a vara i do ana lox axasep nemi mumu laxakatu kaxat amlong at limixin basinge lanmet. Nemi mixo xasep at levelinga at ne Moroa ga raba nemi min. ³²Mo levelinga i lok keretna,

‘Nia ne Moroa at ne Abaram, Moroa at ne Aisak, la Moroa at ne Jakop.’

Pas 3:6

Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met.”

³³Limixin diga rongga i na, la diga sangu aleng at levenanasa ren.

Ua Levelinga At Ne Moroa I Silok Aleng

(Mk 12:28-34; Lu 10:25-28)

³⁴Lubung Parisi diga rongga i do ne Iesu ga vaase pe lubung Sadiusi, la nedi diga vot eburu la diga vot pasa ne Iesu. ³⁵Legesara atdi, neni gaklen avukat Lenavolo, ga lok tong pen ne Iesu. Ni ga sue i, ³⁶“Leeme loklox ase. Ua levelinga at Lenavolo i silok ti levelinga axap teren?”

³⁷La ne Iesu ga vorang i rin,

“Mina balamu Leeme Silok, ne Moroa atnemi mi lebelen nemi axap, la mi lороonan axap atnemi, la mi levendoxoma axap atnemi.” *Len 6:5*

³⁸Na loxot neni imgomgo la i silok ti levelinga axap teren. ³⁹La lara bok sepsev agepura i lok ngan lara gomgo, i lok keretna.

‘Mina balamu mo limixin di nemen saparap nemi kerekngan pam mi balamu nemi.’

Mas 19:18

⁴⁰Lenavolo eburu mi levenmamalagan at lavaeme vapaase alii i nemen maxopok at na levelinga.”

Lususue Mumu Lanarong
(Mk 12:35-37; Lu 20:41-44)

⁴¹Lubung Parisi digak lox eburu la ne Iesu ga sue di, ⁴²“Lanarong, neni lurubuno avolo atnege mo?”

La diga vorang i xeretna, “Neni lurubuno avolo at ne Devit.” ⁴³La ni ga lok tidi, “Do kuren, tila ba ne Devit mi lodoxoma at Loroonan Kaala ga soxor i do Leeme Silok teren? Mila levelinga ren at Lovoang Kaala i lok keretna,

⁴⁴‘Leeme Silok ne Moroa ga lok ti Leeme Silok tarak. Una xis de at lakngak tino se nenia ana lok li limixin munepen taram i ngan loxot burubut ti luxangkedek taram.’ *Sam 110:1*

⁴⁵Mo do ne Devit ga so asen i do Leeme Silok, i lok kereva la Lanarong neni lurubuno avolo at ne Devit?” ⁴⁶Kopmen teta atdi gita epovo na vorang levelinga ren, la ga ru ka i ap mo laaleng, kopmen tara gita sue i mi tususue.

Iesu Ga Paase Asi Limixin Silok
(Mk 12:38-39; Lu 11:43, 46; 20:45-46)

23 ¹Melemu ne Iesu ga vaase ri limixin eburu mi luvuttadi loklok ka anasa ren. Ni ga lok keretna, ²“Luvuttadi loklox ase at Lenavolo la lubung Parisi di ruuna lixitkis silok ngan ne Moses, mo gam gomgo ri leme Israel. ³Kuren la mina ronga res axap at lempanga di tong i rinimi la mina mumu asu rinotno i; ketla nemen gat mita mu asu luruptuvuk atdi, mila dixok lok lempanga nedi di vavang min. ⁴Dim taba limixin mi laxantaangas solo, i lok ngan di koxo li lara aknixip doxodok at limixin, la i mumuat aleng kusu dinap kiv i, ketla nedi xa kopmen dinak lok tooro limixin kusu rip kip mo levenaknixip.

⁵Lempanga axap dik lox i xusu limixin diba reven di la dina emi asu midi. Lavasuun mun at nai dik lok lengkonbokis lixilik tik lok li levelinga at ne Moroa ro xeneng teren; la mo lengkonbokis i silok ti mo lengkonbokis at limixin. La ding siga levempanga singsiga ri loxonaleng singising la dik lox asuusu i do di baalom aleng kusu dina lox ase limixin do nedi limixin tuturun. ⁶Di vavara aleng lengkot kitkis nunuan to at lara peluxa; la dik lok ka lengkot avukat tit kis to xeneng at laraugu singising. ⁷La di vavara aleng box i do limixin dibak lok ngangao atdi ro at lengkot etang, la dinap kup tidi do ‘Rabai.’

⁸La ne Iesu ga lok bok tidi, “Ixo lox avukat do tara na soxot nimi do Rabai, mila mi ruuna leges ‘Eme Silok’ la nemi mina epovo ngan mun loxoeton. ⁹La nemen gat nimi guta tong tara at na lavatbung menemen

do ne Temen nimi, mila legesara mun neni ne Temen nimi mo ik lok to vana at laxalibet. ¹⁰La nemen gat limixin dina so asen nimi do ‘luvuttadi amgomgo’ mila legesa radi gomgo atnimi la neni Lanarong. ¹¹Neni do i silok kantubu atnimi neni na ngan mun lasaxaruki atnimi. ¹²La do nege i lox asilox i, ne Moroa naba lox alixilix i; la nege do i lox alixilix i, ne Moroa naba lox asilox i.”

Iesu Ga Vaase Sok Luvuttadi Amgomgo
(*Mk 12:40; Lu 11:39-42, 44, 52; 20:47*)

¹³Naba lok kapmek aleng tinimi, luvuttadi loklox ase at Lenavolo eburu minemi lubang Parisi. Nemi lavapen aala. Mik soxoba pe lumusaragu ri Linintoo no vana at laxalibet kusu limixin kopmen dina epovo dina beles teren. Ketla nemi xa xopmen minoxo beles teren la mi tu pe mo lumusaragu ri limixin dik lok tong i xusu dina beles. ¹⁴[Naba lok kapmek aleng tinimi, luvuttadi loklox ase at Lenavolo eburu minemi lubang Parisi. Nemi lavapen aala. Mip kip pilo lempanga at lempatnaa sioxo rixin, la melemu at na mik lok levesingising to melamgo at limixin kusu rik lox ase di do loklok atnimi i nunuan axap. Kuren la ne Moroa naba lok li lumumuat silok atnimi.]

¹⁵Naba lok kapmek aleng tinimi luvuttadi loklox ase at Lenavolo eburu minemi lubang Parisi. Nemi lavapen aala. Mit pas tangtagap at laxangka la miang kan bok at laras kusu minak lok ka tara xusu ni na ruuna ka lunuunu kerekngan lunuunu atnimi; la do tara ira ruuna ka vam mo lunuunu, mi gagas li i xusu neni naba epovo rinotno kusu nat pas epopolo uto at lemenemen songsongot.

¹⁶Naba lok kapmek aleng mun tinimi, mila nemi limixin lengkatli atnimi i main la nemi xa xopmen mina epovo kusu mina lok tooro limixin. Mi tong i do lavangpangpe at tara i ngan lavanga gamasa, mo do i vangpe mi loogu laplavang; ket do ni i vangpe mi logol i nemen keneng at loogu laplavang, nemi miba doxoma atmatkun mo laxakaape ren. ¹⁷Nemi luvuttadi rangtangu la lengkatli at labaroonan atnimi i main. Loogu laplavang neni i lox axaala mo logol; la loogu laplavang i silok ti logol; la i xaala aleng, kopmen logol. ¹⁸Mi tong box i do lavangpangpe at tara ni lavanga gamasa mun, mo do i vangpe mi loxonin laplavang to at loogu laplavang; ket do ni na vangpe mavana at leventamtaba mo ik lok pana at nom loxonin laplavang, nemi mi lox amuat mo lavangpangpe ren. ¹⁹Nemi laxangkatli main. Loxonin laplavang i silok ti mo leventamtaba la i lox axaala mo leventamtaba. ²⁰Kuren la do tara na vangpe mi loxonin laplavang, neni i lok lavangpangpe min eburu mi leventamtaba mo ik lok teren; ²¹la do i vangpe mi loogu laplavang, neni i vangpe min eburu mi ne Moroa mo ik lok keneng teren; ²²la do i vangpe mi laxalibet, neni i vangpe mi loxonin orong at ne Moroa eburu mi ne Moroa mo it kis teren.

²³Naba lok kapmek aleng tinimi luvuttadi loklox ase at Lenavolo eburu minemi lubung Parisi. Nemi lavapen aala! Mim taba ne Moroa mi loxot i sev asangaun ap mo levempanga ik lok at laraamang, ketla mixo mumu asu leveloklok silok at Lenavolo, i ngan loklok mokmokso, lebelemumu, loklok nunuan ti lentaba vetpes, la loklok tuturun ti lentaba vetpes. Na leveloklok i epovo do mina lox asuusu i eburu mi mo loklok ti raba ne Moroa mi loxot i sev asangaun. ²⁴Nemi laxangkatli main. Mi mumu asu lengkot at Lenavolo kopmen na mumuat, ketla mixo mumu asu solo mo leveloklok i mumuat. I ngan ta do mi lox asu levenulang kakalik basinge lengkadan vaen atnimi la mi ke lavatkamel nak lok teren.

²⁵Naba lok kapmek aleng tinimi luvuttadi loklox ase at Lenavolo eburu minemi lubung Parisi! Nemi lavapen aala. Mi sogos anunuan i no ma xamang at leveng kap la leventingtigon, ketla no ma xeneng i umsu aleng mi loklok ti sak paxat ka panga la loklok ti belegaao. ²⁶Nemi lubung Parisi. Nemi lengkatli main. Mina gos anunuan avot be i no ma xeneng at lakap, la melemu no ma xamang ba lok nunuan ba.

²⁷Naba lok kapmek aleng tinimi luvuttadi loklox ase at Lenavolo eburu minemi lubung Parisi. Nemi lavapen aala. Mi ven ngan tinotno lempat maaut diga mo an bun i, i ven avukat to ma xamang, ketla no ma xeneng i umsu mi laxasi tongan la laxanorang. ²⁸Kuren la nemi bok mi lok ngan i nom, ma xamang atnimi, limixin di ven nimi ngan luvuttadi mokmokso la mi mumu asu Lenavolo, ketla ma xeneng at lebelen nimi mi umsu mi loklok at lavapen aala la loklok kakapmek aleng tino bok.

²⁹Naba lok kapmek aleng tinimi luvuttadi loklox ase at Lenavolo eburu minemi lubung Parisi. Nemi lavapen aala. Mira vaxaru ka vam levenmaaut avukat ti lavaeme vapaase alii; la mi sisinang avukat levenmaaut at limixin mokmokso; ³⁰la mi lok keretna, 'Mo do nedik gita nemen ap mo levenaleng lavalabat atdik diga rooro ren, nedik gitoxo sev amet lavaeme vapaase alii.' ³¹La kerepmo mi tong asu i do nemi livipisik li ap mo limixin sepsep tadi, diga sev amet lavaeme vapaase alii. ³²Nemi bok limixin sepsep tadi, mi epovo do mina lox epasum na laxakapmek ti laxakapmek atnedi.

³³Nemi laxasii xapmek. Nemi laxamdak at lempasii. Ixo epovo do mina sixiro basinge lebelemamao at ne Moroa mo naba riki nimi uto at lemenemen songsongot. ³⁴Kuren la aba riki lavaeme vapaase alii eburu mi luvuttadi leklen la luvuttadi loklox ase saparap nimi. Lentaba atdi miba vaxarem di at larakaba la mibap sev amet di. La lentaba atdi mibak pixis di ro xeneng at laraugu singising la miba xala su mi lentaba atdi basinge levenmenemen atdi la uto at levenmenemen petpes. ³⁵Kuren la minaba xip tutu mi lanmet at limixin mokmokso at na lavatbung menemen, ga ru ka i mi lanmet at ne Abel ga se at lanmet at ne Sakaria, nitna ne Berakaia, mo lavalabat atnimi diga sev amer i ro xantubu at

loogu laplavang la loxonin laplavang. ³⁶Nia a tong tuturun i dola na loola di rooro lingina dinaba xip tutu mi na laxakapmek axap atnedi luvuttadi sepsep tadi.”

Iesu Ga Tong Asu Labalamu Ren Ti Limixin Me Israel

(Lu 13:34-35)

³⁷La ne Iesu ga bulu aleng la ga lok, “Nemi limixin me Jerusalem. Lavalabat atnimi digap sev amet lavaeeme vapaase alii at ne Moroa la diga lu amet nedi ne Moroa ga riki di. Buaang levenaleng a lok do ana kok nimi mi lukngak, i ngan lavatpalak kaxak i kok laxan natnat kaxak teren, ketla mixo siam ka ia. ³⁸I ruturun. Monga Moroa i lox axap loklok tatao ren tinimi. ³⁹A tong tuturun i rinimi do mi noxo ven bok ba ia, se at nom laaleng naba vot la miba lok keretna,

‘Luvukat ti mo laradi it pas mi laasen at Leeme Silok.” *Sam 118:26*

Leveloklok Katling Ti Laxavaxap At Na Lavatbung Menemen

(Mk 13:1-2; Lu 21:5-6)

24 ¹Iesu ga vas kaxat basinge loogu laplavang la at lavatpas teren, luvuttadi loklok ka anasa ren diga vosiga i la diga paase mumu loogu laplavang la laraugu at ne Moroa ga tu saparav i. ²La ni ga lok tidi, “Mina ven avukat nom laraugu. A tong tuturun i rinimi. Taaleng naba vot la kopmen toxonuat at nom laraugu naba nemen at loxot teren; limixin diba vot la diba ut tereve axav i ukopok.”

³Melemu ne Iesu gat kis to at Lakaana Olip la luvuttadi loklok ka anasa xusuk teren diga vosiga i la diga sue i xeretna, “Una tong i rinama. Lingisa nom lempanga naba vot la loklok katling salai naba lok katling lovotpot taram eburu mi laxavaxap at na levenaleng?”

⁴La ne Iesu ga vorang i ridi xeretna, “Mina lok tatao avukat nimi kusu tara noxo xarang arup nimi mumu i na lempanga; ⁵mila buaang luvuttadi diba rupert mi laasen tarak la diba lok, ‘Nenia Lanarong!’ La diba sar asoogong buaang limixin mi laxalinga xaxarang atdi. ⁶Miba ronga i do lara esep mo ik lok la lara esep bok ba vot, ketla nemen mita marat teren. Lempanga xerepmo naba vot ketla laxavaxap at na lavatbung menemen noxo vot ap mo levenaleng. ⁷Limixin at levennep silok diba esep eburu mi limixin at levennep silok petpes; lavaorong silok at levennep diba esep mi lavaorong silok at levennep petpes. Lean kangking la levenangne naba vot at tengkot. ⁸Ana axav i naba ru katling lavakpaxaru kaxat ap mo levenmaares lolos.

⁹Melemu limixin diba ranga alis nimi la dina lox asongot nimi la lentaba atnimi diba sev amet di la limixin at lengkot axap diba belemamao nimi mila nemi limixin tarak. ¹⁰Ap mo laaleng buaang limixin diba ke xepe lunuunu atdi la di noxo ebalamu ela la diba song

araba di ri limixin kapmek; ¹¹la buaang lavaeme vapaase alii xaxarang dinaba vot la diba sar asoogong buaang limixin. ¹²Laxakapmek naba umsu, kuren la labalamu noxo nemen kantubu at limixin; ¹³ketla do tara na tu tuxuruxun at lunuunu ren se at laxavaxap ap mo levenmaares lolos, Moroa naba lox arooro i. ¹⁴La dinaba tong asu Lagale Lavavang mumu Linintoo ngan lavapaase asu ri limixin at lengkot axap, la melemu ba ren laxavaxap at na lavatbung menemen naba vot.”

Lavanga Xapmek

(*Mk 13:14-23; Lu 21:20-24*)

¹⁵La ne Iesu ga lok bok tidi, “Miba ven lavanga ba lok kapmek aleng, kerekngan leeme vapaase alii ne Daniel ga paase mumu i. Na lavanga xapmek naba tu ro xeneng at loxot kaala aleng at loogu laplavang la kerepmo naba lox amulao mo loxot.”

Nege do na us i na, neni na xasep avukat at lavasuun at na levelinga. ¹⁶La ne Iesu ga lok bok, “Ap mo laaleng nedi limixin do dina nemen to Judaia, diba sixiro uto at lempatkaana. ¹⁷Laradi do nak lok to mavana at loogu ren, ni noxo si kusu na lok ka lempanga ren boro xeneng ap mo loogu ren. ¹⁸La laradi do nak lok to xataamang, ni noxomlong bok ba uto at loogu ren kusu na lok ka lavanga singsiga ren. ¹⁹Mo laaleng naba lok kapmek aleng ti lavakin teenan eburu mi lavakin mi levengkadede atdi! ²⁰Mina ngising ne Moroa do mo laaleng noxo vot saparap nimi edompo mi taaleng kabu koplal taaleng kaala. ²¹Levenmumuat ap mo levenaleng naba lok kapmek aleng tinotno. Ga ru ka i at lurutu kaxat at na lavatbung menemen ise nga na lingina, kovisi taaleng kerepmo ga vot, la kopmen bok tara tumumuat kerepmo naba vot melemu. ²²La mo levenaleng ti mo levenmumuat do ne Moroa noxo lox atmur i, kopmen teta naba roo suu; ketla ne Moroa naba lox asuusu labalamu ren ti mo limixin neni gara soxolik ka vam di, la ni naba lox atmut mo levenaleng. ²³Ap mo levenaleng nemen gat mita nuunu at levelinga at tara na lok tinimi xeretna, ‘Mina ven ba i, neni nga na Lanarong!’ Koplal na lok, ‘Neni nga no!’ Nemen mita nuunu at nom levelinga atdi. ²⁴Mila buaang nedi limixin babala diba lok do nedi mo lavanarong at ne Moroa la lavaeme vapaase alii ren; diba lok tempanga sangsangu kusu diba sar asoogong lavaanat soxolik at ne Moroa, mo do di epovo. ²⁵Mina rongal avukar i na. A tong alii avot ta i rinimi.

²⁶La mo do tentaba dina lok tinimi, ‘Mina ven ba Lanarong, no nga i at lamatbin!’ Nemen gat nimi guta vas kaxat ugo; la do dina lok tinimi, ‘Mina ven ba i, na nga i lipe de at na loogu!’ Nemen gat nimi guta nuunu atdi; ²⁷mila nenia, Laradi Mevana, anaba vot soso ngan lavanga i mam to at levengkot axap, i tara koxorop lara takabu de vana at laxalibet. ²⁸Ap mo loxot limixin diba met teren, lempatmaalom diba vot buru ve kusu ri anan levenbaaxin tadi.”

Lovotpot At Laradi Mevana

(Mk 13:24-27; Lu 21:25-28)

²⁹La ne Iesu ga lok bok, “La soso mun melemu at levenmumuat ap mo levenmaares, leveloklok katling naba vot;

‘Losoosoo at laxangking naba xap, la lagaaling noxo soosoo. Larapenti naba subu si boro vana at laxalibet eburu mi lempanga axap meve diba sixit ekarakat la kopmen di noxo sixit mu larangas atdi.’ *Ais 13:10, 34:4*

³⁰Ap mo laaleng loklok katling tarak, Laradi Mevana naba vot asuvos to vana at laxalibet, la limixin at levennep axap at na lavatbung menemen dinabak saxaanu. Dinaba ven ia, Laradi Mevana, anaba vot at loxontakabu mi langsgangan lololos la lisisixam silok. ³¹La lubung angelo diba ronga lerengteng at luru la nia aba riki di uto at lengkot axap kusu dina lam kaka lavaanat soxolik at ne Moroa boro at lavanuet laramesuluk at lavanuet laramera manman at na lavatbung menemen.”

Laanasa Mumu Luuna Pik

(Mk 13:28-31; Lu 21:29-33)

³²La ne Iesu ga tong lara lavapaase poovo ridi xeretna, “Mina ronga na laanasa mumu luuna pik. Dola levesiliklik at larauna pik di mumulum la levenang i su xat, nemi miklen i do lamaares i auret ta. ³³La kerepmo do mina ven na lempanga loklok katling na vot, mina xasep do lovotpot tarak, Laradi Mevana i auret, i ngan laradi i tu at lumusaragu at loogu la i gagas kusu na beles teren. ³⁴Nia a tong tuturun i rinimi. Limixin at na loola di rooro lingina di noxo met se na lempanga na ravasu. ³⁵Laxalibet mi lavatbung menemen naba sonao, ketla levelinga rak noxo xap.”

Kopmen Tara Iklen Laaleng Laradi Mevana Naba Vot

(Mk 13:32-37; Lu 17:26-30, 34-36)

³⁶La ne Iesu ga lok bok, “Kopmen tara naklen laaleng at lovotpot tarak; lubung angelo bok kopmen dinaklen i la nenia, ne Nitna bok kopmen anaklen i. Tamak kusuk mun iklen i. ³⁷At lovotpot at Laradi Mevana, loklok at limixin naba lok ngan loklok at limixin ap mo levenaleng at ne Noa. ³⁸Ap mo levenaleng avot ti mo laran limixin diga anan la diga inin, lavatlok la lavakin diga vepot ga se at nom laaleng ne Noa ga beles ti lavattaaxup. ³⁹Mo limixin kopmen di goxoklen i do laran mo naba vot, ketla ga rupot la ga sev amet axap nedu. Laaleng at lovotpot tarak, Laradi Mevana naba lok kuren. ⁴⁰Ap mo laaleng tegepu radi duba gugu ro xataamang; lubung angelo diba lok ka legesara la lara naba nemen alu. ⁴¹Tegeputkin duba sep povorok levempiao; lubung angelo diba lok ka legesara la lara naba nemen alu.

⁴²Kuren la mina lok tatao avukat nimi mila kopmen minaklen i do at ua laaleng nenia, Leeme Silok atnimi, anabamlong teren. ⁴³Ketla mina

xasep at na lavapaase poovo. Mo do laradi at loogu iklen i do at ua loxonaleng laradi xipkip pilo ba vot teren, neni ba kuxut avukat la laradi xipkip pilo noxo das beles at loogu ren. ⁴⁴Kuren la mina gagas avukat mila nenia, Laradi Mevana, anaba vot ap mo laaleng limixin di doxoma i do nenia a noxo vot teren.

⁴⁵Mo laradi ruturun la lasaxaruki avukat, neni mo, leeme silok teren ba lok katling i xusu na lok tatao lavasaxaruki ren la nam taba di mi levempanga anan at levengkonaleng mokmokso. ⁴⁶Naba lox avukat ti mo laradi mo do leeme silok teren nabamlong la na long lenget ka i do i lox epovo lugugu ren. ⁴⁷Nia a tong tuturun i do mo leeme silok naba lok li mo laradi kusu na lok tatao levempanga axap teren. ⁴⁸Ket do nom laradi neni laradi xapmek la i lok, ‘Leeme silok tarak noxomlong soso.’ ⁴⁹La ip sev asongot lentaba lavasaxaruki la i anan la ira inin tangtangku eburu mi limixin di inin tangtangku amisik. ⁵⁰Leeme silok teren nabamlong at tara taaleng lasaxaruki ren ixo doxoma i do ni naba vot teren la at loxonaleng neni kopmen naklen i. ⁵¹Nom leeme silok naba sev asongot aleng nom lasaxaruki ren la ni naba riki i uto at lemenemen songsongot kusu na nemen eburu minedi lavapen aala. Mo go dibang teng la dina rungur ivivilis.”

Lavapaase Poovo Ri Lasangaun Lovosono Maxat

25 ¹La ne Iesu ga tong bok lavapaase poovo. Ni ga lok keretna, “At laaleng at lovtopot tarak, Linintoo no vana at laxalibet ba lok ngan lasangaun lovosono maxat diga lok ka levenbabao atdi la digat pas kusu dina ekip tangarang mi laradi ga gagas kusu na epot. ²Lavalimo atdi diga baulang, la lavalimo digakleklen. ³Lovosono rangtangku diga lok ka levenbabao atdi, ketla di goxo lok ka tengkondan loklox antos ti mo levenbabao atdi. ⁴Ketla lavalimo lovosono leklen diga lok ka levengkondan loklox antos babao eburu mi levenbabao atdi. ⁵Nedi axap lovosono maxat diga ngangais abao rino, ketla mo laradi ga gagas ti epot kopmen goxo vot soso. Kuren la lemeren di ga unga la nedi axap diga unga nga.

⁶At laxanimin tubu limixin diga xup aoon min keretna, ‘Laradi i gagas ti epot nom ta i boro! Minat pas la mina ekip tangarang min!’

⁷La nedi lasangaun lovosono maxat diga aus kaxat la diga lox agagas levenbabao atdi. ⁸La lavalimo lovosono rangtangku diga lok ti mo lovosono leklen, ‘Mina raba nama mi tengkondan soksox antos babao, mila levenbabao atnama i xapkap tino.’

⁹Ketla lavalimo lovosono leklen diga vorang i ridi xeretna, ‘Kopmen. Agut lengkondan soksox antos babao xopmen na epovo do ridik axap. Minat pas uto at luvuttadi sesep la mina un kaka tengkot tinimi.’

¹⁰La lovosono rangtangku digat pas kusu ri un kaka tengkondan soksox antos babao; la ise diga onon, laradi ga gagas ti epot ga vot, la nedi

lavalimo lovosono leklen diga vubeles eburu min ukeneng at leluxa at loklox aepot, la lumusaragu ga repe nga.

¹¹Melemu lavalimo lovosono rangtangu diga vot la diga lok, 'Leeme silok. Leeme silok. Una suang abeles nama.'

¹²Ketla ni ga vorang i ridi xeretna, 'Nia a tong tuturun i. Axoklen nimi!'

¹³La ne Iesu ga lok tidi, "Mina gagas avukat, mila mi xoklen laaleng koplaxoxonatat aleng at lovtopot tarak, Leeme Silok atnimi."

Lavapaase Poovo Ri Levempilas

(Lu 19:11-27)

¹⁴La ne Iesu ga tong bok lavapaase poovo. Ni ga lok, "Ap mo laaleng Linintoo no vana at laxalibet naba lok keretna. Lara leeme silok gat pas uto vaxalom. Avot at lavatpas kaxat teren, neni ga xup kaka lavasaxaruki ren la ga lok taba di mi levempanga ren kusu dinak lok tatao i. ¹⁵Ti lasaxaruki avot teren neni ga raba i mi lavalimo talen; ti lara sepsev agepura neni ga raba i mi legepu talen; la ti lara sepsev avantun neni ga raba i mi legesa talen. Neni ga raba di min kuren, ga epovo mi lakleklen atdi. La ni ga vas kaxat basinge di. ¹⁶Mo lara ga lok ka lavalimo talen, soso mun neni gat pas la ga gugu mi mo leventalen la ga ruuna ka bok lavalimo talen. ¹⁷La mo bok lara ga lok ka legepu talen, neni bok ga gugu min la ga ruuna ka bok legepu talen. ¹⁸Ketla mo lara ga lok ka legesa talen, neni gat pas, ga xe lamamara la ga lox alipe mo legesa talen at leeme silok teren.

¹⁹Melemu at lentaba leven gaaling ga volo, leeme silok ap mo lavasaxaruki gamlong la ga xup kaka di kusu dina paase mumu lempilas digara lok ka vam i. ²⁰Mo lasaxaruki avot ga lok ka vam lavalimo talen, ga vosiga mo leeme silok la ga lok tin, 'Leeme silok. Nenu ga raba ia mi lavalimo talen la nia agara gu asu vam lara lavalimo talen bok.'

²¹La mo leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia aba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

²²La mo lasaxaruki ga lok ka legepu talen, ga vosiga nom leeme silok la ga lok tin, 'Leeme silok. Nenu ga raba ia mi legepu talen la nia agara gu asu vam legepu talen bok.'

²³Leeme silok ga lok tin, 'I lox avukat aleng. Nenu lagale lasaxaruki rak. Nenu ga lok tatao avukat levempanga lixilik. Kuren la nia aba raba u mi laxampanga solo kusu una lok tatao i. Ude u ri leluxa rak. Ata lok momo eburu.'

²⁴La mo lasaxaruki ga lok ka legesa talen, ga vosiga nom leeme silok la ga lok tin, 'Leeme silok. Nia agaklen i do nenu laradi lolos; uk lok

kaka levempanga kopmen ataram, la u kaxat ka levempanga anan at leventaamang, nenu goxotlotlo i. ²⁵Kuren la nia ga marat taram la agat pas la aga lok alipe na legesa talen taram to xopok at laxangka. Legesa talen taram na.'

²⁶La leeme silok ga lok tin, 'Nenu lasaxaruki kapmek la lavatpanga molo. Nenu ugaklen i do ak lok kaka levempanga kopmen atarak, la a kaxat ka levempanga anan, nenia goxotlotlo i. ²⁷Tila ba nenu u goxo lok li latalen tarak to at loogu loklok li pilas kusu dina gugu min ti lox asilox i.' ²⁸La leeme silok ga lok ti lasaxaruki vetpes teren, 'Una lok ka latalen teren la una raba i ri mo lasaxaruki ira ruuna ka vam lasangaun talen. ²⁹A tong i rinimi do nedi di ruuna levempanga la di lok lugugu at ne Moroa min, aba raba bok di mi laxampanga solo; ket do tara na ruuna levempanga lixilik la kopmen na lok lugugu min, nia aba lok kaka amlong mo levempanga ren. ³⁰La nia aba lu asu mi mo lasaxaruki molos uto at lamain bonot; limixin go dibak saxaanu la diba rungur ivivilis."

Laradi Mevana Naba Ronga Linga At Limixin Axap

³¹La ne Iesu ga lok bok, "Do nenia, Laradi Mevana, ana vot mi lisisixam, eburu mi lubang angelo, nenia anabat kis at loxonin orong tarak mi lisisixam silok boro vana at laxalibet. ³²La limixin axap at na lavatbung menemen diba tu ro melango rak. La nenia anaba epes di ri legepu binam tadi, kerekngan laradi loklok tatao sipsip ik lox epeseves laxasipsip basinge laxanme. ³³Nenia anaba lok li laxasipsip uto saparap lakngak tino la laxanme uto saparap lakngak kia.

³⁴La nenia, Loorong Silok, anaba lok ti limixin to saparap lakngak tino xeretna, 'Ude nimi, limixin ne Tamak ira lox anarong pam nimi. Minat pas ude la mina ruuna ka leveloklox anarong at Linintoo, ne Moroa ga gagas pam min tinimi at lurutu kaxat at lavatbung menemen, ³⁵mila agak toxo la migam taba luxa ia; agak minu la migam taba dan ia; aga nemen ngan laradi xadiong la migak lok maraose minia. ³⁶Agak pakes ti levempanga singsiga la migam taba ia mi levempanga singsiga; agak meres la migak lok tatao avukar ia; agak lok at loogu xokoxo la migat posiga ia xusu minak lok tooro ia.'

³⁷La melemu mo limixin mokmokso diba sue ia, 'Leeme Silok. Lingisa nema maga ven u, ugak toxo la magam taba luxa u, la ugak minu la maga vaxain u? ³⁸Lingisa nema maga ven u ngan laradi xadiong la magak lok maraose minu, koplaga uga nemen goxopmen tempanga singsiga ram, la magam taba u mi levempanga singsiga? ³⁹Lingisa nema maga ven u, ugak meres, koplaga uga nemen at loogu xokoxo la magat posiga u xusu manak lok tooro u?'

⁴⁰La nenia, Loorong Silok, anaba vorang i ridi xeretna, 'A tong tuturun i rinimi. Do migalox i na ri tara atdi limixin banbalo rak, i lok ngan mun migalox i ria!'

⁴¹Melemu nenia anaba lok tidi limixin to saparap lakngak kia, ‘Uto nimi basinge ia, nemi limixin, lasaxaek naba suxuna nimi; uto nimi at laxao i anan tos amisik, ne Moroa ga gagas min ti ne Satan la lubang angelo ren! ⁴²Agak toxo ketla mi goxo raba luxa ia; agak minu ketla mi goxo vaxain ia. ⁴³Aga nemen ngan laradi xadiong, ketla mi goxo lok maraose minia, agak lok goxopmen tempanga singsiga rak, ketla mi goxo raba ia mi tempanga singsiga; agak meres la agak lok bok at loogu xokoxo ketla mi goxo vosiga ia xusu migita lok tooro ia.’

⁴⁴La diba lok bok tia xeretna, ‘Leeme Silok. Lingisa maga ven u, uga roxo, la uga minu, la uga nemen ngan laradi xadiong la ugak lok goxopmen tempanga singsiga ram la uga meres la ugak lok at loogu xokoxo, la ma goxo lok tooro u?’

⁴⁵La nenia anaba vorang i ridi xeretna, ‘A tong tuturun i rinimi. Do mi goxo lox i na ri tara atdi limixin banbalo, mi goxo lox i ria.’

⁴⁶La ne Iesu ga lok bok, “Na limixin Moroa ba riki aonon di ri losongsongot i nemen amisik, ketla limixin mokmokso dinaba lok ka lorrooro avolo.”

Diga Sevut Li Levelinga Ri Sev Amet Ne Iesu

(Mk 14:1-2; Lu 22:1-2; Jo 11:45-53)

26 ¹Se ne Iesu ga vaase axap na levempapaase, neni ga lok ti luvuttadi loklok ka anasa ren keretna, ²“Miklen i do legepu aleng move ik lok ti leluxa at Lovovolo Pe. Laaleng i auret do limixin diba song araba ia, Laradi Mevana, ri limixin esep kusu diba vaxarem ia at laxaba.”

³Ap mo mun laaleng lavamaasa silok, la loxongkulao silok at limixin me Israel diga vot eburu to at loogu silok at lamaasa gomgo, laasen teren ne Kaiapas. ⁴La diga sevut li levelinga xusu ri ranga alis ka nemnem ne Iesu la dina sev amer i. ⁵Diga lok, “Ata noxo lox i na at laaleng at leluxa; lavanga limixin dina lok kaxat turube.”

Latkin Ga Soli Li Ladan Mavak To At Ne Iesu Ro Beteni

(Mk 14:3-9; Jo 12:1-8)

⁶Iesu gak lok to Beteni at loogu at ne Simon; gano lanmeres gu gak lok teren. ⁷La ne Iesu gat kis ti anan, la lara latkin ga vot pasa i, gap kip lubuxom avukat⁸ ga umsu mi laxadan mavak, luunun teren ga urut aleng, la ni ga soli i ro at lavatlak at ne Iesu.

⁸La luvuttadi loklok ka anasa ren diga ven i na, la diga musak, diga lok, “Tila i soli xepe gamasa i na? ⁹Ni i epovo ri sesep mi na laxadan mavak kusu ni ba lok ka tuunun silok teren, la na lok tooro limixin banbalo min.”

⁸ 26:7 Na lubuxom tuntu diga lox i mi luat bunbun.

¹⁰Iesu gaklen pam levendoxoma atdi, kuren la ni ga lok tidi, “Nemen mita lox angtang na latkin, mila neni i lok lavanga nunuan tia. ¹¹Limixin banbalo mo dibat pot pasa amisik nimi xusu mibak lok tooro di, ketla nenia noxo nemen eburu amisik minimi. ¹²Ni i soli na laxadan mavak at labantuxu rak kusu ri lox agagas li labantuxu rak ti lamaaut. ¹³Nia a tong tuturun i rinimi do, at ua loxot at na lavatbung menemen axap limixin diba tong asu Lagale Lavavang, na lavanga neni i lox i, diba tong box i xusu limixin dibaklen i.”

Judas Ga Siam Kusu Na Song Araba Ne Iesu

(Mk 14:10-11; Lu 22:3-6)

¹⁴Lara atnedi lasangaun mi legepura luvuttadi loklok ka anasa, laasen teren ne Judas Iskariot ga vosiga lavamaasa silok. ¹⁵La ni ga sue di, “Do nenia na song araba ne Iesu rinimi, miba raba ia mi tavanga salai?” La diga siam do diba raba i mi lavantun sangaun pilas gamgames. ¹⁶Ga ru ka i ap mo laaleng ne Judas ga reven ti taaleng kusu na song araba ne Iesu ridi.

Iesu Ga Anan Eburu Mi Luvuttadi Loklok Ka Anasa

(Mk 14:12-21; Lu 22:7-13, 21-23; Jo 13:21-30)

¹⁷At laaleng avot at leluxa ua diga ove vetpes lengkongkide,^h luvuttadi loklok ka anasa at ne Iesu diga vosiga i la diga sue i, “U vara i do mana lox agagas li laanan tidik ua?”

¹⁸La ni ga vorang i ridi xeretna, “Mina vubeles at lemenemen silok la mina vosiga lara laradi; la mina lok tin keretna, ‘Leeme loklox ase atnama i tong i do laaleng meremet teren i auret la neni eburu mi luvuttadi loklok ka anasa ren diba lok katling Lovovolo Pe ro at loogu ram.” ¹⁹La luvuttadi loklok ka anasa ren diga mumu asu levelinga at ne Iesu la diga lox agagas li leveluxa ri Lovovolo Pe.

²⁰Ga ukantinao Iesu gat kis kusu ri anan eburu mi lasangaun mi legepura luvuttadi loklok ka anasa ren. ²¹Nedi diga anan la ni ga lok tidi, “Nia a tong tuturun i na rinimi. Legesara mo atnimi naba song araba ia ri limixin kapmek.”

²²La diga bulu aleng la nedi getgesara diga sue i, “Leeme Silok. Kopmen nenia, do?”

²³La ne Iesu ga vorang i ridi, “Mo lara na song arup mi lekngen eburu minia ri levempanga anan, neni naba song araba ia ri limixin kapmek. ²⁴Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri limixin kapmek. Giba lox avukat do nenen gitoxo visik ka i.”

^h **26:17** Leluxa limixin me Judaia diga lok katling laaleng, diga vas kaxat boro Isip. La di goxo lok li laais at lengkongkide atdi.

²⁵La ne Judas, mo ga gagas kusu na song araba i, ga lok, “Rabai. Kopmen nenia, do?”

La ne Iesu ga vorang i, “Nenu vam.”

Laanan Kaala at Leeme Silok

(Mk 14:22-26; Lu 22:14-20; 1 Ko 11:23-25)

²⁶Move diga anan la ne Iesu ga lok kaka loxongkide, ga tong avukat ti ne Moroa, ga sebex i la ga raba luvuttadi loklok ka anasa ren min la ga lok, “Mina lok kaka i na la mina anan i; labantuxu rak na.”

²⁷La neni ga lok kaka lakap inin, ga tong avukat ti ne Moroa, la ga raba di min la ga lok, “Nemi axap mina in at na. ²⁸Lada rak na la i lok katling lekabus maxat. Lada rak ba sen su xusu ri limixin buaang, ne Moroa naba doxoma xepe leveloklok kakapmek atdi. ²⁹Nia a tong i rinimi do nia noxo in at lavaen i ru ka i lingina se ap mo laaleng nia aba in lavaen maxat eburu minimi ro xeneng at Linintoo at ne Tamak.”

³⁰Digak pixan mi loxompixan, la diga vas su la diga vas kaxat uto at Lakaana Olip.

Iesu Ga Vaase Alii Do Ne Pita Naba Sok Tixirixes I

(Mk 14:27-31; Lu 22:31-34; Jo 13:36-38)

³¹Melemu ne Iesu ga lok tidi, “Lingina at laxanimin, nemi axap minaba subu basinge ia; i lok ngan Lovoang Kaala i tong i xeretna,

‘Nia ne Moroa, anaba sep laradi loklok tatao at levesipsip la levesipsip at loxonbinam sipsip dinaba epeseves.’ *Sak 13:7*

³²Ketla melemu at laxakatu kaxat amlong tarak, nia abamgo rinimi uto Galili.”

³³La ne Pita ga lok tin, “Keke i do nedi axap dina subu basinge u, nenia xopmen tinotno noxo subu.”

³⁴La ne Iesu ga lok tin, “Nia a tong tuturun i ru; lingina at laxanimin laxaxak noxovisi na reng, la nenu unaba sev apkap naba vantun do uxoklen ia.”

³⁵La ne Pita ga vaase lolos tin keretna, “Do dina lok do dina sev amer ia, nenia noxo sok tixirixes u.” La luvuttadi loklok ka anasa axap diga tong box i xuren.

Iesu Ga Ngising To Getesemane

(Mk 14:32-42; Lu 22:39-46)

³⁶Melemu ne Iesu gat pas uto at lara loxot, laasen teren Getesemane. Luvuttadi loklok ka anasa ren diga emu min, diga rupot la ni ga lok tidi, “Mina xis de. Anat pas lixilik uto xusu ana lok lising.” ³⁷La ni ga lam ka ne Pita mi lumdak at ne Sebedi, la lainbulu silok ga suxuna lorooro ren.

³⁸La ni ga lok tidi, “Lorooro rak i umsu mi lainbulu silok mo na lox amer ia. Minak lok de la mina kuxut tooro ia.”

³⁹La ne Iesu ga vas silatla xakalik, la ni ga subu midi mi lumeren uto xopok at laxangka la ga sing ne Moroa xeretna, “Tamak. Kereva, i epovo do una lok pes na lumumuat basinge ia? Ketla nemen gat uta mumu asu lavavara rak, una mu asu lavavara ram.”

⁴⁰La ne Iesu gamlong saparap luvuttadi loklok ka anasa ren la ga long lenget ka di, diga unga. La ni ga lok ti ne Pita, “Kereva, mixo epovo nap kip na lumumuat eburu minia at loxonaleng lixilik mun? ⁴¹Mina reven tatao la mina ngising kusu mi noxo subu at loklok tong pen. Loroonan at laradi i epovo ri ronga res, ketla labantuxu ren i molos.”

⁴²La ne Iesu ga vas silatla xakalik ga sev agepura la ga sing, “Tamak. Do ixo epovo una lok pes na lumumuat basinge ia se nia ana lox epovo i, i lox avukat; ana mu asu mun lavavara ram.”

⁴³Iesu gamlong uto at luvuttadi loklok ka anasa ren la ga long lenget ka di, diga unga manga, mila lemeren di ga unga. ⁴⁴La ni ga ke di la ga vas kaxat basinge di ga sev avantun kusu na sing; la ga sing amu mi nom levelinga ni ga ngising pam min.

⁴⁵Melemu ni gamlong uto at luvuttadi loklok ka anasa ren la ga lok tidi, “Kereva, move mi unga? Pen ba i nom. Loxonaleng i auret do lara laradi na song araba ia, Laradi Mevana, ri limixin bilinga. ⁴⁶Mina xatu. Ata vas tangarang na laradi boro it pas kusu nam taba minia ri limixin kapmek.”

Diga Ranga Alis Ne Iesu

(Mk 14:43-50; Lu 22:47-53; Jo 18:3-12)

⁴⁷Iesu move ga paase la ne Judas ga rupot. Neni lara at lasangaun mi legepura luvuttadi loklok ka anasa at ne Iesu. Buaang limixin diga emu min, digap kip levemparise sepsep la levempukup sepsep. Lavamaasa silok la loxongkulao silok at limixin me Israel diga riki di. ⁴⁸Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.”

⁴⁹La soso mun ne Judas ga vas saparap ne Iesu la ga lok, “Laxanimin avukat, Rabai.” La ni ga nes i.

⁵⁰La ne Iesu ga lok tin, “Lentangas tarak. Una lok soso nom lavanga u vara i do una lox i.”

La mo limixin diga vosiga ne Iesu la diga ranga alis i. ⁵¹Lara at luvuttadi loklok ka anasa ren ga ven i na la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

⁵²La ne Iesu ga lok tin, “Lok li amlong lavarise sepsep taram mila nedi di sep limixin mi lemparise, diba met kuren. ⁵³Nenia a epovo ana ro ri ne Tamak la neni ba raba ia mi lubang angelo, luutus atdi ba volo lavanuti sangaun mi legepura larabin sangsangaun kobot (72,000) lubang angelo. ⁵⁴Ketla keke nga di mila nia aba lox asorun mo levengkot at Lovoang Kaala i tong asu i do na lavanga naba vot.”

⁵⁵Ap mo loxonaleng ne Iesu ga lok ti mo limixin, “Tila mi vot de mi levemparise sepsep la levempukup sepsep kusu mina ranga alis ia? Nenia xopmen ana vaxaru kaxat ka teesep. Buaang levenaleng nia agat kis to xeneng at loogu laplavang kusu ana anasa limixin, ketla nemi xopmen mi goxo ranga alis ka be ia go. ⁵⁶Na levempanga i ravasu keretna xusu na lox asorun levenmamalagan at lavaeme vapaase alii.” La luvuttadi loklok ka anasa ren diga sixiro axap.

Iesu Ga Tu Ro Melamgo At Luvuttadi Amgomgo at Leme Israel
(*Mk 14:53-65; Lu 22:54-55, 63-71; Jo 18:13-14, 19-24*)

⁵⁷Nedi diga ranga alis ne Iesu, diga lam ka i uto at ne Kaiapas, lamaasa gomgo; go luvuttadi loklox ase at Lenavolo la loxongkulao silok diga rupot pam. ⁵⁸Pita ga mumu asu ne Iesu ro xa vaxalom la ga rupot saparap loogu at lamaasa gomgo la ga vubeles at lemelua. Ni ga xis kopok eburu mi luvuttadi rutu mu xusu na ven lavanga salai naba vot saparap ne Iesu.

⁵⁹Nedi axap luvuttadi amgomgo eburu mi lavamaasa silok ap mo lixitkis buru diga puse ri tevelinga xaxarang kusu dina so raba ne Iesu min la diba epovo na sev amer i. ⁶⁰Ketla di goxo epovo, keke do buaang luvuttadi diga vot kusu dina tong asu tevelinga xaxarang.

At laxavaxap, legepu radi duga vot, ⁶¹la duga lok, “Na laradi ga lok keretna, ‘Nenia a epovo na sele utut kepe na loogu laplavang at ne Moroa la anaba vaxaru amu box i xeneng at lavantun aleng.’ ”

⁶²La lamaasa gomgo ga xatu la ga lok ti ne Iesu, “Ua lavasuun teren la uxu vaase? Kereva, u xopara na vorang na levelinga di sok taba u min.” ⁶³Ketla ne Iesu kopmen goxo tong toxolinga.

La lamaasa gomgo ga lok tin, “At laasen at ne Moroa i rooro amisik, una tong i rinama. Kereva, nenu Lanarong, Nitna ne Moroa?”

⁶⁴La ne Iesu ga lok, “I ruturun, nenia vam. Ketla nia a tong i rinimi. Melemu minaba ven ia, Laradi Mevana, anabat kis saparap lekngen tino ne Moroa i lolos aleng, la anaba vot at loxontakabu boro vana at laxalibet.”

⁶⁵La lamaasa gomgo ga lais korop lavanga singsiga ren la ga lok, “I paase vupu ri ne Moroa. I xap ta lavapaase. Mira ronga vam levelinga ren. ⁶⁶Kereva levendoxoma atnimi?”

La diga vorang i xeretna, “I epovo do neni na met.”

⁶⁷La diga vubis abuxumin lemeren la diga tit pupu i, la lentaba diga pasa i mi levengkikngen di. ⁶⁸Digak lok, “Do nenu Lanarong, una tong kisip ka i do nege i sev u.”

Pita Ga Sev Apkak At Ne Iesu
(*Mk 14:66-72; Lu 22:56-62; Jo 18:15-18, 25-27*)

⁶⁹Pita gat kis to xamang at lemelua la lara loolik, neni lasaxaruki ga vosiga ne Pita la ga lok, “Nenu bok gak lox eburu mi ne Iesu boro Galili.”

⁷⁰Ketla neni ga sev apkap to melamgo atnedi axap, ni ga lok, “Nia xopmen naklen lavanga salai u paase min.”

⁷¹La ni gat pas uto at langas povolo la lara loolik bok ga ven i la ga vaase ri limixin diga tu go. Neni ga lok keretna, “Na laradi gak lox eburu mi ne Iesu boro Nasaret.”

⁷²La ne Pita ga sev apkap manga la ga vangpe, ni ga lok, “Nia xopmen anaklen nom laradi.”

⁷³Melemu lixilik mo limixin diga tu go, diga vosiga ne Pita la diga lok, “I ruturun do nenu lara atdi mila lavapaase ram i lok ngan laradi boro Galili.”

⁷⁴La ni ga vangpe mi levelinga vangpangpe xeretna, “Levelinga rak i ruturun; do xopmen, ne Moroa naba lox asongor ia. Nia axoklen mo laradi.”

La soso mun laxaxak ga reng. ⁷⁵La ne Pita ga doma su at levelinga at ne Iesu ga lok keretna, “Laxaxak kovisi noxo reng, la nenu uba sev apkap naba vantun do uxoklen ia.” La neni ga vas su ukamang la gang teng aleng.

Diga Lok Ka Ne Iesu Uto At Ne Paelat

(Mk 15:1; Lu 23:1-2; Jo 18:28-32)

27 ¹Ga maxantamak suubu nedi axap lavamaasa silok eburu mi loxongkulao silok at lubungmixin me Judaia diga li levendoxoma atdi mumu ne Iesu do diba sev amer i. ²Diga xoxo alis lukngen la diga sat ka i uto at ne Paelat, ni laradi gomgo boro Rom.

Lanmet At Ne Judas

(Gu 1:18-19)

³La ne Judas, laradi ga song araba ne Iesu, ga ven i do diga gagas kusu dina sev amet ne Iesu, la neni ga umsu mi lainbulu silok la ga lox ekun lodoxoma ren la ga raba amlong lavantun sangaun levempilas gamgames ti lavamaasa eburu mi loxongkulao silok. ⁴Ni ga lok, “Nia ara lok pam laxakapmek silok, la ara raba vam limixin esep mi laradi xopmen taxakapmek teren, la i auret ta loxonaleng kusu dina sev amer i.”

La diga lok tin, “Kopmen tekot at nom atnama. Lavanga nga nom taram!”

⁵Kuren la ne Judas ga lu abeles mi mo levempilas gamgames to at loogu laplavang la ga onon; melemu neni gat pas la ga xut amer i.

⁶Lavamaasa silok diga lok ka mo levempilas gamgames la diga lok, “Anai levempilas i ru katling luunun ti lorooro at laradi la Lenavolo i tong i do ixo epovo bok ba xusu ataba lok li i ro at loxot lili pilas.” ⁷La diga epaase mumu i la diga un kaka loxongkangka, laasen teren Laraamang Pota, kusu rik mitmit limixin kading. ⁸Kuren la diga so asen mo loxot

do ‘Loxongkangka at Lada,’ ise at na levenaleng mo laasen ik lok. ⁹At na mun levempanga la levelinga at leeme vapaase alii ne Jeremia ga sorun, ni ga lok,

‘Diga lok ka lavantun sangaun levempilas gamgames, ni luutus limixin me Israel diga siam min do ri un i, ¹⁰la diga lok ka mo levempilas kusu ri un Laraamang Pota kerekngan ne Moroa ga tong i ria.’

Sak 11:12-13; Jer 32:6-9

Iesu Ga Tu At Lavapaase To Melamgo At Ne Paelat

(Mk 15:2-5; Lu 23:3-5; Jo 18:33-38)

¹¹Ap mo mun loxonaleng ne Iesu ga tu ro melamgo at laradi gomgo ne Paelat la ne Paelat ga sue i, “Kereva, nenu loorong silok at limixin me Judaia?”

La ne Iesu ga vorang i, “I ruturun. Nenu xa ura tong pam i.”

¹²Lavamaasa silok eburu mi loxongkulao silok diga sok taba i mi levelinga, ketla neni xopmen goxo vaase porang di. ¹³La ne Paelat ga sue i, “Kereva, u xopara na vorang levelinga atdi?” ¹⁴Ketla ne Iesu xopmen goxo vorang mo levelinga, ni goxo vaase asu tekolonga kusu ri vorang mo levelinga atdi; laradi gomgo ga sangu aleng. ¹⁵At levenmaares axap laradi gomgo boro Rom ga mu asu lara loklok keneng at leluxa silok, laasen teren Lovovololo Pe. Neni gak soxomus asu lara laradi xokoxo do limixin diga lok katling i. ¹⁶Ap mo laaleng lara laradi, laasen teren ne Barabas gak lok at loxokoxo, neni laradi xapmek tinotno. ¹⁷Buaang limixin diga vot eburu xusu ri lok katling laradi xokoxo la ne Paelat ga sue di, “Ua lara mi vara i do nia ana soxomus asu raba nimi min, Barabas koplala ne Iesu di tong i do neni Lanarong?” ¹⁸Paelat gaklen i do lavamaasa silok la loxongkulao silok diga reven peves at ne Iesu la ni lavasuun teren la diga vara i do dina sev amer i.

¹⁹Ap mo loxonaleng Paelat gat kis at loxot kitkis at laradi rongtonga linga; la latkin teren ga lox aonon na levelinga rin, ga lok keretna, “Nemen gat uta lok tavanga ri na laradi kopmen taxakapmek teren, mila itinongo at laxanimin nia ata robo i la labalak ixo xis aulis tino.”

²⁰Ketla lavamaasa silok eburu mi loxongkulao silok diga vaase lolos ti limixin do dina lok katling ne Barabas la dina sev amet ne Iesu.

²¹Paelat ga sue di, “Ua lara atdu nia ana soxomus asu raba nimi min?” La diga vorang i rin, “Barabas.”

²²La ne Paelat ga sue di, “La nenia aba lok lavanga sala ri ne Iesu, di tong i do Lanarong?”

La nedi axap diga vorang i xeretna, “Una vaxarem i at laxaba.”

²³La ne Paelat ga sue di, “Tila mo? Neni ixo lok tavanga xapmek.”

Ketla digap kup lolos keretna, “Paxarem i at laxaba.” ²⁴Paelat ga ven kibis i do limixin di goxopara na ronga levelinga ren, la diga lok do dina

ru kaxat ka leesep. Kuren la neni ga lok ka loxodan la ga gos lukngen to melamgo at limixin la ga lok tidi, “Kopmen tekot tarak at na. Lavanga mun atnimi.”

²⁵La mo limixin diga lok, “Keke lumumuat at lanmet teren naba nemen pana atnema eburu mi laxamdak mi laxaalik atnama.”

²⁶La ne Paelat ga soxomus asu ne Barabas tidi. Ketla neni ga raba ne Iesu ri luvuttadi esep kusu dinak pixis i la dina vaxarem i at laxaba.

Limixin Esep Diga Lok Kalise Ne Iesu

(Mk 15:16-20; Jo 19:2-3)

²⁷Melemu limixin esep at ne Paelat diga lok ka ne Iesu uto at loogu silok at laradi gomgo, la limixin esep axap go diga ru xangkan i. ²⁸Diga lok kepe levesingsiga ren la diga vaxasiga i mi lavanga singsigaara at loorong silok. ²⁹La diga lok lixiam tin mi livin gagas la diga vaxaxua lavatlak teren min, la diga vaxarebeng i mi lakdak at loorong silok to at lekngen tino. Melemu diga xis tiktikbu ro melamgo ren la diga lok kalise i. Diga lok, “Ma lok ngangao aleng taram, loorong silok at limixin me Judaia.” ³⁰La diga vubis sanga i, la diga lok ka mo lakdak la digak pixis patlax i min. ³¹Diga lok kalise axav i, la diga lok pes manga nom lavanga singsigaara basinge i la diga vaxasiga manga i mi lavanga singsiga ren. La diga sat ka nga i basinge loogu silok kusu dina vaxarem i at laxaba.

Diga Vaxarem Ne Iesu At Laxaba

(Mk 15:21-32; Lu 23:26-43; Jo 19:17-27)

³²Luvuttadi esep mi ne Iesu diga sixisu ap mo loogu la diga ekip tangarang mi lara laradi boro Sairini, laasen teren ne Simon, la luvuttadi esep diga sox aruru parang i xusu na xip ka laxaba at ne Iesu. ³³Diga rupot to at loxot, loxonasen kot go do Golgata. Lavasuun at na loxolinga do “Lavatlak Tongan.” ³⁴Diga raba ne Iesu mi ladan vaen kusu neni na inin i. Diga lok li vam lara lamarasin teren kusu na lok kepe losongsongot teren. Iesu ga in tong pen i, ketla goxopara i. ³⁵Diga vaxarem i at laxaba la melemu diga lu buru mi lengkonuat kusu ri lok kisip ka nege ba lok kaka levempanga singsiga ren. ³⁶Melemu at nom, digat kis la diga reven ne Iesu. ³⁷To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, “Neni ne Iesu, Loorong Silok at limixin me Judaia.” ³⁸La limixin esep diga vaxarem bok legepu radi xapmek saparap ne Iesu, lara saparap lekngen tino la lara saparap lekngen kia. ³⁹Limixin digat pas polo go la diga pirapat lempatlak atdi la diga lok kalise ne Iesu. ⁴⁰La diga lok keretna, “Nenu uga lok do unaba sele utut kepe loogu laplavang la unaba vaxaru amu box i at lavantun aleng. Una lox aroo nga u, mo do nenu ne nitna ne Moroa la una vasi basinge nom laxaba.”

⁴¹La kerepmo bok lavamaasa silok eburu mi luvuttadi loklox ase at Lenavolo la loxongkulao silok diga paase aksaksa rin mi levelinga lolos. Diga lok, ⁴²“Neni ga lox aroo lentaba vetpes, ketla neni ixo epovo do na lox aroo axa i. Kereva, neni loorong tuturun pam na me Israel? Do neni na eng si basinge laxaba, dik ataba nuunu ba ren. ⁴³Ni i nuunu at ne Moroa la i lok do neni ne nitna ne Moroa. Teren, ata ven be i do ne Moroa go naba lox aroo ba i.” ⁴⁴La kerepmo bok luradi xapmek duga merem saparav i, nedu bok duga lok kalise i.

Lanmet At Ne Iesu

(Mk 15:33-41; Lu 23:44-49; Jo 19:28-30)

⁴⁵At lasangaun mi legepu xonaleng, lamain ga vung pavaa mo lenep silok axap, la gak lok se at lavantun konaleng. ⁴⁶At lavantun konaleng ne Iesu ga xup lolos keretna, “Eloi, Eloi lama sabaktani?” Lavasuun at na levelinga xeretna, “Moroa rak, Moroa rak, tila u raba arulu ia?”

⁴⁷Lentaba luvuttadi diga tu go, diga ronga i la diga lok, “I toro ri ne Elaisa.”

⁴⁸La lara laradi ga sixit la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min. ⁴⁹Ketla lentaba luvuttadi diga lok, “Una tu be, ata ven be i do ne Elaisa go naba rupot ti lok tooro i.”

⁵⁰La ne Iesu ga xup kaxat silok manga la lamamas teren ga rekorop, la ni ga met ta.

⁵¹Ap mo loxonaleng lavatamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban, la laxangka gangne la lemparuat ga tepavagam. ⁵²Laramaaut ga rem bang la buaang limixin at ne Moroa, no diga met ganoxa, diga roo xat amlong. ⁵³Diga onon basinge laramaaut atdi la melemu at laaleng ne Iesu ga roo xat amlong, nedi diga vubeles to xeneng at lemenemen kaala la buaang limixin diga ven di.

⁵⁴Ap mo loxonaleng laasesep at luvuttadi esep eburu mi limixin esep teren diga tu la diga suma langne la levempanga axap ga vot ap mo loxonaleng, diga marat aleng la diga lok, “Neni lamdak tuturun pam at ne Moroa.”

⁵⁵Buaang lavakin bok mo diga tu vaxalom lixilik la diga reven mo levempanga ga vot. Nedi nom lavakin diga mumu asu ne Iesu boro Galili la digak lok tooro box i. ⁵⁶Ne Maria Magdalene eburu mi ne Maria, nenen ne Jems mi ne Josep; la nenen bok at lumdak at ne Sebedi.

Limixin Digak Mit Ne Iesu

(Mk 15:42-47; Lu 23:50-56; Jo 19:38-42)

⁵⁷Taba nga ukantinao lara laradi nopnovos boro Arimatia, laasen teren ne Josep, ga vot la neni bok lara atnedi luvuttadi loklok ka anasa

at ne Iesu. ⁵⁸Neni ga vot parap ne Paelat la ga sing i do neni na raba i mi labantuxu at ne Iesu. La ne Paelat ga siam dola na raba ne Josep mi labantuxu at ne Iesu. ⁵⁹La ne Josep ga lok ka i la ga bom i mi labantamon maxat, ⁶⁰la ga lok li i ro xeneng at lamaaut maxat teren, limixin diga ke i ro xeneng at lavaruat. La melemu neni ga xavun pe lumusaragu at lamaaut mi lavaruat la ga onon. ⁶¹Maria Magdalene eburu mi lara ne Maria vetpes bok mo dugat kis to melango at lamaaut.

Luvuttadi Rutu Mu Diga Kuxut Mi Lamaaut At Ne Iesu

⁶²Ap mo laaleng melemu, ni laaleng kaala, lavamaasa eburu mi lubung Parisi diga vot pasa ne Paelat. ⁶³La diga lok tin keretna, “Leeme Silok, nema ma doma mumu levelinga ap mo laradi xaxarang at laaleng neni move ga rooro la ga lok keretna, ‘Anaba roo xat amlong basinge lanmet melemu at lavantun aleng.’ ⁶⁴Kuren la, nema ma vara i do una tong i ri luvuttadi rutu mu la dinaba kuxut mi lamaaut teren naba se at laaleng sev avantun kusu luvuttadi loklok ka anasa ren di noxo epovo rit pas ti nem kaka labantuxu ren, la melemu dina tong i ri limixin dola neni ira roo xat amlong pam basinge lanmet; la na laxaxarang melemu, ni naba lok kapmek tinotno ri lara avot.”

⁶⁵La ne Paelat ga tong i ridi xeretna, “Mina lam kaka tuvuttadi rutu mu la minat pas la mina soxoba avukat lamaaut kerekngan miklen i.”

⁶⁶Kuren la diga vas kaxat la diga soxoba avukat lamaaut mi levempanga soksoxoba ren, la diga on basinge luvuttadi rutu mu e ri reven tatao lamaaut.

Lorooro Xat Amlong At Ne Iesu

(*Mk 16:1-10; Lu 24:1-12; Jo 20:1-10*)

28 ¹Melemu at laaleng kaala, taba umaxantamak at laaleng avot ap mo luik, ne Maria Magdalene nedu mi lara ne Maria vetpes bok dugat pas ti ven lamaaut.

²La soso mene nga langne lolos ga vot, la laangelo at Leeme Silok ga vas si boro vana at laxalibet, gat pas ti lamaaut, la ga xavun kepe lavaruat at lamaaut la garat kis to mavana ren. ³Levereven teren ga lok ngan lavanga i mam, la levesingsigaara ren gan bun aleng ngan lusugao. ⁴Luvuttadi rutu mu diga marat aleng la diga dede la diga mer aroo.

⁵La laangelo ga vaase ri lutkin keretna, “Nemen gat muta marat, aklen i dola nemu mu reven pupuse ri ne Iesu, no ga rem to at laxaba. ⁶Ketla kopmen ta i de, no ira roo xat pam kerekngan levelinga ni ga tong i. Ude numu la muna ven loxot diga vaxamdi i ren. ⁷Muna vas kaxat soso la muna tong i ri luvuttadi loklok ka anasa ren dola neni ira roo xat amlong pam basinge lanmet la no nga iramgo vam tidi uto Galili la dinaba ven ba i ve. La mo nga nia a tong pam i rinumu.”

⁸Kuren la duga vas kaxat soso basinge lamaaut la duga umsu mi lanmarat, ketla duga umsu bok mi lomomo. Duga sixit soso ri tong i ri luvuttadi loklok ka anasa at ne Iesu. ⁹La soso mun ne Iesu ga ru tangarang du la ga lok tidu, “Lenmila nak lok buru minumu.” La nedu duga vas li ren la duga rebeng tu at luxangkedek teren la duga lotu saparav i. ¹⁰La ne Iesu ga lok tidu xeretna, “Nemen gat muta marat. Munat pas la muna tong i ri luvuttadi loklok ka anasa rak dola dinat pas uto Galili la dinaba ven ia ve.”

Lavapaase Asu At Luvuttadi Rutu Mu

¹¹At loxonaleng lutkin duga vas kaxat basinge lamaaut, mo luvuttadi esep diga reven tatao lamaaut, digamlong uto at lemenemen silok la diga tong asu levempanga axap diga ven i ri lavamaasa silok. ¹²Lavamaasa silok diga vot buru mi loxongkulao silok la diga vit li lodoxoma la diga raba laxampilas solo ri nom luvuttadi esep. ¹³La diga lok tidi, “Minaba tong i dola luvuttadi loklok ka anasa ren diga vot at laxanimin la diga nem kaka labantuxu ren at loxonaleng nemi miga unga. ¹⁴Dola laradi gomgo, ne Paelat na ronga i na, nema maba vaase arepukus lodoxoma ren dola nemi mixo lok taxapmek at nai, la nemi guta doxoma mu solo i nom.” ¹⁵Kuren la luvuttadi rutu mu diga lok ka nom levempilas la diga lox epovo levelinga diga tong taba di min. Kuren la ana lavapaase asu ira peseves keneng at leme Judaia i se at na levenaleng.

(Mk 16:14-18; Lu 24:36-49; Jo 20:19-23; Gu 1:6-8)

¹⁶Melemu lasangaun mi legesara luvuttadi loklok ka anasa ren digat pas uto at loxongkaana ro Galili no ne Iesu ga tong li i ridi. ¹⁷La at loxonaleng diga ven i, diga lotu saparav i, ketla lentaba atdi levendoxoma atdi ga sixit ekarakat. ¹⁸La ne Iesu ga vas saparap nedi la ga lok tidi xeretna, “Moroa gara raba vam ia mi lololos axap to vana laxalibet la de xopok at lavatbung menemen. ¹⁹Kuren la mina onon la mina lox ase limixin at lengkot axap kusu diba ravasu ngan luvuttadi loklok ka anasa rak; la mina sep susu di mi laasen at ne Temen dik la ne Nitna eburu bok mi Loroonan Kaala. ²⁰La mina lox ase di xusu dinang tonga res at levelinga axap nenia agara tong pam i rinimi. La nenia anabak lox eburu amisik minemi naba se at laxavaxap at na lavatbung menemen.”